

DXUS YUWE SAN JUAN FXI'JNI

Kristo naa kiwete vxyaani

1 ¹Nyafxiitey naa kiwe meeíin, Kristo' ūsyā'kh yu'. Txā' Dxus yakhku ūsu', sa' Dxus fiçxáak yu'. ²Nyafxiiteya' txā'wēk Dxus yakh ūssa yu'. ³Dxusa' txā'sna neewe'weçxak kījkihñawa jxuka kvxiitu'j. Txāa pa'ga naa kiwete kījkihñawa ūssa' jxuka txajx vxitniçxaçxáata'. Dxus yakh ūssa kījkihñawa vxitmeewaça', kīh yuhwa mee yuutxna. ⁴Uuçxa ki' itxi yuuwa'ja's txāak ji'phu', sa' txāa fiçxáak nasatx eena'te kaafxi'ze'jwa'jsa yu'. ⁵Txāa eena'sa' çxhi'dxte kweethku, aç'a' çxhi'dxsa' fxīçxhaya' ājame'.

⁶Txāa eena'sa's tuuthe'jsa' teeçx piçthē'j Juan yaasesak yu' Dxus kaahni. ⁷Txā' txāa eena'te kaafxi'ze'jwa'jsa's tuuthe'jsak yu', maawa txajx tuuthe'jni's wēse'jçxa Kristo's ūuste jxpa'gakahn. ⁸Juan yu' eena'te kaafxi'ze'jwa'jsa meek yu', naasáa eena'te kaafxi'ze'jwa'jsa's tuuthe'jsaçxáak yu'. ⁹Naapkaçxha' nasatx eena'te kaafxi'ze'jwa'jsa Kristo' naa kiwete vxyaaççxáak yu'. ¹⁰Sa' vxyaaçxa' naa kiwete fxi'zena ūsu'k. Txā'wētewa, naa kiwetewe'sxa' jiyumeeta', makwe txajx vxitnisaçxawa. ¹¹Txajx vxitni kiwete vxyaatewa, txajx ji'j jīnisa' jxpa'gameeta'. ¹²Makwe txajx ji'j jīnisa' jxpa'gameetewa, maái yu' txā's nwēese'jçxa ūuste jxpa'gatx. Aç'a' txā'sna jxpa'gasatxi's Dxusa' txajx luuçx yuuwa'ja's ūsku. ¹³Txāa pa'ga txāawe'sxa' naa kiwete neywe'sx kakweju kakwe yakh upxhi'tx neywe'sx jxthāasni txā'wēsameeta', txāawe'sxa' Dxus luuçx yuuna pa'jsata'.

¹⁴Nyafxiitey Dxus yakh ūssa' nasaa kakwe's jxpa'gaçxa kwe'sx yakh ūsu'k, isasaçxá's pta'sxna peeygāhna. Txāa pa'ga kwe'sxa' txajx fxi'zeni wala zhiçxkwesa's uytha'w, txāasa jiitha'w Dxus Nçxi'k teeçxçxáasatewa. ¹⁵Txā'snak Juana' tuuthe'jna na'jīna we'we:

—Adxa' na'snath pta'sxi' i'kwe'sxtxi: Adx e'ste yuja' txā' adx naa kiwete upxmeyna we'sxku yu', txāa pa'ga adxte jxthaakwesa' jīnak pta'sx.

¹⁶Aç'a' kwe'sxa' txajx peeygāani makwe ne' yu' txā'sa' jxukatha'w jxpa'ga jxukaysa. ¹⁷Nyafxi' juuna' jxkaahnisa ley Moises nvxihtku txā'sçxáanatha'w

jxpa'ga, naapkaçxha' Jesukristo' isa Dxus peeygãani'sku nuypa'j txã'snatha'w jxpa'ga. ¹⁸Nawa maa yuhwa Dxusa's iiumeeta'. Txã'wëtewa Dxus Nçxi'k teexçxáasa Ney yakh ih ússa' kwe'sxtxi' kaajiyu'kh Dxus ma'wësatewa.

Jesus kimtewa Juan pta'sxni
(Mt 3.11-12; Mr 1.7-8; Lk 3.15-17)

¹⁹Jerusalente judiuwe'sxa' pějxya' kaahtx sacerdote vxite' levxitawe'sxtxi Juan kimtewa jiyuya'. ²⁰Aça' Juana' áatek pta'sx:

—Adxa' Kristomeeth jīna.

²¹Txajū' ki'kin pějxtxi:

—Txã'wëçxa' ¿kimga? ¿Txãniitey Dxus yuwe pta'sxsa Elias wá'ga? jīte', Juan paşçxa':

—Txã'wëmeeth jīk.

Aça' ki'kin pějxtxi:

—Dxus yuwe pta'sxsa' pa'jana jī'tx txãa wá'ga jīte':

—Txãameeth jīnak pas.

²²Txajū' ki' pějxtxi:

—Txã'wëçxa' idxa' ¿kimga? Idxa' kīh yūuna fxi'zesaçxawa mpeeta'sx. Txã'wëme', kwe'sxtxi jxkaahsatx pta'sxya' u'jwa'j jī'ptha'w jīte', ²³Juan paşçxa':

—Dxus yuwe pta'sxsa Isaiasa' na'jīnak we'we: Nasa u'pnimée kiwesu sus we'weni pthūusena: Dxus pa'jwa'ja's mpheu'jwe jīna, nawa adx tuuthe'jna pekūhwa'ja's pta'sxnak txã'jī.

²⁴Juana's paapějxya' pa'jsa' fxariseowe'sx kaahnisatx yu', ²⁵sa' ki'kin paapějxtxi:

—Txã'wë Kristomeeth, sa' Eliaswa meeth, sa' Dxus yuwe pta'sxsa pa'jana jī'tx txãameeth jī'g sa' ¿kījxa'çxáaga nasatx yu'te bautisaī'? jīte', ²⁶Juan paşçxa':

—Adxa' yu'teçxáath bautisaī'. Nawa i'kwe'sx ksxavxyte teeçx ūsa' txã'sa' jiimeene'kwe. ²⁷Txã' adx e'su vxyaana, nawa txã' adxte jxthaakwesa'. Aça' adxa' txajx pelgatxi tudni weşçxáa yuhtxwa khihbxā' āhmeekwesath jīnak pas.

²⁸Juana' Jordan yu'wala kuteju sek kāani ju'gu Betábara yaasesatek txã'wë bautisāyna ūsu', aça' kxteetx txã'wë paapějxya' pa'jna ūsu'.

Kristo Dxus kaahni piisxakuē

²⁹Kuskuskhē' Juana' Jesus yuhte uyçxa', na'wëk we'we:

—Mthegwe, naaí Dxus kaahni piisxakuē', jxukaysa pkaltxi txudewa'jsa. ³⁰Aça' adxa' txã'sna we'weçxath txã'wë pta'sx: Adx e'su teeçx piçthē'j vxyaana, txã' adxte jxthaakwesa', txã' naa kiwete adx upxmeyna we'sxku yu' txãa pa'ga. ³¹Txã'sa' adxīi yuuwa jiimeeth yu' kimtewa. Nawa Israelwe'sx txã's jiyukahn yu'teçxáawa bautisāyna ūsu'th.

³² Juana! ki'kin we'wek na'jīna:

—Dxus Espiritu's uythu cieluju tub çxihme na'wēsa Jesus kajkwekhē kīijaçte. ³³ Txā'wētewa, adxa' nee jīmée fiçxáath yu' kintewa. Nawa adxa's bautisāyya' kaahsa' pta'sxku: Espiritu's uyuune'ga teeçx piçthē'j kajkweke kīijaçte!, aça' txāa piçthē'ja' isa Dxus Espiritu's nasaa ūuste kxu'akhe'jsa yuuna jīnak pta'sx. ³⁴ Aça' āçxha' uyçxa', jiyuth Dxus Nçxi'ktewa, sa' txā'snath tuuthe'je'.

Kristo yakh u'jusa nyafxtewe'sx

³⁵ Vxite kuskuskhē! Juana! ki' kxtey ūsu'k txāa yakh u'jusa e'zsa yā'jçxa. ³⁶ Sa' Jesus jxkhēuuçte uyçxa', Juana! na'jīk:

—Mthegwe, naaí Dxus kaahni piisxakuē'.

³⁷ Txā'jīni's wēse'jçxa', txāa e'zsa' Jesus e'stey u'jtx. ³⁸ Aça' Jesusa' yu'thegçxa', txajx e'ste yuusatx uyku, sa' na'wēk pējx:

—¿Kījkwe pakwé'? jīte!, txāawe'sx pasçxa':

—Kaapiya'jsa, ¿mteega u'pu'? jīte!,

³⁹ Jesus pasçxa':

—Mejkawe thegya' jīk. Aça' txāawe'sxa' u'jçxa' jiyutx mtee u'psatewa. Sa' txāa yakh kxtee neeyūutx, kusuçyā'kh yu' naa pa'ga.

⁴⁰ Juan we'weni's wēse'jçxa' Jesus e'stey u'jsa teeçxsa' Adresku yaase yu', Simon Pedro nyakh. ⁴¹ Aça' Adresa' txajx nyakh Simon khuē'yna nyafxte pta'sxya' u'kh:

—Dxus tasxu yuusa Kristo jīni's yuutha'w uy jīna.

⁴² Txajū' Adresa' txajx nyakh Simona's pe'jna kūjk Jesus ūsnite. Aça' Jesus uyçxa' na'jīk:

—Idxa' Jonas nçxi'k Simon yaaseg, nawa āçxha' Cefxas yaseni neeyūune'ga. Cefxas yu', Pedro jīni'.

Fxelipe, Natanaelwe'sxtxi Jesus pa'yani

⁴³ Vxite kuskuskhē! Jesusa' Galilea kiwen u'jweççxa', Fxelipe's uyçxa':

—Adx yakh myuh jīnak pi'kx.

⁴⁴ Fxelipe yu', Beçaida çxhabte u'psak yu', Adres Pedrowe'sxwa txāa çxhabteywe'sxtxi yu'. ⁴⁵ Aça' Fxelipe' Natanaela's pta'sxya' u'jçxa' na'jīk:

—Moisesa' teeçx piçthē'ja' vxyaana jīnak fxi'lj ley libroute, aça' Dxus yuwe pta'sxsa txāniiteywe'sxwa txā'snaifiçxáatx tuuthe'jna fxi'lj txā'stha'w kwe'sxa' puutx uy. Txāa piçthē'ja' Jose nçxi'k Jesusa', Nasaret çxhabteywe'sxa' jīte!, ⁴⁶ Natanael pasçxa':

—Nasarette!, ¿maaçxá' nasa ewsa kasejxa' ājama'k? jīte!, Fxelipe pasçxa':

—Mejka wakx thegya' jīk.

⁴⁷ Txajū' Natanael utxaana kūjuçte Jesusa' uyçxa', na'jīk:

—Naa piçthē'j yuuçxa' Israel nwe'sx jxpubasamée nasa ewsa yuh yu'ga.

48 Txã'jíte!, Natanaela' pějxku:

—¿Ma'wē yuuçxaga adxa's jiyu? jíte!, Jesus paşçxa!:

—Fxelipe pa'yameyna, idxa's uythu higwera fxtüu tasxte u'pte jíte!,

49 Natanaela' na'wêk pas:

—Idxa' Dxus Nçxi'kgu, Israelwe'sxtxi jxkaahsa jíte!, 50 Jesusa' na'jik:

—Txã'wē higwera fxtüu tasxte u'pte idxa's uythu jíteçxáa ¿adx kimtewa jiyuwá'ga? Txã'wēyã'lçxa', naajüyã'ja' Dxus kaavxya'ja'jnixt wejx walasatx uyuune'ga jik.

51 Sa' ki' we'weçxa!:

—Adxa' isath we'we': cielu phaateçxa ũste!, Dxus angeleswe'sxa' kīhna tejkana ũste uyuune'kwe Dxus Nçxi'k Nasa Yuusáa kajkwekhē jik.

Kaná çxhabte ptamunisa

2 1-3 Tekh en skhēwniite!, Galilea kiwesu Kaná çxhabte ptamusáa ũsu'tx.

Aça' Jesuswa pi'kxni pa'lçxa ũsu'k, txāa yakh ih u'jusawe'sx yã'lçxa. Jesus njī'jwa kxtee ũsu'k, naapkaçxha' vxino pçuute!, Jesusa's na'ljinak pta'sx:

—Vxino pçuk jik.

4 Aça' Jesusa' na'wêk pas:

—¿Kīh yūukahnkwe adxa's txã'wē pta'sxi'? adx en yuu āhmeya' jíte!,

5 njī'ja' kxtee selpisaawe'sxtxi na'ljik:

—Txāa ma'wē jxkaathe!, kxtey myūuwe jīna.

6 Kxte' seis kiwe mitxh walasatx ũsu!. Txāa yu' judiuwe'sx khweeçxawa'j yu' awnisatx yu!. Mitxh iisa oçxenta meeçxawa cien litro yu' khēesatx yu!. 7 Txajū' Jesusa' jxkaakh kxtee selpisaawe'sxtxi!:

—Naa mitxhsu jxuka yu' uta mawwe jíte!, kxtey yuutx. 8 Txajū' Jesusa' na'ljinak we'we txāawe'sxtxi!: Naa mitxhte le'çxkuē pa'kççxa boda namu's me'jwe yusya' jíte!, txāawe'sxa' kxtey yuutx. 9 Txajū' boda namu' tudççxawa, jiyume' yu'a's txã'wē vxino vxitnitewa. Kxtee selpisaawe'sxçxáatx jii yu!, yu'a's txã'wē vxino vxitnisatewa. Txajū' boda namu' ptamusa's pa'yaçxa 10 na'ljinak we'we:

—Maawa vxino ewsa's khuē'lytxi nyafxte yusu' pi'kxnisatx, txāa e'sutx vxino açxamée ewsa's yusu!. Nawa idxa' txã'wē yūumée vxino wejx ewsa'sgu nmehte yus jik.

11 Jesusa' Galilea kiwesu Kaná çxhabtek txã'wē kim yuhwa ājānimeesa's kaavxya'j. Txã'wē yūuçxak txajx ewuni's khiyu'j, aça' txāa yakh u'jusawe'sxa' jiyutx Jesus kimtewa.

12 Txāa e'su' Jesusa' Kapernaum çxhabnak u'j, txajx njī'j vxite' txajx nyakhwe'sx, txāa yakh u'jusawe'sx yã'lçxa.

Dxuus yatte txweyna ũssatx Jesus kasxisxni

(Mt 21.12-13; Mr 11.15-18; Lk 19.45-46)

13 Judiuwe'sx fxiesta Paskua en ājāçte!, Jesusa' Jerusalen çxhabna u'kh.

14 Sa' dxuus yatte u'kaçxa!, bwey, piisxáa, tub çxihmetx txweyna ũstek uy,

vxite' vxyuu yu'pthehna üssatx. ¹⁵Sa' Jesusa' txã'wẽ yũuna üste uyçxa', kha'txa pheu'lçxa eka kasxisxku nasa vxite' niimaltxi jxuka. Sa' txã'wẽy vxyuu yu'pthehna üsni mesatxwa jxuka pũsxku petx vxyu yã'lçxa. ¹⁶Sa' kxtee tub çxihme txweysatxi' na'ljik:

—Naatxi' ayju jxuka mkaasxisxwe. Adx Tata yatte' txweyna vxyuu yu'pthehna üswa'jme'.

¹⁷Txã'ljite', Jesus yakh u'ljusawe'sxa' yajkxtxi Dxus librute na'wẽ fxi'jni's: Dxuus yatte' ewmée yũuni's weh yuhwa peejxmeeth jĩni's.

¹⁸Txajũ' judiuwe'sxa' üusçxa we'wenatx pẽjx:

—Kim jxkaathe txã'wẽ yũuçxawa, kwe'sxtxi mpeeta'sx jite', ¹⁹Jesus paççxa':

—Naa dxuus yata's pẽxtewa, adxa' tekh ente' ki' kiisya' ajãwa'jsath.

²⁰Txajũ' judiuwe'sxa' iweeçx we'wena na'ljitx:

—Naa dxuus yata's kuarenta y seis anxutetx txahna jxã'l, açã' idxa' çtekh enteçxãa txajxa' ewuudxijĩma'g?

²¹Nawa Jesusa' txajx kakwe'sku dxuus yata' jĩna we'we'. ²²Açã' uuçxa ki' itxi yuute', txãa yakh u'ljusawe'sxa' yajkxtxi txã'wẽ we'weni's. Sa' Dxus libru' isane' we'we', açã' Jesuswa isasa's fiçxãane' we'we' sũhna ewtxi jiyu.

Jesus nasaa üus yaakxnitx jiyuni

²³Judiuwe'sx fxiesta ente Jesus Jerusalente üste', nasa wala kuh jiyutx Jesusa' Dxus tasxu yuusatewa, txã'wẽ kim yuhwa ajãnimeesa's kaavxya'ja'pha'ga. ²⁴Nawa Jesusa' txãawe'sx ma'wēsatewa jxuka jiyiã'kh yu', txãasak txã'wẽ jiyutx sũju'çmée. ²⁵Txãa nasa' txã'wēsata' jĩna pta'sxi peejx yu'çme', txãa pa'gatey nasaa üus yaakxnitx jxuka jiyiã'kh yu' naa pa'ga.

Jesus, Nikodemo yakh puutx we'weni

3 ¹Teeçx fxariseo Nikodemo yaasesa u'pu'k. Txã' judiu npiçthẽ'jsatewe'sxku yu'. ²Txãa piçthẽ'ja' Jesus tasxte kus pa'lçxa', na'ljik: Jiitha'w idxa's Dxusne' txã'wẽ kaah, kwe'sxtxi kaapiya'khan. Dxus pu'çxmeewaça', kim yuhwa ajãwa'jsame's kaavxya'ja'jmeena, idx na'wẽg yu' txã's jite', ³Jesusa' na'wẽk pas:

—Isath we'we', maawa ki' upxmeeçxa yu', Dxus jxkaahna üsnite u'kaya' ajameena.

⁴Txã'ljite', Nikodemo' na'wẽk pẽjx:

—Nasa iisxyã'lja' ma'wẽ ki' upxya' ajakx? Njĩ'l tutxhte ki' u'kaçxa upxya' ajama'k? jite', ⁵Jesusa' pta'sxku:

—Adxa' naa kakwe upxwa'ja's we'we'çmeeth. Maawa Dxus jxkaanite u'ka wẽeçxa', yu'te vxite' Dxus Espiritute upxwa'ja'sthu txã'lji'. ⁶Nasaa kakwe' nasaa kakweteyçxãak upxhi', naapkaçxha' Dxus luuçxa' Dxus

Espiritutek upxhi'. ⁷Maawa ki' upxwa'ja' jī'th aça' fxiy yuh txā'wē we'we'k sūhna yaakxnu. ⁸Wejxa'swa ma'wēga susni's wēse'jçxawa, majū yuhte ki' maa dxi'lj ul'jweçtewa ya'jiyu'çmēe, txā'wēyku Dxus Espiritute upxni's ya'jiyu'çmēe jīte', ⁹Nikodemo' jiyuya' ājameeçxa' ki' pējxku:

—¿Ma'wē txā'wē yuja' ki' ya'upxhix? jīte', ¹⁰Jesus pasçxa':

—Idxa' Israelwe'stxti kaapiya'jsaçxawa, na'wēsa yuutxi' ¿jiimewá'ga?

¹¹Isath we'we': Dxus Espiritute upxnisa' wejxa na'wēsaçxá' txā' ma'wēsatewa iuythu sa' jiiçxath txā'jī'. Nawa i'kwe'sxa' jiyu'çmeei'kwe.

¹²Naa kiwetewe'stxti we'wena pta'sxte jiyumeeçxa', ¿ma'wē jiyuki'kwe cielutewe'sxna pta'sxte'?

¹³Maa yuhwa cielute u'kasa yu' meeta', naasáa cielujū kīisa yuuçxáa cielute u'kasa', Dxus Nçxi'k Nasa Yuusa' txā' cielutewe'sxa' naa pa'ga.

¹⁴Dxus Nçxi'k Nasa Yuusa's ēekhē a'kxçxa ki'pni yuuna, Moiseswa ma'wēga nasa u'pnmēe kiwete ūsçxa' ul weeswe's fxtüukhē a'kxçxa ki'p txā'wēy, ¹⁵kxah maawa jxukay txā'sna uyçxa ūuste jxpa'gasa', bagaçxte yuhwa pçuwa'jmēe itxi fxi'zewa'ja's ji'phutxna vxitumēe.

Dxusa' nasatx iiméh wala peeygāani

¹⁶Dxusa' naa kiwete nasatx iiméh wala peeygāhçxa yuuçxáak txajx Nçxi'k teeçxçxáasanawa naa kiwete kaah, kxah maawa txā'sna ūuste jxpa'gaçxa' bagaçxte yuhwa pçumēe itxi fxi'zewa'ja's ji'phukahn vxitumēe. ¹⁷Dxusa' naa kiwete txajx Nçxi'ka's kaahçxawa, nasatx ewmeete nvxihtxa' kaahme', wejxwa nwe'weya'k kaah. ¹⁸Maawa Dxus Nçxi'ka's ūuste jxpa'gasa', ewteyā'j neeyūutxna. Nawa txā'wē Dxus Nçxi'k teeçxçxáasana ūuste jxpa'gasame', ewmeeteyā'j neeyūuwa'jsata'. ¹⁹Maawa ūuste jxpa'gasame', ewmeeteyā'jtx nvxiitni yu', txā'wē eena'sa naa kiwete kihtewa, ewmeeçxáa yūuna ūsçxa', çxhi'dxteçxáa wejx fxi'ze wēepa'ga. ²⁰Sa' maawa jxukay ewmeeçxáa yūuna ūssa', eena'sa's ahçççxa utxa'çmeeta' eena'te, txāawe'sx ewmēe yūuni āate vxyaakahmen. ²¹Nawa ew yūuna fxi'zesa yu' eena'sa's utxa'tx, txāawe'sx ew yūuni' Dxus jxkaahnisatewa āate vxyaakahn.

Jesusa's tuuthe'jni's wēse'jçxa' Juan weçxanīi

²²Txāa e'su' Jesusa' Judea kiwen u'kh txāa yakh ul'jusawe'sx yā'jçxa. Sa' kxte' maz en ūsu'k nasatx yu'te bautisāyna. ²³Juanwa bautisāynak ūsu' teeçx ahte Enon yaasesate Salim utxate, txāa ja'dasu yu' ūsu'k naa pa'ga. Aça' Juana' nasa wala kuh yu'te bautisāyku. ²⁴Karcelte kxupmeynaçxáak txā'wē bautisāy.

²⁵Txajū' judiuwe'sxa' Juan yakh ul'jusawe'stxti paapējtxti txā'wē bautisāyni's. ²⁶Aça' txāawe'sxa' Juana's pta'stxti na'jīna:

—Kaapiya'jsa, mwēese'j. Sek kāani ju'gu Jordan yu'wala kutete ūste pta'sxgu txāa piçthē'jwa āçxha' bautisāyna ūsa', aça' nasa jxukay txāa yakhçxaçxáa ul'jweçta' jīte', ²⁷Juana' na'wēk pas:

—Kim yuhwa txã'wě tuuthe!jni yuumeena, Dxus jxkaahnimeesa yu!
 28 I'kwe'sxa' yaçtey adx pta'sxni's jiiyã'ji'kwe: Adxa' Kristomeeth, naasáa txajx
 yaçte kaahnisaçxáath jini's. 29 Naa ejemplo's mjiyuwe: Pta'mu ente' novxio'
 novxia yakhku u'pu'. Aça' novxio namiku' pukate u'pçxa' wala weçxweçxa
 yaaki'k novxio we'weni's wěse'jçxa. Adxwa txã'wěythu wala weçxweçxa
 yaaki', Jesusa's tuuthe!jni's wěse'jçxa. 30 Txã' jweeíçxáa tuhthesa yuuna
 u'jwena, naapkaçxha' adxa' jweeíçxáa ãhmeekwesa yuuwa'th.

Jesusa' cielujü kïisa'

31 Cielujü kïisa' maatewa jxthaakwe tuhthesa'. Kiwete üssa' naa
 kiwetewe'sxta', sa' naa kiwetewe'sxçxá'stxi pta'sxi'. Nawa cielujü kïisa'
 maatewa jxthaakwe tuhthesa'. 32 Txã'wěçxaíik txajx wěse'jçxa uyni's
 pta'sxi', nawa kim yuhwa nwěese'je'çmeeta' txajx we'weni's. 33 Nawa
 txajx pta'sxni's maaçxáawa nwěese'jwaça', Dxusa' isak pta'sxi' sühna
 jiyuna pa'jatxna. 34 Txã'wě Dxus jxkaahnisa' Dxus kwe'we'jni'sku we'we',
 txã'sa' Dxusa' txajx Espiritu's makwewa üsu'k txãa pa'ga. 35 Neyá'
 Nçxi'ka's wedxçxa kíhnawa jxuka txajx kusete nvxihtku. 36 Aça' maawa
 Dxus Nçxi'ka's üuste jxpa'gasa' pçumée itxi fxi'zewa'ja's ji'phutxna. Nawa
 Dxus Nçxi'ka's nwěese'jsame' pçumée itxi fxi'zewa'ja's ji'phumeetxna,
 naasáa Dxus kastigo seena'saçxá's jxpa'gawa'jsata'.

Teeçx u'y Samariatewe'sx yakh Jesus puutx we'weni

4 1 Txã'wě Jesus tasxte nasa wejx wala utxaate', Jesusa' Juante jxthaakwe
 bautisãyni's fxariseowe'sxa' jiyutx. 2 Isa yu' Jesusa' bautisã'çme', naasáa
 txãa yakh u'jusawe'sxçxáatx bautisã'. 3 Nawa txã'wě fxariseowe'sx jiyuni's
 Jesus wěse'jçxa', Judeajü kasehna u'kh, Galilea kiwen. 4 Nawa Galilea kiwen
 u'jweççxa', Samaria kiwegak khěwna u'jwa'l'ji'phu'. 5 Sa' Samaria kiwesu' teeçx
 çxhab Sikar yaasesa üsa' txãa çxhab peeku'thek pa'l'j txãa yakh u'jusawe'sx
 yã'l'jçxa. Txãa Sikar çxhaba' Jakob kiwe üsku txajx nçxi'k Jose's txãa utxatek
 neeyü'. 6 Txãa kiwete' Jakob'a' txãniitey yu' kutxi'jni kafx nvxihtna üsu'ne',
 aça' Jesusa' ēepxãh wahtxna u'jweççxa', kxteek jxkaaseya' kaçx. 7 Naapkaçxha'
 teeçx u'y Samariasuwe'sxa' yu' pa'kxya' pa'the', Jesusa' na'l'jik:

—Yu' mpeeswe tudxwa'l'j.

8 Txãapkaçxha' txãa yakh u'jusawe'sxa' çxhabna ü' weyya' u'jnitx yu'.

9 Aça' txãa u'ya' na'l'jinak pas:

—Idxa' judiu nasag, sa' ¿ma'wētega ü'kwe's yu' thāasu'? ü'kwe'
 Samariasuwe'sxthu açuujal' jik. (Judiuwe'sxa' Samariasuwe'sxtxi ahçççxa
 we'we'ççxáa yuhwa meeta'.)

10 Txajü' Jesusa' pta'sxku:

—Dxusa' kíh üsya'watewa jiyuçxa txã'wěy yu' thāassa' kimtewa
 jiyuwaça', adxa's yu' thāasune'kwe, aça' adxa' yu' pçuwa'l'jmeesa's
 peesu'nja jite', 11 txãa u'ya' na'wēk pas:

—Naa kafxa' wala dxiaa', aça' idxa' yu' pa'kxwa'j ji'phmeeg. Sa' çma'wëga ü'kwe's yu' pçuwa'jmeesa's peesu'nja jî'? ¹²Kwe'sx yaçgawe'sx Jakobku naa kafxa's phaade yu' pa'kxwa'j, aça' txajx nçxi'kwe'sxwa kxteetx pa'ki' tajkxtxi yuswa'j vxite' txäawe'sx tudxwa'j yä'ljçxa. Aça' idxa' çkwe'sx yaçgawe'sx Jakobte jxthaakwe wáa walasane'ga? jîte', ¹³Jesus paşçxa':

—Jxukay maawa ayte yu'a's tudxsa' yü'wëena nes yuutxna. ¹⁴Nawa adx peesni yu'a's tudxçxa', bagaçxte yuhwa yü'wëemeetxna. Txäa pa'gatey adx peesni yu'a' txäawe'sx üuste yu'içh na'wë nes yuuna, pçuwa'jmée itxi fxi'zewa'ja's ji'phukahn.

¹⁵Txä'jîte' txäa u'ya' na'jînak pas:

—Txä'wëte', txäa yu'a's mpees, kxah yü'wëewame'nja, sa' peena yu' naa kafxte pa'kxya' pa'jme'nja.

¹⁶Aça' Jesus we'weçxa':

—I'kwe nmi'a's me'jwe pa'yaya', sa' txäa yakh yuweene'kwe ayte' jîte', ¹⁷txäa u'ya':

—Nmi' ji'phmeeth jînak pas.

Txajü' Jesusa' na'jîk:

—Nmi' ji'phmeeth jîçxa' isa yuh we'we'i'kwe. ¹⁸Txä'wë nyafxí yu' tahç nmi'i'kwe ji'phu', nawa açxwe'sxa' nmi' me', aça' isa yuh we'wei'kwe.

¹⁹Txä'wë wëse'jçxa', txäa u'ya' na'jînak pas:

—Idxa' Dxus yuwe pta'sxsaí ne'ga süju'th. ²⁰Kwe'sx yaçgathë'jwe'sxa' naa vxiçtetx Dxusa's neewe'weya' pkhaakhe'. Nawa judiuwe'sx yu', Jerusaleteçxáa Dxusa's neewe'weya' pkhaakhewa'ja' jî'i'kwe jîte', ²¹Jesus paşçxa':

—Ew mjiyuwe: naa vxiçte meeçxawa Jerusaleteçxáa Dxusa's neewe'wewa'jme'. Dxusa's mteewa neewe'wewa'j en äjana.

²²Samariatewe'sxa' Dxusa's ma'wë neewe'wewa'ja'swa jiimeei'kwe. Nawa judiuwe'sxa' jiiçxatha'w Dxusa's neewe'we', nwe'wesa' judiu nwe'sxa' naa pa'ga. ²³Dxusa's neewe'wewa'j en äjana jî'th txäa ena' äjxä'kh. Aça' maawa i'sxiimée üusuh jxuka yajkxçxa Dxusa's üusteçxáa neewe'wesa' ew yuutxna, kwe'sx Tata' txä'wë yüuni'sku jxthäasu' naa pa'ga. ²⁴Dxusa' kwe'sx na'wëy kakwe ji'phme' na' mtee mteewa üsa', aça' txä'sna neewe'wesa' üusuh jxuka yajkxçxa neewe'wewa'ja' jîte', ²⁵txäa u'ya' na'wëk pas:

—Ü'kwe' jiith Kristo Dxus tasxu yuhna, aça' txäa pa'jçxa jxuka ew pta'sxina jîte', ²⁶Jesus paşçxa':

—I'kwe yakh puutx we'wena u'psa adxí Dxus tasxu yuusath jîk.

²⁷Naapkaçxha' txäa yakh u'jusawe'sxa' sxawedna pa'jtx. Sa' Jesusa' txä'wë txäa u'y yakh puutx we'wena üste uyçxa', kuh yajkxnatx neeyüu. Nawa çkijxa'ga txäa u'y yakh puutx we'we'? jîna maa yuhwa paapëyi'çmeeta'. ²⁸Txajü' txäa u'ya' mitxha's kxtee txahna' u'kh çxhabsu nasatx pta'sxya':

²⁹—Naa kiwete ma'wě fxi'zeni'swa teeçx piçthêj'j jiyuk txã'sa' myuhwe thegya'. Txã' Kristo îina jîna pta'sxte', ³⁰çxhabte'we'sxa' thegya' u'jtx Jesus ûsnite pa'j. ³¹Naapkaçxha' txãa yakh u'jusawe'sxa' Jesusa's na'jînatx we'we:

—Idxa', çwēemeegá'? Pan mē' jîna.

³²Nawa Jesusa' na'wēk pas:

—I'kwe'sxa' jiimeei'kwe adx kîh û'wa'j ji'phtewa.

³³Txã'jîte', puutx paapēyi'tx txãawe'sx pwe'sx:

—Meeçxa' çmaa nasa puuçya' kühwá'ntakx? jîna.

³⁴Aça' Jesusa' na'wēk pta'sx:

—Adx Tata jxthâasçxa mjîiya' kaahni's kxtey yuuniçxáa, adx û'ni na'wēsa'. ³⁵Û' thê'jwa'j pahz a'tey peeja' jî'i'kwe i'kwe'sxa'. Nawa txã'wēme'. Mjîinisú mthegwe wakx, jxuka thê'jnyîyã'j úsa', aça' pkhakhwa'jçxáa yã'j peeja'. ³⁶Pkhakhna mjîisa' deweni's jxpa'gawa'j ji'pha', aça' txãa pkhakhnisa' pçuwa'jmée îtxi fxi'zewa'jsata', kxah uuhsa' pkhakhsa yakh ja'daçxah weçxweçxa yajxna neeyûutxna e'zîi. ³⁷Teeçxsa' uja'k, naapkaçxha' vxite' pkhakhe'k jîni' isa yuja'. ³⁸I'kwe'sxa' uuhsameei'kwe, nawa adxa' pkhakhya' kaath vxite nasa uuhnisu jîk.

³⁹Txã'wē txãa u'y û'kwe ma'wě fxi'zeni'swa jxuka jiyuk jîna pta'sxpa'ga, txãa çxhabte nasa kuhsa' Jesusa's úuste jxpa'gatx. ⁴⁰Sa' Jesus ûsnite thegya' pa'jçxa', Jesusa's wala neevxisxatx txãawe'sx yakh kxtee pta'sxna neeyûukahn. Aça' e'z enku kxtee fxi'ze, Dxus yuwe's pta'sxna. ⁴¹Aça' txã's wēse'jçxa', Jesusa's úuste jxpa'gasa' jwee'fçxáatx pehna. ⁴²Sa' txãa u'ya's na'wētux we'we:

—I'kwe pta'sxniçxá's jiyumée, kwe'sx yuutha'w txajx we'weni's wēse'jçxa' jiyu Dxus tasxu yuusa Kristotewa, maatxwa jxuka nwe'wesa.

⁴³Txajû' e'z en skhēwniijû', Jesusa' Samariajû kasehna u'kh Galilea kiwenîi. ⁴⁴Jesúsîi we'weçxawa: Dxus yuwe pta'sxsa' maa yuhwa peekx kiwetey yu' wedxni fxi'ze'çmeeta' jîk txãasak Galilean u'j. ⁴⁵Aça' Galileate pa'the', kxteewe'sx yu' wala weçxana jxpa'gatx, Jerusalen fxiestan u'jsa' uyne'ta Jesusa' ma'wě yûutewa txãasatx txã'wě yûu.

Teeçx ãçã'sa's Jesus nuykatxhini

⁴⁶Jesusa' Galilea kiwete pa'kh Kaná çxhabte, yu'a's vxino vxitku nyafxîi kxtee. Aça' kxtey teeçx piçthêj'j úsu'k ne'jwe'sxa's jxkaah pu'çxsa. Txã' teeçx nçxi'k wala ãça'sa' ji'phu'k Kapernaum çxhabte. ⁴⁷Sa' Galileatey Jesus sxawedna pa'jni's jiyuçxa', txãa piçthê'ja' puutx uyna kühçxa', na'jînak pxthaa we'we:

—Adx yatna mejka, adx nçxi'ka's nuykatxhiya'. Txã'wēme', uuçyã'ja' jîte', ⁴⁸Jesus pasçxa':

—I'kwe'sxa' adx ãjani's kaavxya'ja'jmeete yu', adxa's jiyumeene'kwe kimtewa.

49Txãljíte!, txãa piçthêlj yu' na'jîk:

—Dud myuh, adx nçxi'k uumeyna.

50Txajü' Jesusa' na'jîk:

—Yatna sxawedna me'j. Iidx nçxi'ka' katxhiyãljçxa üsa'.

Txãljíte!, txãa piçthê'ja' Jesusa' isa yuh we'wene' sühna yatna sxawedna u'kh. 51Sa' yatte pa'jaçte!, txã'sna selpisaawe'sx pu'thegya' kasehçxa' na'wêtx pta'sx:

—Iidx nçxi'ka' katxhiyã'kh jîna pta'sxte!, 52txãa piçthê'ja' pêjxku:

—Adx nçxi'k açã'sa' çma'wêga wêtkuê' yajkx? jîte'!

—Jü'na la unatek kakwesek uçxha jînatx pta'sx. 53Aça' neya' yajkxku txãa oratey Jesusa': Iidx nçxi'ka' katxhiyãljçxa üsa' jîni's. Txajü' txãa piçthê'ja' Jesus kintewa jiyuçxa' txajx üste jxp'a'gak, yattewe'sxwa txã'wëy. 54Txã'wë Judeajü' sxawedna Galileate pa'ljçxa açã'sa'sa' nuykatxhini yakha' e'z usyã'ja' Jesus ajani's kaavxya'ja'jni'.

Treinta y oçxo anxu açã'na üssa's Jesus nuykatxhini

5 1Txãa e'su' judiuwe'sx fxiesta en ajaçku yu', açã' Jesusa' Jerusalenna ki' u'kh. 2Txãa çxhabte' iikha'jni yu' jip'hu'tx piisxãa ka'ga'jni vxitx utxate. Txã' Betesda yaase' hebreo yuwete. Açã'sa pa'ljçxa üswa'lj tahç ahtek txudeni yu', yat pwa' na'wësa. 3Kxte' wala kuh açã'sa üsu'tx, uyya' ajasamée, çxida puuplesa, vxite' ëseya' ajasamée txã'wësatx üythasna üsu', yu' ëseçpkaçxha' kxtee khëeya' sühna. 4Txã'wë maa enteya' Dxus angel kîhçxa yu'a's këese'je'k, naapkaçxha' maa yaçte khëjena txã' jxuka katxhiçxak neeyü' kîh wee jip'hçxawa. 5Kxteea' teeçx piçthêlj treinta y oçxo anxu açã'na üssak txkaa üsu'. 6Aça' txã'sna Jesus uyçxa' txakwe txaçx açã'na üste jiyuçxa', pêjxku:

—¿Katxhi wëega'? jîte!, 7açã'sa pasçxa'!

—Yu' ëseçpkaçxha' yu'te adxa's akhwa'jsa kim yuhwa meeta'. Adx khëe wëjeçpkaçxha' vxite khuê'y khêje'tx jîte!, 8Jesusa' na'jînak jxkaah:

—Kiiteçxa iidx pusçxa deeni's tû'sçxa me'j jîçpkaçxha', 9naa dudtey txãa piçthê'ja' katxhiyãljçxak neeyüu. Sa' txajx pusçxa deeni's tû'sçxa u'kh.

Nawa judiuwe'sx ki'sni ente txã'wë dee pusni's tû'sçxa uljweçte uyçxa', 10judiuwe'sxa' na'wêtx pêjx txãa piçthêlj katxhisa's:

—Açxha' ki'swa'lj ena' açã' txã'wë tû'sçxa uljuwa'lj jip'hmeeg jîte!, 11txãa piçthê'ja' pasçxa na'jîk:

—Adxna nuykatxhisafik txã'wë jxkaah: Iidx pusçxa deeni's tû'sçxa me'j jîpa'ga txã'wë tû'sçxa uljweçthu.

12Aça' judiuwe'sxa' ki'kin paapëjxtxi:

—Txã'wë jxkaahsa' çkimga yu'? jîte!, 13txãa piçthêlj katxhisa' jiyuya' ajame' kim txã'wë nuykatxhitewa. Kxteea' nasa wala kuh üste!, txãa katxhisa' jiimeek yu' maa dxi'j kasehçxa Jesusa' u'thewa.

¹⁴Txãa e'su' Jesusa' dxuus yatte txãa piçthê'j katxhisa's puutx uyçxa', na'jik:

—Ăçxha' katxhgu neeyũu na', naa weete jxthaakwe nxussa pa'khamen pa'yajkx mfxi'ze, ewmée yũuna u'jumée jite', ¹⁵txãa piçthê'j u'jçxa' judiuwe'sxtxi pta'sxku:

—Adxna nuykatxhisa' Jesusga yu' jĩna. ¹⁶Txãa pa'gatx judiuwe'sxa' Jesusa's ahçeçxa ikh wêe, ki'sni ente txã'wê âça'sa's nuykatxhipa'ga.

¹⁷Txajũ' Jesusa' judiuwe'sxtxi na'wêk we'we:

—Adx Tata' naa entewa mjĩina ũsa', txãa pa'gath adxwa mji'.

¹⁸Txã'jite', judiuwe'sxa' jweefiçxáatx Jesusa's ikh wêena kiite. Txã'wê ki'swa'ja' jĩna jxkaahni leyçxá's nwêese'jmée adx Tata' Dxusa' ji'k na' txãawa Dxus na'wêysath ji'ne' sũhçxatx txã'wê ikh wêena kiite.

Dxusa' Nçxi'ka's itxi vxit-ya' ajawa'ja's ũsni

¹⁹Txajũ' Jesusa' na'wêk pta'sx:

—Isath we'we', adxa' Dxus Nçxi'kthu, nawa adxçxáa yu' mjiiya' ajame'nja. Adx Tata ma'wê mjiiite', txajx mjiiini's thegçxa yuuçxáath txã'wêy mjiiya' aja'. ²⁰Txãa pa'gatey Tata' adxa's peeygãhçxa txãa kĩh mjiiççxawa jxuka pta'sxi'k adxa's. Txãasa açxh uyi'kwe txãate jweefiçxáa walasatx kaavxya'ja'jana, açá' txãatx uyçxa' i'kwe'sxa' kuh yajkxna neeyũune'kwe. ²¹Tata' ma'wêga uusaatx itxi vxitu', txã'wêy adxwa itxi vxitu'nja maatxwa. ²²Ăçxha' Tata' yuuwesatx kastigãywa'ja's jxuka adxçxaçxáanak nvxiht, txãasa açxha' yuuwesatx kastigãywa'ja's Tata' kim yuhtxwa thegwa'jsame'. ²³Tata'swa ma'wêta nwêese'je', txã'wêy adxnawa jxukaysa nwêese'khanku txã'wê yũu. Adxna nwêese'jsame' adxna kaahsa Tata'swa nwêese'jsameeçxa txã'wê yuutxna. ²⁴Isath we'we': Maawa adx pta'sxni's jxpa'yajkx wêse'jçxa adxna kaahsa's ũuste jxpa'gasa', bagaçxte yuhwa pçumée itxi fxi'zewa'ja's ji'phutxna. Txã'wê yũusa' ewmeete nvxiitni yuumée, uuwa'ju kutxi'jçxa bagaçxte yuhwa pçumée itxi fxi'zewa'the nvxiitnisa yuuna. ²⁵Isath we'we': Pçumée itxi fxi'zewa'j en pa'jana ji'th txãa ena' açxhĩia'. Açá' uusaawe'sxa' Dxus Nçxi'k we'weni's wêse'jçxa kxtey yuusá' itxi fxi'zewa'ja's ji'phutxna. ²⁶Txãa pa'gatey adx Tata' itxi vxit-ya' ajawa'ja's ji'pha', sa' adxnawa ũsku txã'wê itxi vxit-ya' ajawa'ja's. ²⁷Sa' yuuwesatx kastigãywa'ja'swa adxa'siçxáak ũs, adxa' Dxus Nçxi'k Nasa Yuusath naa pa'ga. ²⁸Txã'wê Dxus Nçxi'k we'weni pthũusetel', uusaawe'sxa' pedaniijũ kasehwa'j en pa'jana jĩna pta'sxte', fxiy yuh we'we'k sũhna yaakxnuwe. ²⁹Txãa en ahte', uusaawe'sxa' pedaniijũ itxi yuuçxa kasejetxna, ew yũuna fxi'zesa' ewte u'jya', naapkaçxha' ewmée yũuna fxi'zesa' ewmeete u'jya' itxi yuutxna.

Jesus kintewa kaajiyu'jsa

³⁰Adxçxáa yu' kijxa'wa ajame'nja. Adx Tata jxkaatheçxáath yuuwesatx kastigã'i. Adx ũuste peekçxáa yajkçxa txã'wê yu'çmeeth, txãasa

adx kastigāyni' isasata'. Adxna kaahsa ma'wē jxthāaste' txāačxá'sthu kxtey yu'. ³¹Adx ma'wēsatewa kimwa pta'sxwa'jsa ji'phméé peekxčxa' txā'wēsath jīte', isa yuhna sūhwa'ja's ya'ji'phu'čme'. ³²Nawa txā'wē ājawa'jsa yuja' jīna adx ju'gu we'wesa ūsa', ača' adxa' jiith txajx we'weni' isasa yuja'. ³³I'kwe'sxa' Juan tasxte paapējxya' kaaji'kwe, ača' txā' isa yuh pta'sxku adx kintewa. ³⁴Adxa' naa kiwetewe'sx adx ju'gu we'weni's peejxmeeth. Nawa i'kwe'sxa' Juan pta'sxni's jiiyā'jčxa', thēymée ewte neeyūuwa'ja's pakwekahñčxáath txā'jī. ³⁵Juana' eena'te kaafxi'ze'jwa'jsa's tuuthe'jsak yu', ača' i'kwe'sxa' wa'lmée i'kwe Juan pta'sxni's jxpa'gana ūsu' maz enčxáawa. ³⁶Nawa adxna tuuthe'jna isa pta'sxsa yu' mazwa ji'pthu, Juan pta'sxnite jxthaakwesa. Adx mjiini' adxna tuuthe'jna isa pta'sxsata'. Na'wē mjiith nawa adx Tata jxkaahñičxáatxthu txā'wē yu', Dxus kaahnisa yuh yu'ne' sūjkahn. ³⁷Txā'wēy adxna kaahsawa isak pta'sxi' adxa's tuuthe'jna. Txā'wētewa, i'kwe'sxa' bagačxte yuhwa txajx we'weni's iiwēse'jmeene'kwe, sa' txā'sa' iuiywameene'kwe. ³⁸Sa' txajx kaapiya'jni'swa i'kwe'sx ūuste ji'phmeene'kwe, txāasa i'kwe jxpa'gaya' ājā'čmée, adxa's Tata kaathewa. ³⁹I'kwe'sxa' jxpa'yajkx i'kwe leei', pčumée itxi' fxi'zewa'ja's ji'phuya'. Ača' txāa libru' adxa's pta'sxsafičxá'. ⁴⁰Makwe txā'wēčxawa, i'kwe'sxa' adx tasxte utxa'čmeei'kwe itxi' fxi'zewa'ja's ji'phuya'.

⁴¹Naa kiwete nasa adxa's tuuthe'jni's jxthāasu'čmeeth. ⁴²Adxa' i'kwe'sxtxi ew jiith, i'kwe'sxa' Dxusa's wedxi'čmée i'kwe. ⁴³Tata kaathe' yuwe'th, nawa i'kwe'sxa' adxa's jxpa'ga'čmée i'kwe. Nawa Dxus kaahnisamée vxite pa'jwača', txāa yu'sa' jxpa'gane'kwe. ⁴⁴¿Ma'wē yūučxa adxa's jxpa'gaya' ājaki'kwe, nasaa pwe'sx puutx ew tuuthe'jničxáana jxthāasčxa, Dxus teečxčxáasa tuuthe'jni yu'sa' jxpa'gameečxa'? ⁴⁵Adx Tata tasxte i'kwe'sxtxi ewmée yuwe ūswa'jsana sūjuwá'kwe adxa' txā'wēmeeth. Txā'wē i'kwe'sx ma'wēsatewa adx Tata tasxte pta'sxsa' Moisesi'čxá', i'kwe'sx nakwe wala ewčxáa we'we'i'kwe txāa. ⁴⁶Moises we'weni's jiyuwača', adxa's jxpa'gane'kwe, Moisesa' adxna'i'čxáak tuuthe'jna fxi'j naa pa'ga. ⁴⁷Nawa txajx fxi'jni's jxpa'gameečxa', ¿ma'wē adx we'weni's jxpa'gaya' ājaki'kwe?

Cinko mil nasatx Jesus sāl'jīni

(Mt 14.13-21; Mr 6.30-44; Lk 9.10-17)

6 ¹Txāa ensu' Jesusa' Galilea i'kh kuten u'kh, txāa i'kha's Tiberias jī'tx. ²Txā'wē naa kiwete kim yuhwa vxit-ya' ājanimeesa's kaavxya'ja'jna āča'satxwa nuycxhāčxhapa'ga, nasa wala kuh pkhaakhena Jesus e'stey ul'jtx. ³Ača' Jesusa' thāl'j vxična ul'jčxa kxtee kačxku txāa yakh ul'jusawe'sx yāl'jčxa. ⁴Txajū' Judiuwe'sx fxiesta Paskua en ājačku yu' txāa ensu'. ⁵Ača' nasa wala pkhaakhena yuhte uyčxa', Jesusa' Fxelipe's na'jīnak pējx: —¿Mtee ū' weyuukxtha'w nasa jxukaysatx puučwa'lj?

⁶Nawa Jesusa' Fxelipe ma'jítewa jiyuya'çxáak txā'wē pējx, ma'wē yūuwa'ja'swa jxuka jiyā'jçxawa.

⁷Aça' Fxelipe' na'wēk pas:

—Dos cientos peso pan weyçxa jxukaysatx pe'ltedeçxa peesu'swaçwa, āhmeena jíte!, ⁸Jesus yakh u'jusa Simon Pedro nyakh Adresa' na'wēk pta'sx:

⁹—Ayte teeçx kuē e'z wedx tahç cebada pan ji'phsa ūsa'. Nawa kxazçxáasa yuja' çāhma'k? jíte!, ¹⁰Jesusa' txāa yakh u'jusawe'sxtxi': Mkaaçxi'jwe jxukaysatx jīnak jxkaah. Aça' cinko mil piçthē'jsa kxaazkuēsay txaksu kaçxna skhēwtxi. ¹¹Aça' Jesusa' pantxi' jxpa'gaçxa', Dxusna weçxana'wa txāa yakh u'jusawe'sxtxi ūsu'sku. Aça' txāawe'sxa' kxaazkuēsaytxi puuçna skhēwtxi subapkaçx. Wedxnawa txā'wēytxi yūu, makwe ū'çxawa txikpkaçx.

¹²Txajū' jxukaysa txikna skhēwte', Jesusa' jxkaakh txāa yakh u'jusawe'sxtxi':

—Jxuka mepkhakhwe pe'la kijxasaatxi' kīhwa vxitukahmen jíte!, ¹³doce kanastate utatx pkhakh txāa tahç cebada pan kijxasaatxi'.

¹⁴Txā'wē Jesus yuuçxáa maa yuhwa ājanimeesa's vxitte uyçxa', nasa' na'wētx weçxana we'we:

—Naa yuuçxá' isa Dxus yuwe pta'sxsa yuh yu'ga, naa kiwete pa'jana jī'tx txāaga yu' jīna weçxaçxa', āadxijimée jxkaahwa'jsa ki'pxa'watx yu'. Aça' Jesus jiyuçxa', ¹⁵txāaçxáa txuteena u'kh thā'j vxiçte pa'j.

Īkh kajkwega Jesus u'juni (Mt 14.22-27; Mr 6.45-52)

¹⁶Çxhi'dxna kīinite', Jesus yakh u'jusawe'sxa' ĩkh pukate kīhçxa, ¹⁷barkote khēena'wa ĩkhuy ktejkana u'jtx Kapernaumte pa'jya'. Txā'wē jxuka çxhi'dxni yā'thewa Jesusa' sxawedna kīhmeyna, ¹⁸barko ĩkhuy u'jweçpkaçxha', wejxaa wala kiiteçxa ĩkha's seena' wala kēese'kh.

¹⁹Txā'wē seena' yuuçtewa ĩkh pxāhsu jxu'l'j u'jweççxa', Jesusa's ĩkh kajkwesu yuhte uytxi, sa' wala ūukhtxi. ²⁰Aça' Jesusa' na'wēk we'we:

—Ūukhnuwe, adxthu jíte!, ²¹wala weçxana jxpa'gatx barkote. Sa' yaakxnimeete naa dudtey ĩkh kutete pa'jtx.

Nasa' Jesusa's pakwení

²²⁻²⁴Kuskuskhē' Jesusa' kxtee meeyā'the', txāa yakh u'jusawe'sxwa meete', nasa' barkote khēena' u'jtx Kapernaum çxhabna Jesusa's pakweya'. Txā'wē Jesus yakh u'jusawe'sx teeçx barkote khēeçxa u'the', Jesus yu' txāawe'sx yakh u'jmeetewa jiyuçxane'ta pakweya' u'jna ūsu' ĩkh kuteju nasa neeyūusa'. Jesusa' Dxusna weçxaçxa pan puuçku txāa ja'date barko pa'jne'ta Tiberias çxhabuh yuusa, aça' txāatetx khēeçxa pakweya' u'j.

Û' cielujü kïisa

²⁵ Sa' ìkh kutete pa'jçxa Jesusa's uyçxa pëjxtxi:

—Idxa' çma'wënga ayte pa'j? jïte', ²⁶ Jesusa' na'wëk pas:

—Isath we'we', i'kwe'sxa' pana's txikpkaçx ù'çxaçxáa i'kwe txã'wë adxa's pakwé'. Nawa adx txã'wë maa yuhwa ãjanimeesa's vxitthu txã's yu' jiyuçxa txã'wë yu'çmeei'kwe. ²⁷ Txik ù'çxa fxi'zewa'jçxá's pakwewa'jme', wejxwa ù' bagaçxte yuhwa pçumée ìtxi kaafxi'ze'jwa'jsa's pakweewa'ja'. Aça' Dxus Nçxi'k Nasa Yuusa' txã'wë pçumée ìtxi fxi'zewa'ja's ùsu'nja, txã'wë yüuwa'ja's adx Tata' ùsku naa pa'ga jïk.

²⁸ Txã'jïte', na'wëtx pëjx:

—çMa'wë yüukxtha'w Dxus jxkaahnitxi' kxtey yuuna fxi'zeya'? jïte',

²⁹ Jesusa' pta'sxku:

—Dxus jxkaahnitxi' kxtey yuu wëeçxa', adxa's mpa'gawe, adxa' Dxus kaahnisath naa pa'ga jïk.

³⁰ Aça' ki'kin pëjxtxi:

—Idxa' Dxus kaahnisane'ga sühna kwe'sx ew jiyukahn açxha' çkïh kaavxya'ja'jya'waga? ³¹ Kwe'sx yaçgawe'sx manteywe'sxa' nasa u'pnimée kiwesu u'ljuçxa', ù' maná yaasesa's ù'tx. Aça' txã'wë yüuni's Dxus libroute na'wëk we'we': Dxusa' cielujü ù'a's puuçku jï'k. ³² Aça' txã'jïte', Jesusa' na'wëk pas:

—Isath we'we', cielujü ù'a's Moises puuçme'. Cielujü ù'a's adx Tatak puuç. ³³ Aça' Dxus puuçni ù' cielujü kïisa' naa kiwetewe'sxtxi pçumée ìtxi kaafxi'ze'jwa'jsa'.

³⁴ Txã'jïte', na'wëtx pëjx:

—Kwe'sxtxi jxpe'jsa, cielujü kïisa ù'a's pejka puuçune'ga kwe'sxtxiwa jïte', ³⁵ Jesusa' pta'sxku:

—Û' ìtxi kaafxi'ze'jwa'jsa' adxthu. Aça' maazkuéesawa adx tasxte pa'jsa' bagaçxte yuhwa wëemeetxna. Sa' txã'wëy adxna ùuste jxpa'gasa' peena yu' yü'wëemeetxna. ³⁶ Adxa' kimçxawa i'kwe'sxtxi pta'sxyã'th, nawa i'kwe'sxa' makwe uyçxawa, adxa's cielujü kïisana sÿju'çmée i'kwe. ³⁷ Makwe i'kwe'sx yu' adxa's jxpa'gameetewa, adx jxpe'khan Adx Tata dukhnisawe'sx yu' jxukaysa adx tasxteçxaçxáa pa'jatxna. Aça' maawa adx tasxte pa'jsatxi' ahçemée weçxana jxpa'ga'nja. ³⁸ Txã'wë cielujü kïhçxawa peekx adx ùus yaakxnìçxá's kxtey yuuya' yuwe'çmeeth. Adx Tata ma'wë yüukaathe' txã'sçxáanath kxtey yuuya' yuwé'. ³⁹ Adx Tata' adx jxpe'khan dukhnisatxi' teeçxçxáa yuhwa ivxiitu jxthãasu'çme', kxajïi adxa' nmeh ente' ki' ìtxi vxitu'nja. ⁴⁰ Adxna kaahsa jxthãasni' na'wé': maawa jxukay Dxus Nçxi'ka's ùuste jxpa'gasa' pçumée ìtxi fxi'zewa'ja's jï'phu jxthãasu'k. Txãa pa'ga txã'wë ùuste jxpa'gasatxi' adxa' nmeh ente' ki' ìtxi vxitu'nja.

⁴¹ Txã'wë adxïi ù' cielujü kïisath jïpa'ga judiuwe'sxa' Jesusa' açewe'weya' takhtxi:

42—¿Naa pihçíi Jose nçxi'kmeená'? Sa' ¿ma'wëga cielujũ kïisath jïna we'we'? Txã'jïkahmeníi kwe'sxa' txajx neywe'sxtxi ew jïitha'w.

43Txajũ' Jesusa' txã'jïni's jiyuçxa', na'wëk we'we:

—Maa yuhwa txã'wë açewe'wen úswa'lj jï'phmeei'kwe. 44Adxa' Tata jxkaahnisath açã' txãáfi adx tasxte kuutxa'the yuuçxáa txãatxi' jxukaysatx nmeh ente' ítxi vxitu'nja. 45Txã'wë yúuwa'lja's Dxus yuwe pta'sxsa librute na'wë fxi'jni úsa': Dxusa' kaapiya'jana jxukaysatx ¿jï'çmeená'? Kxajíi maawa adx Tata kaapiya'jni's wëse'jçxa txajx jxkaahnitx kxtey yuusa yuuçxáa adx tasxte pa'jatxna.

46Maa yuhwa Dxusa's iuyuemeeta'. Adx yuuçxáa Dxus tasxu yuusath na' txã'sna iuythu. 47Adxa' isath we'we': Adxa's jxpa'gasa' pçumée ítxí fxi'zewa'ja's jï'phutxna, 48txãasa pçumée ítxí kaafxi'ze'jwa'jsa ú'a', adxthu. 49Kwe'sx yaçga manteywe'sx nasa u'pnimée kiwesu u'juçxa' maná yaasesa's ú'çxawa, pejka uu ena's jï'phutx. 50Nawa adxa' cielujũ kïisa ú'a'sthu pta'sxi', txã'sna ú'çxa' uukahmen. 51Adxíi cielujũ kïisa ú' ítxisath. Maawa txãa ú'a's ú'sa', bagaçxte yuhwa uumée ítxi fxi'zewa'ja's jï'phutxna. Açã' ú' adx úsu'nja txã' adx kakwe', kxah maa nasawa pçumée ítxi fxi'zewa'ja's jï'phukahna txã'wë adx kakwe's úsu'nja.

52Txã'jïte', judiuwe'sxa' na'wëtx puutx ya'paapëyi':

—Naa piçthë'ja' ¿ma'wë txajx kakwe's kwe'sxtxi puuçya' ãjaxk? jïte', 53Jesusa' na'wëk pta'sx:

—Adxa' isath we'we': Dxus Nçxi'k Nasa Yuusáa kakwe's ú'çxa txajx eenawa tudxmeeçxa yu', pçumée ítxi fxi'zewa'ja's jï'phumeene'kwe. 54Açã' maawa adx kakwe's ú'çxa adx eenawa tudxçxa yuuçxáa pçumée ítxi fxi'zewa'ja's jï'phutxna, kxah txã'wë yúusatxi' adxa' nmeh ente' ítxi vxitu'nja. 55Txãa pa'gatey adx kakwe' peena yu' kwëeje'jmeena, açã' adx eewa peena yu' kxü'wë'jmeena. 56Maawa adx kakwe's ú'na txã'wëy adx eenawa tudxsa', bagaçxtewa adx yakh ih úsuna, açã' adxwa txãa yakh ih úsu'nja. 57Tata' adxna kaakh txã' ítxísa'. Txãa pa'ga adxwa ítxíisath. Açã' adxwa Tata yakh ma'wë ítxísatka'w, txã'wëy ítxí fxi'zewa'ja's jï'phutxna maawa adx kakwe's ú'sa'. 58Cielujũ kïisa ú'a'sthu pta'sxna we'we'. Kwe'sx yaçgawe'sx manteywe'sxa' maná yaasesa's ú'çxawa pejka uu ena's jï'phutx. Nawa naa ú'a' txãa maná na'wësama'. Maawa naa ú'a's ú'çxa', bagaçxte yuhwa pçumée ítxí fxi'zewa'ja's jï'phutxna jïnak pta'sx.

Jesus we'weni' pçumée ítxí kaafxi'ze'jwa'jsa

59Jesusa' txã'wëk pta'sx Kapernaumte judiuwe'sx pkhaakhenite. 60Açã' txã'wë kaapiya'jni's wëse'jçxa', txãa yakh u'jusawe'sx maáfi yu' na'wëtx we'we txãawe'sx pwe'sxçxáa:

—Na'wë pta'sxni', wala thëya' jiyuwa'lj, açã' ma'wë yuhwa ya'jiyu'çme'.

61Nasa jiyumeeçxa kuh jwed we'wena úste Jesusa' jiyuçxa', na'jïk:

—Adx pta'sxni's jiyumeeçxa úusçxa yaaki'wá'kwe. 62Txã'wë jiyumée úsçxawa, Dxus Nçxi'k Nasa Yuusa' cielun teekaçte uyçxa', ¿maa sújuki'kwe?

63 Na'jĩ'th na: Dxus Espiritu' itxi kaafxĩ'ze'jsa', aça' txãaçá'sthũ we'wena pta'sxi', naa kiwete ũ'çxa itxĩ fxi'zeni's pta'sxi'çmeeth. Adxa' isath pta'sxi' Dxus yakh itxĩ fxi'zewa'ja's. 64 Nawa maafĩ yu' isane' pta'sxi' sũju'çmeei'kwe jĩk.

Jesusa' dxiikhẽy jiiyã'kh yu' maa txã'wẽ açeçtewa, sa' kim ikhkahn dukhwa'jsatewa, txãa pa'gak dxiikhẽy txã'jĩna we'we.

Sa' ki' we'weçxa':

65 —I'kwe'sx maafĩ yu' açeçte jiiçxath adx Tata kuutxa'the yuuçxáa txãawe'sxa' adx tasxte pa'jatxna jĩna we'we.

66 Jesus txã'wẽ pta'sxteçxáa, txãa yakh u'jusawe'sx maafĩ yu' txuteena u'jtx. 67 Txajũ' Jesusa' pẽjxku docesatx:

—¿I'kwe'sxwa adxa's txuteeçxa u'jya'wakwe'? jite!, 68 Simon Pedro' na'wẽk pas:

—Kwe'sxa' ¿kim yakh u'jwekxtha'w? Idx yuuçxáa pçumée itxĩ fxi'zewa'ja's pta'sxna ũsgu aça'. 69 Txãa pa'gatey kwe'sxa' idxa's jiyutha'w, txãasatha'w idxa' Kristo, Dxus itxisa Nçxi'kne'ga sũju'.

70 Txã'jite!, Jesus we'weçxa':

—Adxa' i'kwe'sx docesatx txhitxhçxa pa'yatewa, teeçxsa' eçxthẽ'j jĩia' jĩnak pta'sx.

71 Jesusa' Simon nçxi'k Judas Iskariote's we'weçxak txã'jĩ, Judas txã'wẽ docesatewe'sxçxawa Jesusa's ikhkahn dukhya'wak yu' naa pa'ga.

Jesusa' Dxus Nçxi'kna sũju'çmeeta' Jesus nyakhwe'sxa'

7 1 Txajũ' Jesusa' Galilea kiwesuk u'ju'. Judea kiwesu yu' u'ju wẽeme', kxteea' judiuwe'sx ikhya' pakwenatx ũsu' naa pa'ga. 2 Judiuwe'sx fxiesta wa' vxitni en ajaçku yu', 3 aça' Jesus nyakhwe'sxa' na'wẽtx we'we:

—Ayte ũsmée Judea kiwen me'j, kxah nasa iidx ju'guh ũsawe'sx uyuutxna idx na'wẽ yũ'g txã'sa's. 4 Maawa áate tuuthe'j jxthãasuççxa', paaçsu u'jumeena. Na'wẽ kimwa ajanimeesa's kaavxya'ja'g na' txãatxi' áate mkaavxya'j maawa uykahn jĩnatx we'we.

5 Nyakhwe'sxĩ yuhwa Dxus Nçxi'kna sũju'çmeene'ta, txãasatx ũuste jxpa'gameeçxa' txã'wẽ we'we.

6 Txajũ' Jesusa' na'jĩnak pta'sx:

—Adx u'jwal'j ena' áhmeya', nawa i'kwe'sx yu' kĩh entewa u'jya' ewuçxáane'kwe. 7 Naa kiwetewe'sxa' i'kwe'sxtxi' açe'çmeeta', nawa adxa's açe'tx, txã'wẽ txãawe'sx ewmée yũuni's áateth pta'sxi' txãa pa'ga. 8 I'kwe'sxa' fxiestan me'jçxáawe. Adxa' yuhme'nja, adx u'jwal'j en áhmeya' aça'.

9 Txã' we'weçxa', Jesusa' Galileatee neeyũuk.

Jesus fxiestan u'jni

10 Nawa txajx nyakhwe'sx u'jni e'su', Jesuswa fxiestan u'kh, kimwa jiyunimeete. 11 Aça' judiuwe'sxa' na'jĩnatx txãa fxiestate Jesusa's pakwena ũsu':

—¿Mtee ũski txāa piçthê'ja'? jīna.

¹²Txāa fxiestate! Jesusa's nuywe'wesa yuuçxáatx susna ũsu! Vxitefi yu': Jesusa' ewsa yuja' jīçpkaçxha', vxite yu': Ewmeesa', nasatx ĩsxiina u'jusaçxá' jīnatx nuywe'we'.

¹³Nawa Jesusa's ew we'wesa yu' maa yuhwa āate yu' we'weçmeeta', judiuwe'sxtxi ũkhçxa.

Fxiesta ente Jesus kaapiya'jni

¹⁴Fxiesta pçuuna u'jweçpkaçxha', Jesusa' dxuus yatte u'kaçxa kaapiya'jya' takhku. ¹⁵Aça' judiuwe'sxa' kuh yajkxnatx ũsu' txāawe'sx pwe'sxçxáa na'jīna:

—Naa piçthê'ja' çma'wēçxa txakwe wala jiina, maa kaapiya'jsa yakh yuhwa u'jusameeçxawa? ¹⁶Aça' txā' we'weni's jiyuçxa', Jesusa' na'jīnak pta'sx:

—Na'wēth kaapiya'ja' txā' adx peekx yajkxçxa kaapiya'jnisame'. Adxna jxkaakh txajx we'weni'sthu kaapiya'ja'. ¹⁷Maawa Dxus jxthāasni's kxtey yuwa'jsa ũçxa', naa kaapiya'jni's jiyuna Dxus we'wenitewa, meeçxa' adx peekxçxáa yajkxçxa kaapiya'jnitewa. ¹⁸Peekíuçxáa yajkxçxa we'wesa', jxtuhthesa yuwa'jçxá'sku jxthāasu'. Nawa Dxusçxáana tuuthe'jsa', Dxus jxkaahniçxá'sku isa we'wena pta'sxi'.

¹⁹Moisesa' leya's fxi'jçxa ç'ikwe'sxtxi ũsyuhmeena' wakx? Txā'wētewa i'kwe'sxa' maa yuhwa ley jxkaahni's kxtey yu'çmee'ikwe. Txāasa i'kwe adxa's ikhya'çxáa yaaki' jīte', ²⁰nasa' na'wētēx pas:

—Eçxthē'j yakh ũsne'ga. ¿Kimga idxa's ikh wēje'?

²¹Txajū' Jesusa' na'jīnak we'we:

—Ki'swal'j ente teeçx nasa āça'sa's nuykatxhith txāa pa'gaçxáa i'kwe txakwe susya' kiite. ²²Nawa i'kwe'sx yu' ki'swal'j entewa luuçx pihçtxi cirkuncidaī'i'kwe, Moises jxkaahni's nwēese'jçxa. Naa kxah i'kwe āça'sa's adx nuykatxhini yu'sa' txakwe susu'. (Nawa ew jiyute yu', Moises txā'wē cirkuncidāywal'ja's jxkaahna takhme', jwee yaçgawe'sxtxi txā'wē jxkaah.) ²³I'kwe'sxa' Moises leya's kxtey yuuya' sūhçxa i'kwe ki'swal'j entewa cirkuncidaī' luuçx pihçtxi'. Sa' çkījxa'kwe txakwe ũuççxa' adx teeçx piçthē'j āça'sa's ki'swal'j ente nuykatxhiçxa nvxiitpa'gaçxáa? ²⁴I'kwe'sxa' ew jiyumey yu' fxiyfxiyçxáa yajkxna we'wenuwe, naasáa ew jiyuçxa yuuçxáa txā'wē dxih yu'ga sūhna we'wewa'ja' jīnak pta'sx.

Dxus tasxu yuusa

²⁵Txajū' Jerusalente nasa maafí yu' na'wētēx puutx paapēyi':

—¿Naa piçthē'ja'sií ikhya' pakwe'çmeetxna'? ²⁶Txā'wē pakweeçtewa, nasaa ksxavxyte yajkxyajxmée we'wena ũsa', kim yuhwa mal'jīnimeete. Meeçxa' çkwe'sx npiiçthē'jwe'sxa' ew yuh jiyuwá'ntakx naa piçthē'ja' Dxus tasxu yuusa Kristotewa? ²⁷Naa piçthē'ja' majuwe'sxtewa jiitha'w,

aça' isa Dxus kaahni Kristo dxihwaça', txã'sa' txãa kiwejuwe'sxa' jîni yuumeena jînatx we'we'!

²⁸ Aça' Jesusa' dxuus yatte kaapiya'jna ūsí, sus we'weçxa na'jîk:

—Adxa'sa' jiiyuji'kwe majūwe'sxtewa. Nawa adxa' peekx yuu wēçxaçxáa yuwe'çmeeth, Dxus kaahni ayte ūsthu. Txãa yuuçxáa isa we'wesa' txãa kaahsa's yu' i'kwe'sxa' jiyu'çmeei'kwe. ²⁹ Txã'sa' adx yuuçxáa jiith, txajx tasxu kaahni ayte ūsthu naa pa'ga jîk.

³⁰ Txã'jîte!, tudçxa preesu jxūna u'j wēetx, nawa kim yuhwa tud yu' meeta', txã'wē yūuwa'j en āhmeyne' yu' naa pa'ga. ³¹ Txã'wētewa, wala kuh jiyutx Jesusa' kimtewa sa' na'jî'tx:

—Dxus tasxu yuusa Kristo kīhçxa', çnaa piçthē'the jxthaakwe kijkihwa kaavxya'ja'jya' ājāma'k? jînatx we'we'!

Jesusa's preesu'jya' kaahni

³² Nasa txã'wē Jesusa's tuuthe'jna ūste fxariseowe'sxa' wēse'jçxa', sacerdote npiçthē'jwe'sx yakh puutx we'weçxa', dxuus yat thegsawe'sxtxi kaahntx Jesusa's tudçxa jxūna yuukahn. ³³ Aça' preesu'jya' kaahni's jiyuçxa', Jesusa' na'jînak we'we':

—Adxna kaahsa tasxna sxawedna u'jya'wath na' i'kwe'sx yakh txaçxmeeçxáa pi'kxna ūsya'wath. ³⁴ Aça' adxa's pakweçxawa uymeene'kwe, txãa pa'gatey adx u'jweçthu kxte' pa'jya' ājāmeene'kwe naa pa'ga.

³⁵ Txajū' judiuwe'sxa' na'wēttx puutx ya'paapējxya' takh:

—Naa piçthē'ja' çmtee u'the txã'wē kwe'sxa' uymée yuukxtha'w? Meeçxa' çjudiuwe'sx ūsta' vxite kiwesu griegowe'sx ksxavxysu aça' txãa griegowe'sxtxi wáa pta'sxya' u'jweçnakx? ³⁶ Adxa's pakweçxawa uymeene'kwe, txãa pa'gatey adx u'jweçthu kxte' pa'jya' ājāmeene'kwe naa pa'ga jînak we'we' sa' çma'jçxaki'k txã'wē we'we'? jî'tx.

Yu' pçuwa'jmeesa

³⁷ Fxiesta pçuuya' nmeh en yuuçte', Jesusa' yujuçxa na'jînak sus we'we':

—Maawa yū'wēesa ūsçxa', adx tasxte myuhwe tudxya'. ³⁸ Adxa's ūuste jxpa'gasatxi's txāawe'sx ūuste yu' pçuwa'jmeesa kasehna nes yuuna, Dxus librute we'we'k txã'wē.

³⁹ Jesusa' txã'jîna we'weçxa', txã'sna yaakxsa' Dxus Espiritu's jxpa'gawa'ja'sku pta'sxna txã'jî'. Txãa ensu' txãa Dxus Espiritu' pa'jmeyku yu', Jesus yuu cielun tejkameyku yu' naa pa'ga.

Jesus kimtewa jiyumeçxa nasa fxiyfyiy yaakxni

⁴⁰ Nasa wala kuh pkhaakhena ūsnite maaíi yu' Jesus pta'sxni's wēse'jçxa', na'wēttx we'we':

—Naa piçthē'ja' isa Dxus yuwe pta'sxsa yuhna jî'tx. ⁴¹ Aça' vxite yu' na'jî'tx:

—Na' Dxus tasxu yuusa Kristona jī'tx. Nawa vxite we'weçxa':

—Galileajū yuja', ¿Kristo' kasehma'k? ⁴²Txā'wēmeete'fik Dxus librute we'weçxa': Kristo' jxkaahsa Davxid nwe'sxçxa', Davxid upxni çxhab Belentey kasejena jī'k jīnatx we'we'.

⁴³Txajū' maaíi yu' Jesus ju'gu we'wenatx neeyūu, aça' vxite yu' Jesusa's ahçenatx neeyūu. ⁴⁴Aça' maaíi yu' preesu'jçxa jxūna u'j wēçxawa, maa yuhwa txā'wē yu' yūumeeta'.

Judiu npiiçthē'jwe'sxa' Jesusa's jxpa'gameeta'

⁴⁵Dxuus yat thegsawe'sxa' ki'kin sxawedna pa'the', sacerdote npiiçthē'jwe'sx vxite' fxariseowe'sxa' na'jīnatx pējx:

—¿Mjīitekwe txāa Jesusa's preesu'jçxa jxūna yuwe'çmēe? jīte', ⁴⁶txāawe'sx paşçxa':

—Bagaçxte yuhwa naa piçthē'j na'wē zhiçxkwe pta'sxi'k txā'wēsa yu' iiwēse'jmeetha'w. Txāasatha'w preesu'jmēe.

⁴⁷Txajū' fxariseowe'sxa' wēesxū we'weçxa', na'jītx:

—¿I'kwe'sxwa vxitesa na'wēy ya'ixiijaçwá'kwe? ⁴⁸¿Kwe'sx npiiçthē'jwe'sx meeçxawa fxariseowe'sx maaçxá' txāa piçthē'j kaapiya'jni's jxpa'gaçxa ūste i'kwe'sxa' jīikwe'? ⁴⁹Nawa txāa piçthē'ja's nwēese'jsa' leya's jiimeesata' na' iiméh seena' ewmeesa nwe'wewa'jmeesa yā'tha'.

⁵⁰Txā'jīte', kxtee ūssa teeçx fxariseo Nikodemo yaasesa Jesus tasxte kus pa'jya' u'ju'ga txāa we'weçxa na'jīk:

⁵¹—Yuuwesa's pa'yaçxa pējxmey yu', kastigāyya' ajame'nja'w, kwe'sx leya' txā'wē jxkaaja'çme' jīte', ⁵²txāawe'sx paşçxa':

—¿Idxwa Galileajūwe'sxwá'ga? Dxus libru's mtheg wakx, sa' jiyune'ga: Galileajū yu', bagaçxte yuhwa Dxus yuwe pta'sxsa iikasehmeeta' jīnatx açewe'we. ⁵³Txā'jīçxa', puutx txuteena u'jtx txāawe'sx yatna.

Teeçx u'ya's Jesus peltunāyni

8 ¹Naapkaçxha' Jesusa' Jerusalenu kasehçxa Oliwos vxiçnak u'j. ²Sa' kuskus kusíiçxáa dxuus yatte sxawedna pa'kh. Txajū' nasa jxukaysa utxaate', Jesusa' kaapiya'jya' kaçxku. ³Txajū' ley kaapiya'jsawe'sx vxite' fxariseowe'sxa' teeçx u'y kazx yūuna ūste kpajkxçxa Jesus tasxte nuypa'jtx sa' pxāhte txahçxa' ⁴na'jītx:

—Kaapiya'jsa, naa u'ya's kazx yūuna ūsíin kpajkxtha'w. ⁵Txā'wē yūusatxi' Moises leya' kwet wāatatahçxak ikhkaja'. Aça' idxa' çma'wē jxkaajaki'g? jīnatx pējx. ⁶(Kxtee āhmēe we'wete', paatxhī'khya' sūhçxatx txā'wē paapēyi'.)

Nawa Jesusa' kīiçhuçxak kiwete kuseju fxi'ja'. ⁷Aça' maz uswa jwee pējxte', Jesusa' kaphuteçxa na'jīk:

—I'kwe'sxa' maaçxáawa pkal jī'phmeesa ūsçxa', txāa khuē'y naa u'y kakwete kwet mwāatahwe jīçxa', ⁸ki' kīiçhuçxa kiwete fxi'kh. ⁹Aça'

txã'jĩni's wẽse'jçxa': Kwe'sxwa pkalsane'tka'w sũhçxa, kasehna u'jtx teeçxteeçxçah, nyafxte' jwee ïsxsax khuẽ'ytxi kaseh. Txã'wẽ jxuka kasehna u'the', txãa u'yçxáak kxtee neeyũu Jesus ùsnite. ¹⁰Aça' Jesusa' kaphuteçxa ley kaapiya'jsawe'sx jxuka kasehna u'jnite' txãa u'yçxáa ùste uyçxa', na'jĩk:

—I'kwena paatxhĩ'khsawe'sxa' çmteeta yuu? çMaawa i'kwe's ewmeete nvxiht-ya' ãjãmeewá'nta? jĩte', ¹¹txãa u'ya' na'jĩnak pas:

—Maa yuhwa ãjãmeeta' jĩte', Jesusa' na'jĩk:

—Adxwa i'kwe's ewmeete nvxihtme'nja. Me'jwe, nawa peena yu' ewméé yũuna u'junuwe jĩk.

Jesusa' eena'te kaafxiz'e'jsa

¹²Ki'kin nasa pkhaakhete', Jesusa' na'jĩnak we'we:

—Adxa' eena'te kaafxiz'e'jsath, aç'a' maawa adx yakh yuusa' eena'te fxi'zewa'ja's jiphutxna, sa' bagaçxte yuhwa çxhi'dxte fxi'zemeetxna.

¹³Txajũ' fxariseowe'sxa' na'wẽtx we'we:

—Idxa' peekíçxáa ya'tuuthe'jna ùsgu aç'a' txã' kxul yuhna jĩte', ¹⁴Jesus pasçxa':

—Makwe peekíçxá'ntka ya'tuuthe'je', nawa adx pta'sxni' ïsxiinisame'. Txãa pa'gatey adxa' jiith majũwe'sxçxa' ki' maa dxi'j u'jweççxawa. Nawa i'kwe'sxa' jiiiméé i'kwe adx majũwe'sxtewa sa' maa dxi'j u'jweçtewa.

¹⁵I'kwe'sxa' peekx ùus yaakxnijũçxáa i'kwe txã'wẽ we'we', adx isa we'weni's jiyumey. Nawa adxa' jiimeeçxa yu' we'we'çmeeth. ¹⁶Nasa ma'wẽsatewa isa jiyuçxath we'we', Tata' adxa's kaakh txãak ma'wẽ yũuwa'ja'swa adxa's pu'çxhi' txãa pa'ga. ¹⁷I'kwe'sx leyte' na'jĩ'k: Yuwe's jiisa e'zĩ txãa na'wẽçxaçxáa we'wenisaçxáa selpiina jĩ'k. ¹⁸Aça' isa we'wesa teeçxsa' adxíçxáath. Aç'a' vxite' adxna kaahsa Tatafíçxá'.

¹⁹Txã'jĩte', fxariseowe'sxa' na'jĩtx:

—Iidx Tata' çmtee ùsna? jĩte', Jesus pasçxa':

—I'kwe'sxa' adxa's jiyu'çmeei'kwe, sa' adx Tatanawa jiyu'çmeei'kwe. Adx kimtewa jiyuwaça', adx Tatanawa jiyune'kwe jĩnak pta'sx.

²⁰Dxuus yatte ofxreda ãsxni kaja pukate kaapiya'jna ùsçxa', txã'jĩnak pta'sx Jesusa'. Nawa maa yuhwa preesu'jya' ãjãmeeta', preesu'jwa'j en ãhme'ne' yu' naa pa'ga.

Adx ùsnite' pa'jya' ãjameene'kwe

²¹Jesusa' ki'kin we'weçxa na'jĩk:

—Adxa' u'jweçthu, aç'a' i'kwe'sxa' makwe pakweene'kwe, nawa adxa's uymey i'kwe'sx pkalte uune'kwe. Txãasa adx u'jweçthu kxteea' pa'jya' ãjameene'kwe jĩna we'wete', ²²juidiwe'sxa' na'jĩtx:

—Meeçxa' çpeekx kusetey uuya'wawáanakx, txãasa wá' adx u'jweçthu kxteea' pa'jya' ãjameene'kwe jĩna we'we'kx? jĩte', ²³Jesusa' pta'sxku:

—I'kwe'sxa' aytewe'sxi'kwe, naapkaçxha' adxa' êejüwe'sxthu. Aça' i'kwe'sxa' naa kiwetewe'sxi'kwe, naapkaçxha' adxa' naa kiwetewe'sxmeeth. ²⁴Txã'wëçxáíith i'kwe'sx pkalte uune'kwe jina pta'sxi'. Txã'wë Dxus kaahnisa' adxçxáath jina pta'sxtewa jiyumée yã'jçxa', i'kwe'sx pkalte uune'kwe jina pta'sxte', ²⁵na'ljinatx paapêjx:

—Txã'wëçxa' çidxa' kimga? jite', Jesus pasçxa' na'jik:

—Adxa' kimçxawa nyafxíi pta'sxyã'th. ²⁶Txãasa wala pta'sxwa'j ji'pthu i'kwe'sx ma'wësatewa áate pta'sxna, txãa pa'gately adxna kaahsa' ísxiisame', aça' adxa' txajx we'weni's wëse'jçxa txã'wë íçxáath pta'sxi' maawa jiyukahn jínak we'we.

²⁷Txã'wë Dxusa' adx Tata' jina Jesus pta'sxtewa jiyumeeta'. ²⁸Txãa pa'gak Jesusa' na'jina we'we:

—I'kwe'sxa' Dxus Nçxi'k Nasa Yuusa's êete txahçxa yuuçxáa jiyune'kwe kimtewa, sa' peekxçxáa yu' we'wemée, wejxwa Tata kwe'we'jniçxá'sne' kaapiya'j sũjune'kwe. ²⁹Txãa pa'gately adxna kaahsa', adx yakh ih úsa', Tata' adxçxáa yu'sa' nvxiitu'çme', txajx jxthãasniçxá'sthu kxtey yu' naa pa'ga jik.

³⁰Txã'jina we'wete', nasa kuhsa Jesus ju'gu yuutx.

Ewmeete fxi'zesa vxite' ewmeejü nwe'wenisa

³¹Txajü' Jesusa' txajx ju'gu yuusaawe'sxtxi' na'jínak pta'sx:

—Adx kaapiya'jni's jxpubamée nwëese'jçxa', adx nasa yuuçxa ³²ewsa's jiyune'kwe, aça' txãa ewsa' ewmeesajü nwe'wena jite', ³³txãawe'sxa' na'wëtx pas:

—Kwe'sxa' Abraham ji'tha'w, sa' bagaçxte yuhwa ewmeete yu' fxi'zesameetha'w. Aça' idxa' çma'wëga ewmeesajü nwe'weni yuune'kwe jina we'we'? jite', ³⁴Jesusa' pta'sxku:

—Isath we'we', maawa ewmée yüuna fxi'zesa', ewmeete fxi'zesata'. ³⁵I'kwe'sxa' peekx jii i'kwe: selpisa' yat namu na'wësamae', naasáa peekx nçxi'k yuuçxáa yat namu na'wësa'. ³⁶Txãa pa'ga yat namu na'wësa Dxus Nçxi'k txã'wë ewmeesajü nwe'wete yuuçxáa, isa ewmeete fxi'zesamée yuh yuune'kwe. ³⁷I'kwe'sxa' Abraham ji'thewa jiith, nawa adxa's ikh wëje'i'kwe, adx kaapiya'jni's nwëese'j wëemeeçxaxçáa. ³⁸Adx Tata kwe'we'jniçxá'sthu pta'sxi', naapkaçxha' i'kwe'sxa' i'kwe'sx tata jxkaahniçxá's i'kwe kxtey yu' jite', ³⁹txãawe'sxa' na'wëtx pas:

—Kwe'sx tata' Abrahamana' jite', Jesus pasçxa':

—Abraham luuçxwaçala', Abraham na'wëy yüune'kwe. ⁴⁰Txã'wëwëwë, adxna ma'wë Dxus kaapiya'the', txã'sçxáath isa pta'sxi'. Nawa i'kwe'sxa' adxa's ikhya' yuuçxáa i'kwe pa'pçxu'. Abrahamana' bagaçxte yuhwa txã'wë yüume'.

⁴¹I'kwe'sx tata ma'wë yüute', i'kwe'sxwa txã'wëy i'kwe yü' jite', na'wëtx pas:

—Txã'jikahna', kwe'sxa' çptamunimeesa luuçx wá'ntka'w? Kwe'sxa' teeçx tataçxáa ji'ptha'w, txã' Dxusa' jite', ⁴²Jesusa' na'jínak we'we:

—Isa Dxusa' i'kwe'sx tatawaça', adxa's ahçemeene'kwe, adxa' Dxus tasxu kaahnith yuwé' txāasa ayte ūsthu. Adxa' peekçxáa yu' yuwe'çmeeth, adxa'sa' Dxusku kaah. ⁴³Na'swa adx kaapiya'jni's jiyu'çmeei'kwe, txā'wě adx we'weni's nwēese'je'çmeei'kwe, txāasa i'kwe jiyu'çmée. ⁴⁴I'kwe'sx tata', eçxthē'ja', aça' i'kwe'sxa' txajx luuçxi'kwe. Txā'wěçxaí i'kwe txajx jxthāasni's kxtey yuu wēje', eçxthē'ja' nyafxiitey nasaa kiikhe'jsa' naa pa'ga. Eçxthē'ja' bagaçxte yuhwa ewsa's yū'çme', sa' bagaçxte yuhwa isa we'we'çme'. Txāa yuu txā'wēesana na' īsxiinaçxáak we'we', sa' kaaīsxiija'jsa'. ⁴⁵Nawa adx isa we'weni yu's nwēese'je'çmeei'kwe. ⁴⁶I'kwe'sxa' çmaaça' adxa's pkalsa' jīna ukhe'jya' ājama'kwe? adxa' isasaçxá'sthu pta'sxi' aça'. Adx isasa's kaapiya'jaçte', çma'wētekwē adx we'weni's nwēese'je'çmée? ⁴⁷Dxus luuçxa' Dxus we'weni's nwēese'je'tx. Nawa i'kwe'sxa' nwēese'je'çmeei'kwe na' Dxus luuçx meei'kwe jīk.

Abrahan meetey Kristo ūsyā'kh yu'

⁴⁸Txajū' judiuwe'sxa' Jesusa's na'wētç açewe'we:

—Idxa' Samariajūwe'sxgu, txāasa eçxthē'j yakh ūsgu aça' isatha'w txā'jī' jīte', ⁴⁹Jesusa' na'wēk pas:

—Adxa' eçxthē'j yakh ūsmeeth, naasáa adx Tata's tuuthe'jsaçxáath. Nawa i'kwe'sxa' adxa's açe'i'kwe. ⁵⁰Adxa's weçxana tuuthe'jni's pakwe'çmeeth. Nawa teeçx ūsa' adxa's tuuthe'jsa txā' adx ma'wēsatewa jīa'. ⁵¹Isath we'we': Adx we'weni's kxtey yuusa', bagaçxte yuhwa uu ena's jī'phumeetxna.

⁵²Txā'jīte', judiuwe'sxa' na'wētç we'we:

—Āçxhtha'w wejç ew jiyu, eçxthē'j yakh ūstewa. Abrahana' uuk sa' Dxus yuwe pta'sxsawe'sxwa uutx. Naapkaçxha' idxa' na'jī'g: Maawa adx we'weni's kxtey yuuçxa', bagaçxte yuhwa uu ena's jī'phumeetxna jī'g. ⁵³Kwe'sx yaççawe'sx Abrahana' uuk sa' Dxus yuwe pta'sxsawe'sxwa uutx, aça' idxa' ¿Abrahante jxthaakwesa wá'ga? jīte', ⁵⁴Jesusa' na'wēk pas:

—Adxíçxáa ya'tuuthe'jna pta'sxi'nja na' txā' selpimeena. Nawa adxa's tuuthe'jsa' adx Tata' txā's i'kwe kwe'sx Dxusa' jīna we'we'. ⁵⁵Nawa i'kwe'sxa' txāa Dxusa's jii yuuwa meei'kwe. Nawa adxa' txā'sa' ew jīith. Txā'wē txā'sa' ew jiiçxa jīimeeth jī'nja na', i'kwe'sx na'wēy iisxihsa yu'nja. Nawa adxa' īsxiimée Dxusa's jīith, sa' txajx jxkaahni's kxteythu yu'.

⁵⁶I'kwe'sx yaççawe'sx Abrahana' adx naa kiwete pa'jwa'ja's jiyuçxa', wala weçxana yajkxku, sa' kxtey yuuni's jiyuçxa' wejxku wala weçxa.

⁵⁷Txā'jīte', judiuwe'sxa' na'wētç weeçx we'we:

—Idxa' cinkwenta anxu yuhwa mée jī'phgu, sa' çma'wēga txā'wē Abrahana's uy? jīte', ⁵⁸Jesus pasçxa':

—Isath we'we', Abrahan meeín, adxa' ūsyā'th yu'.

⁵⁹Txā'jīte', judiuwe'sxa' ūusaçxaçxa', Jesusa's kwet wāatatajxa'watx yu'. Nawa Jesusa' txāawe'sx ksxavxysuy dxuus yatu kasehna u'kh, kim yuhwa jiyunimeete.

Teeçx piçthê'j uyya' âjasame's Jesus yu'çe'jni

9 ¹Jesusa' u'jweççxa', teeçx piçthê'j naa kiwete upxhí uyya' âjasame'sku puutx uy. ²Aça' txãa yakh u'jusawe'sxa' Jesusa's na'wêtx paapêjx:

—Naa piçthê'ja' çkîh yuupa'gaki'k txã'wê yafx ji'phmêe upxna ũsu'? çTxajx pkalpa'ga ma'k txã'wê nxus ji'phu, meeçxa' neywe'sx pkalpa'ga wá' txã'wê yuu? jîte', ³Jesus pasçxa' na'jîk:

—Txajx pkalpa'gawa me!, sa' neywe'sx pkalpa'gawa meek txã'wê yuu, naasáa Dxus ewuni's áate kaavxya'ja'khançxáak txã'wê yuu. ⁴Txãa pa'ga kaahsa mjíia's áate kaavxya'ja'jna mjíiwa'j ji'pthu nee en ũsiyna. Txã'wême! kus yá'the!, kim yuhwa mjíiya' âjameena. ⁵Adxa' naa kiwete nee ũsíçxáawa, nasatx eena'te kaafxí'ze'jwa'jsath.

⁶Txã'jîçxa', kiwe's fxne'sxju tuupha'çxa txãa piçthê'j yafxte sxũsxna'wa, ⁷na'jînak jxkaah:

—Me'j pkhi'kxya' Siloe' yu'kafxte. (Txãa Siloe'a' Jxkaahnisa jîni.)

Txajü' txãa piçthê'ja' u'jçxa', yafxtxi pkhi'kxku, sa' uyna yá'kh sxawedna küh. ⁸Aça' txajx yat utxasuwe'sx vxite' nyafxí' txã'wê yafx ji'phmêe upxsatewa ew jiisa' na'wêtx we'we:

—Naa piçthê'jí çnyafxí' lmusxnu pêjxna u'psa meená'? jîte', ⁹maafí yu'!

—Txãa'íik jî'tx. Naapkaçxha' vxite':

—Txãa na'wê yuh thegu'k, nawa txãame' jî'tx. Nawa txãa piçthê'j yu':

—Adxíith jîk.

¹⁰Txajü' pêjxtxi:

—Idx upxnijüjx uyya' âjameeçxa', açxha' çma'wê yuuçxaga uyya' âja'? jîte', ¹¹pta'sxku:

—Teeçx piçthê'j Jesus yaasesa' kiwe's fxne'sxju tuupha'çxa adx yafxte sxũsxna'wa na'jîk: Me'j pkhi'kxya' Siloe' yu'kafxte jîte', u'jna'wa pkhi'kxthu, aç'a' adx yafxa' phatetx aç'a' uyu'th jîte', ¹²paapêjxtxi:

—Idxa's txã'wê kaahsa' çmtee ũsna? jîte':

—Jiimeeth jînak pas.

Fxariseowe'sx txãa piçthê'ja's paapêyni

¹³Txajü' txãa piçthê'ja's pe'jna u'jtx fxariseowe'sx tasxna. ¹⁴Jesus txã'wê kiwe's fxne'sxju tuupha'çxa uyya' âjasame's yu'çe'jni' ki'swa'lj enne' yu'. ¹⁵Aça' fxariseowe'sxa' ki' paapêjxtxi txãa piçthê'ja's:

—çMa'wê yúuçxaga açxha' uyya' âja'? jîte', na'jînak pta'sx:

—Kiwe's fxne'sxju tuupha'çxa adx yafxte sxũsxku, aç'a' pkhi'kxthu sa' uyya' âjath jîk.

¹⁶Txajü' fxariseowe'sx maafí yu' na'wêtx we'we:

—Txã'wê yúusa' Dxus luuçx meena, ki'swa'lj ena's ki'su'çme' na' jîte', vxite' na'wêtx we'we:

—Pkalsaçxa', çma'wě txā'wě kim yuhwa ãjānimeesa's kaavxya'ja'jya' ãjākx?

Txajū' txāawe'sxíçxáa txā'wě we'weçxa', puutx puuidxi'tx neeyūu. ¹⁷Sa' txāa piçthē'ja's ki' paapējxtxi:

—Iidx yafxa's yu'çe'lja' çkimna sūju'ga? jīte':

—Txā' Dxus yuwe pta'sxsana sūju'th jīnak pas.

¹⁸Txā'wě upxniçjūx uyya' ājasameeçxawa āçxha' uyu'th jīte'wa, judiuwe'sx yu' txā'wēne' yu' sūju'çmeeta'. Sa' txāa piçthē'j neywe'sxtxi pa'yaçxa', ¹⁹paapējxtxi:

—çNaa txā'wě i'kwe'sx luuçx upxniçjūx uyya' ājasameena wakx? Sa' çma'wě yūuçxaga āçxha' uyya' āja'? jīte', ²⁰neywe'sx paççxa':

—Na' kwe'sx luuçx yuja', txā'wě upxhíi uyya' ājasameetewa txā'sa' jiitha'w. ²¹Nawa jiimeetha'w ma'wě yūuçxane' āçxha' uyya' āja'. Sa' kim txā'wě yafxtxi' yu'çe'thewa txā'snawa jiimeetha'w. Txā's yuu mpējxwe, txā' thē'jsayā'ja' na' txāa pta'sxina.

²²Paapēysatxi' ūukhçxatx txā'wēçxáa pas. Txā'wēme' maa txā'wě Jesusa' Dxus kaahni Kristo' jīna tuuthe'jena txā'sa' fxariseowe'sxa' ahççexa peena yu' txāawe'sx pkhaakhenite kaapa'ja'jya'méetx ūsu'. ²³Aça' txā'wě yuuya'watetx ūukhçxa: Na' thē'jsayā'ja' na' txāa pta'sxina jīnaçxáa pasu'.

²⁴Txajū' fxariseowe'sxa' txāa piçthē'ja's ki' pa'yaçxa' na'wētç we'we:

—Dxus dxi'pte íxiiimée mpeeta'sx. Kwe'sxa' jiitha'w iidx yafxtxi yu'çe'lja' pkalsatewa jīte', ²⁵txāa piçthē'j paççxa' na'jīk:

—Pkalsa wáana nawa adxa' jiimeeth. Adxa' na'wēçxáa jiith: nyafxí' uyya' āja'çmeeth, nawa āçxha' uyu'th jīte', ²⁶ki' paapējxtxi:

—çKīhga yūu? sa' çma'wēçxah yūuçxaga iidx yafxtxi' yu'çe'lj? jīte', ²⁷txā' na'wēk pas:

—Pta'sxyā'th, nawa pta'sxtewa açewe'we'çxáa i'kwe. Sa' çkījxa'kwe peena pta'sxkaja'? çI'kwe'sxwa txāa yakh u'ju wēje'wá'kwe? jīte', ²⁸na'jīnatx wēesxūu:

—Idxa' txāa yakh u'jusag. Nawa kwe'sxa' Moises jxkaahni's nwēese'jsatha'w. ²⁹Kwe'sxa' jiitha'w Dxusa' Moises yakh puutx we'wek. Nawa txāa thē'ja's majūwe'sxtewa jiimeetha'w.

³⁰Txajū' txāa piçthē'ja' na'wēk we'we:

—Wala yuh fxiya', adx yafxtxi yu'çe'lja's majūwe'sxtewa i'kwe'sxa' jiyumeete'. ³¹Maawa jiitha'w Dxusa' pkalsawe'sx we'weni's pasu'çme', naasáa Dxusna yajkçxa txajx jxkaahni's kxtey yuusaçxáatxku Dxusa' pasu'. ³²Bagaçxte yuhwa iiwēse'jmeetha'w upxhíi uyya' ājasameetx ki' kaauyu'jni yu'sa'. ³³Adx yafxtxi yu'çe'lja' Dxus kaahnisameewaça', txā'wě kaauyu'jya' ājawa'jmeene' yu' jīte', ³⁴na'wētç wēesxūu we'we:

—Idxa' upxhí iidx ūuste pkaçxaxçxáa uta jī'ph upxsag na' çma'wētega kwe'sxtxi yu'kxpeh wēje'? jīna açewe'weçxa', neeutx peena yu' jxpa'gaya'mée.

Uysaaçxawa Dxus yu's jiimeesa

³⁵ Txajü' Jesusa' txãa piçthê'ja's neeuni's jiyuçxa', ki' puutx uyçxa' na'wêk pêjx:

—¿Dxus Nçxi'k kimtewa jiigá? jite!, ³⁶ txãa piçthê'j pasçxa':

—Mpeeta'sx adx jiyukahn jina pêjxte!, ³⁷ Jesusa' pta'sxku:

—Idxa' Dxus Nçxi'ka's iuuyyã'jg. Adxiith, aça' idxa' txãa yakhgu puutx we'we'!

³⁸ Txã'jite!, txãa piçthê'ja' Jesus tasxte peejxükweçxa':

—Idxa' Dxus Nçxi'k yuh yu'ga süju'th jite!, ³⁹ Jesusa' na'ljinak pta'sx:

—Adxa' na'wê yuuya'fiçxáath naa kiwete kih, uyya' ájasameeçxawa uyya' ájäkahn, aça' makwe uysaaçxawa uyya' ájäkahmén.

⁴⁰ Txajü' fxariseowe'sx kxtee üssa' txã'wê wêse'jçxa', na'wêtx pêjx:

—Kwe'sxwa uyya' ájasameewá'ntka'w jite!, ⁴¹ Jesusa' na'ljinak pta'sx:

—I'kwe'sxa' uyya' ájäsamée dxihwaçxa', yuuwesamée yuune'kwe. Nawa uyu'tha'w jï'i'kwe na', txãa pa'ga Dxus dxi'pte' yuuwesai'kwe jik.

Piisxáa kxuuphni's kaaja'da'jna pta'sxni

10 ¹ Isath we'we', maawa piisxáa ka'ga'jni vxitxtey u'kamée, vxite ahte vxitxtemée u'kasa' txã' pesweeta'. ² Nawa vxitxte u'kasa' piisxáa-thesgaçxa txã'wê yuuna. ³ Açá' kxte vxitxte thegsa' vxitxa's phaade'k u'kakahn. Açá' piisxá' jiyu'tx jxpe'jsa we'weni's, txajü' teeçxteeçxçxah kxsusna pa'yaçxa kxuuphni'jü kutxi'ji'k. ⁴ Sa' jxuka kasxisçxa', piisxáa-thesga' yaçtek u'jwe', açá' piisxa' txajx e'ste wa'lmeetx u'jwe', jxpe'jsa pa'yani's jiyu'ne'ta naa pa'ga. ⁵ Nawa nasa fxiysa pa'yate yu', u'jmée wejxwa üphna u'jwe'tx, nasa fxiysa pa'yate jiyuçxatx txã'wê üphu'.

⁶ Jesusa' naa ejemplo's pta'sxnak kaapiya'j, nawa nasa' jiyumeeta' txã'wê pta'sxni's.

Jesusa' ew jxpe'jsa'

⁷ Nasa jiyumeete!, Jesusa' na'ljinak ki'kin pta'sx:

—Isath we'we': Adxií piisxáa u'kani vxitx na'wêsath. ⁸ Adx pa'jmeyna yaçte pa'jsa' jxukay ísxiisa pesweeçxáatx yu'. Açá' piisxá' üukhçxa utxaameeta'. ⁹ Adxií vxitx na'wêsath, açá' maawa adx tasxte u'kasa', nwe'weni yuutxna. Txajüyã'ja' ki' kasehn ki' u'kan txã'wê yuuna üsçxawa, sã'jini nes yuutxna.

¹⁰ Ewmeesa' pesweena ikhna jxuka pebaya'çxáatx pa'ja', naapkaçxha' adxa' bagaçxte yuhwa pçumée itxi fxi'zekahnthu yuwé'. ¹¹ Adxa' piisxaatx ew jxpe'jsath. Açá' ew jxpe'jsa' piisxaatx peeegãhçxa nwe'wepa'gaçxáa txajx itxi fxi'zeni's ivxiituya' úsa'. ¹² Nawa vxyuu pa'gaçxáa piisxaatx thegna üssa' yu'kh eçx yuhte uyna'wa, piisxaatx thegmée üphna u'jwe'tx,

piisxáa-thegsa meena sa' piisxa' txáa jiiwa meetxna, txáa pa'gatx txá'wē yū'. Aça' txá'wē yūute', yu'kh eçxa' piisxaatx mazwa ikhe'k, naapkaçxha' itxisa yu' ma'wēwa ūphu'tx. ¹³Txá'wē vxyuu pa'gaçxáa thegna ūsna, txáasane! ūphna u'jwe' piisxaatxi' thegmée.

¹⁴⁻¹⁵Adxa' piisxaatx ew jxpe'jsath. Adx Tatawa ma'wē adxa's ew jiina aça' adxwa ew jiith Tata's, txá'wēy adxwa piisxaatxi' ew jiith, aça' adx piisxaawa adxa's jiita'. Adx piisxaatx wedxçxa nwe'weya' adx itxi fxi'zeni's ivxiituya'wath. ¹⁶Txá'wēy piisxáa vxite ji'pthu ayte kxuuphnimeesa txáatxwa nuypa'ja'nja. Aça' txáawe'sxwa adx pa'yani's nwēese'jetxna. Txá'wē yūute', teeçx ahteçxaçxáa jxuka pkhakhni neeyūtxna teeçx jxpe'jsa yakhçxáa.

¹⁷Txá'wē adx itxi fxi'zeni's ya'ivxiituya'wath, nawa itxi yuupa'ja's ki' jxpa'gaya'wath, txáa pa'gak Tata' adxa's wedxi'. ¹⁸Adx itxi fxi'zeni's kim yuhwa kusa'jya' ajameena. Adx yuuth peekii' ya'dukhe'. Sa' adx itxi fxi'zeni's ya'dukhçxa uuya'wa aja'nja sa' ki' itxi yuupa'ja'swa ki' jxpa'gaya' aja'nja. Txá'wē yūukahnku adx Tata' adxa's kaah.

¹⁹Txá'wē we'weni's judiuwe'sx wēse'jçxa, kuh jwedtxi yajkxna neeyūu. ²⁰Maafi yu' na'wētx ūsçxawe'we':

—¿Kijxa'kwe nwēese'je' eçxthē'j yakh ūsçxa luuku we'weni's? jī'tx.

²¹Naapkaçxha' vxite' na'jī'tx:

—Eçxthē'j yakh ūsçxa', kim yuhwa na'wē zhiçxkwe kaapiya'jya' ajameena. Eçxthē'jçxa', txá'wē uuya' ajasameetx kaauyu'jya' ¿ajāma'k?

Judiuwe'sx Jesusa's açeni

²²Dxuus yata's txahna jxā'jni's anxu iisatx fxiesta'ja' Jerusalen çxhabe. Sa' txáa fxiestatetx ūsu' nus ente. ²³Naapkaçxha' Jesusa' dxuus yat pwa' Salomon jii jñisuk pekūhna u'ju'. ²⁴Aça' judiuwe'sxa' txajx tasxte pkhaakheçxa na'wētx pējx:

—¿Bagaçxpkaçx kwe'sxtxi kaypuba'jna ūsya'waga? Idxa' Dxus tasxu yuusa Kristoçxa', teehwed mpeeta'sx jīte', ²⁵Jesusa' na'jīnak pas:

—Pta'sxyā'th, nawa adx we'weni's jxpa'ga'çmee'kwe. Adx Tata jxkaathe', na'wē kīhwa mjī'th, aça' adx mjīini' aate kaajiyu'ju'tx adx kimtewa. ²⁶Adx piisxáa mee'kwe jī'th na', isa i'kwe'sxa' txá'wēsa yuji'kwe. Txáasa i'kwe adxa's jxpa'gaya' wa'lu'. ²⁷Adx piisxaatx jiith, aça' txáawe'sxa' adx pa'yani'swa wa'lmée nwēese'je'tx, sa' adx yakh u'jwe'tx. ²⁸Txáasath txáawe'sxtxi' pçumée itxi fxi'zewa'ja's peesu'. Aça' kim yuhwa adx kusejū' kusa'jmeena, sa' bagaçxte yuhwa vxitumeetxna. ²⁹Adx Tata maatewa jxthaakwesak adx kusete dukh, aça' kim yuhwa kusa'jya' ajameena adx Tata kusejū'. ³⁰Tata adx yakha' txáa na'wēçxaçxáatha'w.

³¹Txá'jīte', judiuwe'sxa' Jesusa's ki' kwet wāatatajxa'watx yu'. ³²Aça' Jesusa' we'wek:

—Adx Tata pu'çxte i'kwe'sx dxi'pte mjii ewsaçxaçxáa wala kuh kaavxya'ja'th. Aça' adx mjii ewsa ¿maaga i'kwe'sxtxi ewmeena' thegu' ačkwe adxa's kwet wāatatah wēje'? jīte', ³³judiuwe'sx pasçxa' na'jītx:

—Ew yūupa'ga txā'wē kwet wāatatajxa'wameetha'w. Nasaçxáag, naa kxahg Dxusthu jīna Dxusa's weeçx we'we', txāa pa'ga txā'wē yūuya'watha'w.

³⁴Txajū' Jesusa' na'wēk we'we:

—I'kwe'sx leyte i'kwe'sxtxi we'weçxa': Dxus i'kwe çjī'çmeena'?
³⁵Jiitha'w Dxus librute fxi'jni's maawa weeçx we'wewa'ljme!. Maawa Dxus yuwe's jxpa'gasayā'ja', Dxus i'kwe jīnak we'we Dxusa'. ³⁶Nawa adxa' txā'wēsaçxáameeth. Adxa' Dxus yuu txhitxhçxa naa kiwete kaahnisath, aç'a' adxa's çma'wē Dxusa's weeçx we'we'k Dxus Nçxi'kthū jīna jīya' ājaki'kwe'? ³⁷Meeçxa' adx Tata mjīi kaahnimeesaçxáatx wāa mjīina ūsne'tka aç'a' adx we'wenitxi' jxpa'ganuwe. ³⁸Nawa adx Tata mjīi kaahnisatx yuh mjīite!, adx yu's jxpa'gameeçxawa, adx we'weniçxáatxwa miipa'gawe. Txā'wē yūuçxaçxáa jiyune'kwe, adx Tata' adx yakh ūsa', aç'a' adxa' Tata yakh ūstewa.

³⁹Txā'jīte!, Jesusa's preesu'ljçxa jxūna u'lj wēttx. Nawa preesu'ljmeyna, kasehna u'kh.

⁴⁰Txajū' Jesusa' Jordan yu'wala kuten u'ljçxa', Juan nyafxíi bautisāyna ūsu'k kxteek ūsu'. ⁴¹Aç'a' nasa wala kuh thegya' pa'ljçxa', na'wēttx we'we:

—Juana' kim yuhwa ājanimeesatx kaavxya'ja'ljmeeçxawa, pta'sxku naa piçthē'lj pa'ljçxa ma'wē yūuwa'ja'swa, aç'a' txā' ūsxiinimée jxuka kxtey yuuk jī'tx.

⁴²Txajū' kxtee ūssa nasa' wala kuhsa Jesus kimtewa jiyutx.

Lasaro uuníi

11 ¹Betania çxhabte teeçx piçthē'lj Lasaro yaasesak āçā'na ūs yu', npe'sxwe'sx Maria Marta u'pni çxhabte. ²Txāa āçā'sa npe'sx Mariak txā'wē Jesus çxidakhē wēt putasa's awçxa txajx dxkhasju adxi'ljwa'jsa yu'. ³Txāawe'sxa' pxakhíitx dxiy āçā'na ūste!, Jesusa's pta'sxkahn yuwe kaah:

—Iidx namiku wedxnisa' wala āçā'na ūsa' jīna.

⁴Txajū' Jesusa' naa pta'sxni's wēse'ljçxa' na'ljīk:

—Na'wē āçā'na ūsçxawa, uuwa'jsa meea!. Naasáa Dxus ājāni's āate kaavxya'jaljna, txā'wēy Dxus Nçxi'k ājani'swa kaavxya'ja'khançxáa txā'wē āçā'na ūsa'.

⁵Aç'a' Marta Maria txāawe'sx dxiy Lasaro yakha' Jesus wedxnisatx yu'. ⁶Nawa Lasaro' wala āçā'na ūsa' jīna pta'sxni's wēse'ljçxawa, nee e'z eníik txajx u'ljunisu jxthēeyūu. ⁷Txāa e'z en skhēwniijū!, Jesusa' na'ljīnak we'we txāa yakh u'ljusawe'sxtxi:

—Judea kiwen ki' u'ljwega jīte!, ⁸txāawe'sxa' na'wēttx pas:

—Kaapiya'jsa, mwēese'lj. Txāwāsu' judiuwe'sxa' idxa's ikh wēeçxa kwet wāatatajxa'watx yu', aç'a' çma'wēga kxtey ki' u'lj wēje'? jīte!, ⁹Jesusa' na'wēk pas:

—Isa ena' doce ora ¿ji'phmeena'? Maawa en u'juçxa' yu'spê'themée fxi'zetxna, eena' kweethniitene'ta fxi'ze' naa pa'ga. ¹⁰Nawa kus u'juçxa', yu'spê'thetxna, eena' kweethnite u'jupa'gamée.

¹¹Txajü' na'ljik Jesusa':

—Kwe'sx namiku Lasaro' deeni', nawa adxa' fxítxya' u'jwe'nja jíte',
¹²txãa yakh u'jusawe'sxa' na'ljítx:

—Deeniçxáa usçxa yu', fxítxte' kiiteena jítx.

¹³Lasaro' uuni üstek Jesusa' txã'wē we'we. Nawa txãa yakh u'jusawe'sxa' jiyumeeçxa', i'née deeniçxá'sne' we'we' süju'ne'ta.

¹⁴Txajü' Jesusa' teehwedku äate pta'sx:

—Lasaro' uuni' jina. ¹⁵I'kwe'sxa' adx äjani's uyçxa' adx kimtewa jiyukah, ewçxá'ntka kxtee üsu'çmée. Txã'wē uuniyã'j üstewa, thegya' u'jwega jíte', ¹⁶Tomas melxisu jít'x txã' na'wēk we'we vxite pi'kxna u'jusawe'sxtxi:

—Kwe'sxwa u'jwega Jesus yakh ja'da uuya' jik.

Jesus ítxi vxít-sa

¹⁷Jesus kxtee pa'jaçte', Lasaro's pedaní pahz enyã'kh yu'. ¹⁸Aça' Betania çxhaba' Jerusalen çxhabuh e'z kilometro y medioçxáak jxu'kha üsu'. ¹⁹Aça' judiuwe'sxa' wala kuh pa'khu'ta txã'wē dxiy uute', npe'sxwe'sxtxi kvxiisxa'jya'. ²⁰Aça' txãa entey Jesusa' pa'jaçta' jini's jiyuçxa', Marta' puutx uuya' kasejk. Nawa Maria' yatte neeyüuk.

²¹Txajü' Marta' Jesus yakh puutx uyçxa' na'ljinak we'we:

—Idx ayte üssawaçta', uuwa'lmeene' yu' ü'kwe dxi'sxa'. ²²Nawa jiith Dxusa' jxuka üsuna idx kih pëjxtewa jíte', ²³Jesusa' na'wēk pas:

—I'kwe dxiya' ítxi yuuna jíte', ²⁴Marta' na'wēk pas:

—Ü'kwe' jiith, uusaawe'sx ítxi yuu ente' ítxi yuuyujuna.

²⁵Nawa Jesusa' na'ljik:

—Adxii uuniitewa ítxi vxít-sath, sa' pçumée ítxi fxi'zewa'ja'swa adxii peessath. Maawa adxa's üuste jxpa'gasa' makwe uuçxawa ki' ítxi yuutxna. ²⁶Aça' maawa nee ítxi üssa' adxna üuste jxpa'gaçxa', bagaçxte yuhwa uuwa'jmée ítxi fxi'zetxna. Adx we'weni' isa yuutxna ¿süju'kwe'? jíte', ²⁷Marta pasçxa':

—Txã'wē yuhna süju'th. Idxa' Kristog, Dxus Nçxi'k naa kiwete kiisa jik.

Jesus ü'neni

²⁸Txã'wē we'wena jxã'jçxa', Marta' yatna sxawedna u'kh nyakha's pa'yaya'. Sa' na'ljinak susmée we'we:

—Kaapiya'jsa ayte yã'j üsa', sa' i'kwe's yuu kaakh.

²⁹Txã'lji'çpkaçxha', Maria' kiitena' wala dud u'kh Jesusa's puutx uuya'.
³⁰Jesusa' Betania çxhabte u'kameyku yu', Marta yakh mteene' puutx uy kxtee nee üsiyçxáak yu'. ³¹Aça' Maria' kiiteçxa wala dud skhēwte',

judiuwe'sx txãa yatte kvxiisxa'jna ũssa' e'stey u'jtx, pedaní kafxte wáa ũ'neya' u'jweçna sũhçxa.

³²Txajü' Maria' Jesus tasxte kũhna'wa, peejxũkweçxa na'wêk we'we:

—Kwe'sxxti jxpe'jsa, idx ayte ũsawaça', ũ'kwe dxi'sxa' uuwa'lmeene' yu' jĩnak we'we.

³³Txã'wê Maria vxite' judiuwe'sx pi'kxna yuusa ũ'neçte Jesusa' uyçxa', txãawa wala nxusçxa' ³⁴pějxku:

—¿Mteekwe pedáa? jĩte':

—Myuh wakx thegya' jĩtx.

³⁵Aça' Jesusa' ũ'nek. ³⁶Txã'wê Jesus ũ'neçte uyçxa', judiuwe'sxa' na'jĩtx:

—Mthegwe ma'wêga wala peeygãja'.

³⁷Nawa maái yu' na'wêtx we'we:

—Naa piçthê'ja' uyya' ājasameetxwa kaayu'u'ju'k na' ¿kĩhçxáawa yũuya' ājawa'jmée ma'k yu' Lasaro uukahmén?

Lasaro's ĩtxi vxitni

³⁸Txajü' Jesusa' ki'kin wala nxusna utxaak Lasaro's pedaní kafxte. Txãa kafxa' dxiiga pwa'ja'nik yu', aça' u'kani vxitxte yu' kwetku aphni yu'. ³⁹Jesusa' na'wêk jxkaah:

—Aphni kweta's mkiiswe jĩte', uusáa npe'sx Marta' na'jĩk:

—Uuní pahz enyã'ja', aça' phadete' ¿kazx putameema'k? jĩte', ⁴⁰Jesus we'weçxa':

—Adx pta'sxnitxi' txã'wê yuhna sũhna ũuste jxpa'gaçxa', Dxus ma'wêsatewa jiyune'kwe ¿jĩçmeetka'?

⁴¹Txã'jĩte', txãa aphni kweta's kiistxi. Aça' Jesusa' cielute pagayçxa na'wêk we'we:

—Tata, adx pëyni's pasu'g naa pa'ga weçxa'th. ⁴²Adxa' jiith, idxa' bagaçxtewa adxa's pasu'g. Nawa txã'jĩna āateth weçxá', ayte nasa ũsta' txãawe'sx wêse'jçxa', adxa'sa' Dxus kaahni yuh yu'ne' sũjkahn.

⁴³Txã'jĩçxa', Jesusa' susku we'we:

—Lasaro, txãajü mkaaseh jĩçpkaçxha', ⁴⁴uusá' ĩtxi yuuçxa kasejk, çxida, kuse petx dxi'p yã'jçxa yapni. Aça' Jesusa' khibkaakh u'jya' ājākahn.

Jesusa's ikhya' puutx we'weni (Mt 26.1-5; Mr 14.1-2; Lk 22.1-2)

⁴⁵Uusá's ĩtxi vxitni's uyçxa', Maria's pi'kxna ũssa judiuwe'sxa' Jesusa's ũuste jxpa'gaçxatx neeyũu. ⁴⁶Nawa vxite judiuwe'sx acesa yu' fxariseowe'sx tasxna u'jçxa', Jesus txã'wê uusá's ĩtxĩ vxitni's pta'sxtxi. ⁴⁷Aça' fxariseowe'sxa' sacerdote npiičthê'jwe'sx yakh pkhaakheçxa', na'jĩnatx puutx we'we:

—Naa piçthê'ja' naa kiwete kim yuhwa ãjanimeesatx kaavxya'ja'jna kîjkihwa yûuna ũsa'. Aça' çkîh yuukxtha'w? ⁴⁸Txãa piçthê'ja's kîhçxáawa yûumeete', nasa' jxukay txãa yakhçxaçxáa u'jwetxna. Aça' Romajû nasa kwe'sx dxuus yata's ivxiituçxa', kwe'sxtxiwa ivxiitutxna.

⁴⁹Txajû' txãa anxute sacerdote npiçthê'j Kaifxasa' na'wêk we'we:

—I'kwe'sxa' ũus yajkxya'çxáa yuhwa ãjã'çmeei'kwe. ⁵⁰Kwe'sx jil' jxuka yu' vxitukahmen wejxwa jxukasa pa'gate teeçx yuuçxáa vxituwaççxáa wejx ewna. Txã'wê yûuwa'ja's ũus yajkxya' i'kwe ãja'çmêe.

⁵¹Kaifxasa' txãa anxute' sacerdote npiçthê'kh yu', sa' peekçxáa txã'wê yajkçxa we'wemeene'. Jesusa' judiuwe'sx jxukaysa pa'gate txãaçxáa uuwa'thene! Dxusa' Kaifxasa's txã'wê we'wewa'ja's kaaũusuthe'j. ⁵²Nawa judiuwe'sxtxi nwe'weya'çxáameene' txã'wê uuya'wa yu'. Dxus luuçx mtee mteewa ũstxna txãawe'sxtxiwa pkhakhya'k txã'wê uuya'wa yu'. ⁵³Aça' txãajûjx judiu npiçthê'jwe'sxa' Jesusa's ikhya' puutx we'wetx.

⁵⁴Txãa pa'gak Jesusa' Judiuwe'sx ksxavxysu u'juya' ãjãmeeçxa', Judea kiwejû kasehna u'j txãa yakh u'jusawe'sx yã'jçxa teeçx çxhab nasa u'pnimêe ja'dasu Efxrain yaasesa ũsu'k kxtee ũsya'.

⁵⁵Txajû' Judiuwe'sx fxiesta Paskua en ãjaçku yu'. Aça' wala kuh nasa' u'jtx Jerusalenna, Paskua fxiesta ãhmeyna txãawe'sx kakwete pkaltxi yaateçxa ũsya'. ⁵⁶Kxte' Jesusa's pakwena yã'jtx ũs yu' sa' dxuus yatte na'wêtx puutx paapëyi':

—¿Ma'jîki'kwe? Jesusa' fxiestate ũsya' ¿yuhmanx?

⁵⁷Txajû' fxariseowe'sx vxite' sacerdote npiçthê'jwe'sxa' neewe'wetx maaçxáawa Jesusa' fxiestate ũste jiyuçxa' txãawe'sxtxi pta'sxkahn tudxa' kaajxa'.

Wêt putasa's Jesus çxidakhê teeçx u'y awni

(Mt 26.6-13; Mr 14.3-9)

12 ¹Paskua fxiesta ãjxa' seis en peejiyna, Jesusa' Betania çxhabna u'kh, Lasaro uuniitewa îtxi vxitku kxtee. ²Kxteea' ũ'wal'j pheu'jtx Jesusna weçxana, naapkaçxha' Marta yu' puuçuçsak yu'. Aça' Lasaro' Jesus yakh kaçxku ũ'ya'. ³Txajû' Maria' teeçx libra ãjk wêt putasáa wala pa'gasa's jxûna pa'jçxa', Jesus çxidakhê sxûsxçxa', txajx dxkhasjuk adxi'. Aça' yat dxiite txãa wêt putasaçxáa jxuka utak.

⁴Txajû' Jesus yakh u'jusa Simon nçxi'k Judas Iskariote yaasesa' Jesusa's ikhkahn dukhwa'jsa' na'wêk we'we:

⁵—¿Ma'wêteki'k naa u'ya' wêt putasa's tres cientos pesote txweyçxa nasa puuplesatx peesu'çmêe? jîk.

⁶Nawa Judasa' puuplesatx pees jxthãasçxa txã'jîçme'. Txã' vxyuu jxaawsak yu', nawa vxyuu pkhakhnitx kim yuhwa jiyunimêe paaçte nkuutxi'ji'u'ga, txãasak txã'wê we'we'.

⁷Txajû' Jesusa' na'wêk we'we:

—Naa u'ya's txã'wē yuja' we'wewa'lj jì'phmeeg. Naa wēt putasa's adx kakwe's pedaaçtewe'sxku jxaawni jì'phu'. ⁸Puuplesa' bagaçxtewa i'kwe'sx yakh nes yuutxna. Nawa adxa' jwee yu' i'kwe'sx yakh nes yuuwal'jsameeth jīnak pta'sx.

Lasaro's ikh wēeni

⁹Jesusa' Betaniate ũsa' jīni's jiyuçxa', judiuwe'sx wala kuhsa pkhaakheçxa Jesusa's thegya' txāa çxhabna u'jtx. Nawa Jesusçxá's thegya' u'jmée, Lasaro's ja'datx thegya' u'j, txā'sa' uuniitewa Jesusa' ki' ĩtxi vxitku txāa pa'ga. ¹⁰Txajū' sacerdote npiičthē'jwe'sxa' puutx we'wetx Lasaro'swa ikhya', ¹¹txā's Jesus ĩtxi vxitpa'gaçxáa judiuwe'sx wala yā'j txuteeçxa Jesus yakhtxi u'jweç yu' naa pa'ga.

Jerusalente Jesus u'kani

(Mt 21.1-11; Mr 11.1-11; Lk 19.28-40)

¹²Jerusalente Paskua fxiestate nasa wala pa'tha. Sa' kuskus enkhē' Jesuswa Jerusalente fxiestate pa'jana jīni's jiyuçxa', ¹³lamus eç spē'thçxa Jesusa's pu'thegya' kasehtx. Sa' na'jīnatx sus we'we':

—jDxus txakwe ewte, teeçx yuja' Dxus kaahni, Israelwe'sxtxi Jxkaahsa wala ewsa'! jīnatx weçxá'.

¹⁴Txajū' Jesusa' teeçx buçxu ũste uyçxa', txāatek a'jçxa u'j, Dxus librute na'wē fxi'jni' txāa kxtey yuukahn:

¹⁵Ūukhnuwe, Sion çxhabtewe'sx.

Mthegwe, i'kwe'sxtxi Jxkaahsa yuja', teeçx buçxute a'jçxa jīnak fxi'jni yu'.

¹⁶Txāapkaçxhī yu', Jesus yakh u'jusawe'sxa' jiyumeeta' txā'wē yūuni's. Nawa Jesus cielun u'jnite', jiyutx txā'wē fxi'jni' kxtey yuutewa.

¹⁷⁻¹⁸Txā'wē uusá's Jesus ĩtxi vxitpa'gatx nasa jiyuwēesa' txakwe wala pu'thegya' kaseh, Lasaro's ĩtxi vxituçte' kxtee ih thegna ũssa' jīimeesatxwa pta'sxne'ta txāa pa'ga.

¹⁹Txajū' txā'wē nasa pu'thegya' kasehpa'gaçxáa fjariseowe'sxa' na'jīnatx ũusçxa we'we' txāawe'sx pwe'sx:

—Mthegwe waxx, kīh yuhwa yūuya' ājaçmeetha'w, naapkaçxçxáa nasa' jxukay Jesus yakhçxaçxáa u'jweçta' jī'tx.

Greciajūwe'sx Jesusa's pakwení

²⁰Jerusalente fxiesta ente jxu'j kiwe Greciajūwe'sx pa'jçxa ũsu'tx.

²¹Txajū' Greciajūwe'sxa' Galilea kiwesu Beçaidatewe'sx Fxelipe's utxaana kūhçxa', na'wēt xpxthaa we'we':

—Jesusa'stha'w puutx uy wēje' jīte', ²²Fxelipe' u'jçxa Adresa's pta'sxku, sa' txajū' e'zsay Jesusa's pta'sxya' u'jtx. ²³Aça' Jesus we'weçxa':

—Dxus Nçxi'k Nasa Yuusa' uuçxa ki' ĩtxi yuuwal'j en ājaça'. ²⁴Na'jī'th na': Teeçx skuutxh nxinxá' kiwete weteçxa uumeeçxa yu', pehnamée

teeçxçáa nes yuuna. Nawa uuçxa buçxaçxa!, jweeíçxáa penana.
 25 Maawa naa kiwete itxí fxi'zewa'lçxá's yaakxsa' pçuwa'jmée itxí
 fxi'zewa'ja's ivxiitutxna. Nawa naa kiwete itxí fxi'zeni's yaakxsame',
 pçuwa'jmée itxí fxi'zewa'ja's ji'phutxna. 26 Maawa adxa's selpíi wēeçxa',
 adx yakh yuweena, sa' adx mtee ūste! txāawa kxtey ūsya' ājana adxna
 selpiisa'. Aça' maawa adxna selpisaatxi's adx Tata' tuuthe'jena.

Jesusa' txajx uuwa'ja's pta'sxni

27 Āçxha' wala nxusna ūsthu, sa' çma'jítka? Meeçxa' Tata, adxa's
 meen nwe'we pxthaa yuukahmen jíte, ewwáanaxk. Nawa txā'wē pxthaa
 yuuya'íçxáath yuwé' na' txā'jíme'nja. 28 Tata, maawa idxna jiyuwa'lçxá's
 mkaavxya'ja'j.

Txajū' cielujū we'weni na'wēk pthūuse:

—Adxna jiyuwa'ja's kaavxya'ja'jyā'th. Nawa maawa adxa's jiyukahn ki'
 kaavxya'ja'jya'wath jīnik pthūuse.

29 Aça' nasa' txā'wē cielujū we'weni's wēse'lçxa':

—Kpi'sxne' txā'jī jī'tx, naapkaçxha' vxite yu':

—Teeçx angelne' txā'wē we'we jī'tx.

30 Txajū' Jesusa' na'jīk:

—Txā'wē we'weni' adxna pta'sxna we'weme', i'kwe'sxtxi pta'sxnak
 txā'wē we'we jiyukahn. 31 Āçxha' naa kiwete jxukaaysa yuuwesa yuua'j
 en ājk, naapkaçxha' naa kiwete jxkaahna ūssa eçxthē'j yu' peena yu'
 jxkaajxa' ājāwa'jmeete neeyūuna. 32 Txā'wē adxa's ēekhē ki'pnijū',
 jxukaytxi nwe'weya' ājā'nja.

33 Txā'wē we'weçxak kaajiyu'j ma'wē uuya'waçxawa.

34 Txajū' nasa' na'wētx we'we:

—Kwe'sxa' Dxus librate leya's iiwēse'tha'w, aça' Kristo' bagaçxte
 yuhwa uuwa'jmée itxi u'juwa'jsa' jī'k. Aça' idxa' çma'wēga Dxus Nçxi'k
 Nasa Yuusa's ēekhē ki'pni yuuna jīna we'we'? Dxus Nçxi'k Nasa Yuusa'
 çkimna? jíte', 35 Jesusa' na'jīnak pas:

—Eena'sa' i'kwe'sx yakh nee ūsuna, nawa maz ençxáa ūsuna. Txā'wēte'
 eena'te fxi'zewa'ja's mpa'gawe, eena'sa nee ūsiyna, kxah çxhi'dxsa'
 i'kwe'sxtxi kpajkxmeena. Txā'wēme', çxhi'dxte u'jusa' maa dxi'j ewsatewa
 jiyuya' ājā'çme'. 36 Nee i'kwe'sx yakh ūsiyna, eena'sa's mjiyuwe, kxah
 eena'te fxi'zesa yuune'kwe.

Txā'wē we'wena jxā'lçxa', Jesusa' u'lçxa vxyaame'.

Judiuwe'sxa' Jesusa's jxpa'gameeta'

37 Kim yuhwa ājanimeesa's txakwe wala kaavxya'ja'thewa, nasa' jiyuya'
 āja'çmeeta' Jesus kimtewa. 38 Nawa Dxus yuwe pta'sxsa Isafás fxi'lçxa
 nvxiitni' kxtey yuukahntxi txā'wē yuu: Kxte' na'jī'k:

Kwe'sx pta'sxni's çkimçxá' jxpa'gata'?

Dxusa' txajx ājani's ʒkimtxiga kaavxya'jalj? jī'k.

Kristo's jiyuya' ājawa'jsameene'ta yu', txāa pa'gak Dxus yuwe pta'sxsa Isaiasa' txā'wē fxi'ljçxa nvxiht.

³⁹Sa' Isaiasa' ki' we'weçxa':

⁴⁰Dxusa' txāawe'sx yafxtxi aphku uyya' ājākahmén.

Sa' txāawe'sx ūstxiwa nuywejik jiyukahmen,

Sa' Dxus tasxte sxawedçxa katxhiwa'ja'swa nvxihtme' jī'k.

⁴¹Jesus ma'wē yuuwa'jsatewa jiyuçxak Isaiasa' txā'wē we'wena fxi'lj.

⁴²Txā'wētewa, judiüwe'sx wala kuhsa Jesus kintewa jiyutx, maái yu' npiičthē'jwe'sx yā'ljçxa. Nawa fxariseowe'sx ahçççxa txāawe'sx pkhaakhenijū kutxi'ljçxa peena yu' pa'ljwa'jmée vxitkahmen, āate yu' pta'sxi'çmeeta' ūikhçxa. ⁴³Txāawe'sxa' nasaa tuuthe'jniçxá's wejx jī'phu wēççxatx txā'wē yu'.

Ney pta'sxkaahni's Jesus pta'sxni

⁴⁴Txajū' Jesusa' na'ljinak we'we:

—Maawa adxna ūste jxpa'gasa', adxçxáana jxpa'gamée, adxna kaahsa Tatanawa jxpa'gana. ⁴⁵Txā'wēy maawa adxna uysa', adx Tata'swa uysáa yuuna. ⁴⁶Adxa' nasatx eena'te kaafxī'ze'jya'th kīh, kxah adxna ūste jxpa'gasa' çxhi'dxte neeyūumeetxna. ⁴⁷Nawa maawa adx pta'sxni's wēse'ljçxawa kxtey nwēese'jmeete', txā'wē yūusa's ewmeete nvxiitwa'jsa' adxmeeth. Adx yu' naa kiwetewe'sxtxi ewmeete nvxihtxa' yuwe'çmeeth, wejxwa nwe'weya'th yuwé'. ⁴⁸Adxa's wa'lçxa adx pta'sxnitxi' kxtey yuumeete', txā'wē yūusatx ewmeete nvxiitwa'jsa ūsa': āçxh na'wē adx pta'sxna we'we'th txāa pta'sxnisa íçxáa ewmeete nvxiitwa'jsata' nmeh ente'. ⁴⁹Txāa pa'gatey adxçxáa we'wena pta'sxiçmeeth. Adxna kaahsa Tataíik txā'wē pta'sxkaja', ⁵⁰kxah adxa' jiith adx Tata we'weni' bagaçxte yuhwa pçumée itxi kaafxī'ze'jwa'jsatewa. Aça' adx Tata ma'wē pta'sxkaathe', txā'sna íçxáath adxwa pta'sxi' jīnak we'we Jesusa'.

Jesusa' txāa yakh u'ljusawe'sx çxidatx pkhi'kxni

13 ¹Paskua fxiesta ājxa' teeçx ençxáa pejiičku yu'. Aça' Jesusa' jiiik yu' naa kiwe's nvxihtçxa Ney tasxna u'ljwa'lj en āani's. Sa' naa kiwete txāa yakh u'ljusawe'sxtxi' nyafxiiitey ma'wēne' peeygāh na', nmeh entepkaçxku peeygāh.

²Jesusa' txāa yakh u'ljusawe'sx yakh ū'na u'ppkaçxha', eçxthē'ja' Simon nçxi'k Judas Iskariote's kaaūusuthe'jeçyā'kh yu' Jesusa's ewmeesa kusete dukhkahn. ³Aça' Jesusa' jiiik yu' Dxus tasxune' yuusa yu' sa' ki' Dxus tasxnay u'ljwa'ja's. Sa' txā'wēy jiiik yu' Dxus ma'wēççxah jxkaahwa'ja'swa txāaçaçxá's dukhni'swa.

⁴Txajū' Jesusa' ū'na u'píi kiitena'wa, atxhna ki'pçxa, toalxa's jxtuhdku. ⁵Sa' kuse khweeçxaniite yu' awna', mesate ih ū'na u'psa çxidatx pkhi'kxna', toalxaju adxi'k.

⁶Sa' Simon Pedro çxidatx p'khi'kxya'wate', txã' na'wëk we'we:
—Kwe'sxtxi jxpe'jsa yuja', çadx çxidatx p'khi'kxma'g? jîte', ⁷Jesusa' na'wëk pas:

—Ăçxhíi yu' jiyumeene'ga na'wë yūuni's. Nawa e'su' jiyune'ga.

⁸Txã'jítewa, Pedro' ki' na'jîk:

—Idxa' adx çxidatx p'khi'kxwa'jsameeg jîte', Jesusa' na'jînak pta'sx:

—Idxa's p'khi'kxmeete', adx yakh ũsya' ajameene'ga jîte', ⁹Simona' na'wëk p'xthaa we'we:

—Txã'wëyã'the', çxidaçxáatx p'khi'kxmée, kuse petx dxikthé yã'jçxa meen p'khi'kx jîk.

¹⁰Nawa Jesusa' na'jîk:

—U'se pëwçxa ũssa', jxuka ateyã'tha', kxah çxidaçxáatx p'khi'kxwa'j peejxta'. I'kwe'sxa' ateyã'ji'kwe, nawa jxukasa yu' ate ũsmeei'kwe.

¹¹Jxukaysa yu' ate ũsmeei'kwe jînak we'we, txã's ikhkahn dukhwa'jsa's we'weçxak txã'jî.

¹²Txajü' Jesusa' txãawe'sx çxidatx p'khi'kxna jã'jçxa', atxha's jxkahçna' mesate ki' kaççxa na'jînak paapëjx:

—¿I'kwe'sxa' jiyu'kwe' adx txã'wë i'kwe'sx çxidatx p'khi'kxte'?

¹³I'kwe'sxa' adxa'sa' kaapiya'jsa, jxpe'jsa, jîçxa', isa yuh we'we'i'kwe,

adxa' txã'wësa yuhth naa pa'ga. ¹⁴Adxa' kaapiya'jsa, jxpe'jsaçxawa

i'kwe'sx çxidatx p'khi'kxthucha' i'kwe'sxwa txã'wëy çxidatx puutx

ya'p'khi'kxna mfxi'zewe teeçxsa na'wëçxaçxáa. ¹⁵Adx na'wëy yūuna

fxi'zekahnthucha' i'kwe'sxtxi txã'wë selpí. ¹⁶Isath we'we', maawa selpisa'

txajx patrante jxthaakwesame', aç'a' txã'wëy kaahnisawa txã's kaahsate

jxthaakwesame'. ¹⁷Na'wë selpiwa'ja's jiyuçxa kxtey yuuna fxi'zeçxa',

weçx weçxa fxi'zene'kwe.

¹⁸I'kwe'sx jxukaysa yuutxi' txã'jî'çmeeth. Jiith kimçxah adx

txhitxhnisatewa. Nawa Dxus librute na'wë fxi'jni ũsa': Adx yakh ih

ũsaçxawa, adxa's ahççxa kiikhe'jya'wa' jîna fxi'jni' kxtey yuukahnthucha'

txã'jî'. ¹⁹Ăçxhíi pta'sxiçthucha, kxah kxtey yuute', adxa's ew jiyune'kwe

Dxus Nçxi'kdxihtewa. ²⁰Isath we'we': maawa adx kaahnisa's jxpa'gaçxa',

adxa'swa jxpa'gasa yuuna. Sa' adxçxáana jxpa'gamée, adxa's kaahsanawa

jxpa'gasa yuuna.

Judasa' Jesusa's ewmée yūuya' yaakxni

(Mt 26.20-25; Mr 14.17-21; Lk 22.21-23)

²¹Txã'jîna jã'jçxa', Jesusa' nxusnxus yajkçxa' aatek we'we:

—Isath txã'jî', i'kwe'sx yakh ul'jusa teeçxsa' adxa's ahççxa ewmeesa kusete dukhya'wa' jîk.

²²Txajü' kimna txã'jítewa jiyumeeçxa', dxi'p iisaçxáatx puutx thegu'

txãawe'sx pwe'sx. ²³Teeçxsa' Jesus pukate ih u'psa' Jesus wedxnisak yu'.

²⁴Aça' Simon Pedro' kimna txã'jítewa jiyu wëeçxa', txãa ih u'psa's kuseju

pta'sxku paapëykahn. ²⁵ Aça' Jesus pukate ih u'psa' tuphiçxa na'jînak paapëjx:

—Jxpe'jsa, mpeeta'sx çkim idxa's txã'wë ahçeçxa dukhwa'jsana? jîte', ²⁶ Jesusa' na'jînak pta'sx:

—Pana's tuupha'jçxa maana üsu'nja txãa adxa's dukhwa'jsa' jîçxa', pana's tuupha'jna'wa Simon nçxi'k Judas Iskariote'sku üs. ²⁷ Aça' Judasa' pana's jxpa'gaçpkaçxa', eçxthê'ja' txajx üuste u'kak.

Aça' Jesusa' Judasa's na'jînak we'we:

—Kîh yûuya'waçxawa, dud kxtey myuu jîte', ²⁸ mesate ü'na u'psa' maa yuhwa jiyumeeta' txã'wë we'weni's. ²⁹ Maafi yu' na'wëtx yaaki': Judasa' vxyu jxaawsate', kxah wá' Jesusa' fxiestate peejiwa'ja's weykaja', meeçxawa puuplesatx wá' kîhçxáawa peeskaja' sÿju'tx. ³⁰ Naapkaçxa' Judasa' pana's ü'na'wa kasehna u'kh. Txã'wë yuuçte', çxhi'dxni yá'kh yu'.

U'se jxkaahnisa

³¹ Judas u'jni e'su', Jesusa' na'wëk pta'sx:

—Dxus Nçxi'k Nasa Yuusá's açxha' tuuthe'jnik yuu, aça' Nçxi'kwa Neyas tuuthe'kh. ³² Dxus Nçxi'k Nasa Yuusa' Neyas tuuthe'jeçpkaçxa', Neywa Nçxi'ka's tuuthe'jena, nawa açxhí' txã'wë yuuya'wa'. ³³ Adx nçxi'kkuëwe'sx, jwee yu' txaçx üsme'nja i'kwe'sx yakh. Adxa' judiuwe'sxtxi nyafxí' we'weçxa': I'kwe'sxa' adxa's pakweene'kwe. Nawa adx u'jweçthu kxte' yujxa' ajameene'kwe jînath we'we, sa' i'kwe'sxtxiwa txã'wëyçxáath we'we'. ³⁴ I'kwe'sx yakh nvxiituçthu u'se jxkaahnisa's, puutx ya'peeygâhna fxi'zewa'ja's. Adx ma'wëtká i'kwe'sxtxi peeygâhna fxi'ze', txã'wëy i'kwe'sxwa puutx ya'peeygâhna mfxi'zewe. ³⁵ Txã'wë puutx ya'peeygâhna fxi'zete', maa nasawa jiyutxna i'kwe'sx adxa's nwëese'jsatewa.

Pedro' ísxiiwa'jsatewa Jesus pta'sxni

(Mt 26.31-35; Mr 14.27-31; Lk 22.31-34)

³⁶ Txajü' Simon Pedro' na'jînak Jesusa's paapëjx:

—Jxpe'jsa, çmtee u'jweçga? jîte', Jesusa' na'jînak pta'sx:

—Adx u'jweçthu kxte' yujxa' ajameene'ga açxhí' yu'. Nawa e's yu' yuweene'ga jîtewa, ³⁷ Pedro' ki'kin paapëjxku:

—Jxpe'jsa çkîh yuuçxa açxhí' yu' yujxa' ajamée yuuki'th? Adx uuwa'ja's yuhwa üukhya'mée üsthu, idxa's peeygâaweete jîte', ³⁸ Jesus we'weçxa':

—çIsaga txã'jî'á'? Nawa adxa' na'jî'th na': atalx we'wemeyna, adxa's jiimeeth jîna tekx us ísxiijaçyâ'j yuune'ga jîk.

Jesusa' Dxus tasxte kaapa'ja'jwa'jsa

14 ¹ Jesusa' na'jîk:

—I'kwe'sx üuste fxîikâhna nxusmée meswe. Wejx yuuwa Dxusçxá's yajxna meswe, sa' adxnawa txã'wëyçxáa yajxna meswe.

²Adx Tata ūsnite!, jxkaasena ūswa'j wala ūsa!. Txā'wē méewaça!, meea' jīna pta'sxni yā'j yu'nja i'kwe'sxtxi. Txāa pa'ga i'kwe'sx kxtee pa'jwa'ja's pheu'jya' u'jweçthu. ³Sa' u'ljçxa kxtee i'kwe'sx pa'jwa'ja's pheu'jçxa!, ki' sxawedu'nja i'kwe'sxtxi pe'jna u'jya!, kxah i'kwe'sxwa adx ūsnitey adx yakh ih ūsune'kwe. ⁴I'kwe'sxa' jii i'kwe mtee u'jweçtewa, sa' dxi'jnawa jii i'kwe.

⁵Txajū' Tomasa' na'jīnak pējx:

—Jxpe'jsa, mtee u'jweçne'ga nawa kwe'sxa' jiimeetha'w, sa' dxi'ja'swa jiimeetha'w jīte!, ⁶Jesusa' pta'sxku dxi'ja's:

—Adx yuuçxáa Dxus tasxte kaapa'ja'jwa'jsath, sa' adx yuuçxáa kaypuba'jwa'jsameeth, sa' adx yuuçxáa itxi kaafxī'ze'jwa'jsath. Aça' adxpa'ga yuuçxáa maawa adx Tata tasxte pa'jya' ājatxna. ⁷I'kwe'sxa' adxa's jiyuwaça!, adx Tata ma'wēsatewa jiyune'kwe. Txā'wēçxawa āçxha' jiyu i'kwe, uyna ūsi'kwe txāa adx Tata!. ⁸Txāa adx Tata' jīte!, Fxeli'pe' na'wēk pējx:

—Jxpe'jsa, iidx Tata's āate mkaavxya'j kwe'sx uykahn. Txā'wēçxáa peejxtha'w jīte!, ⁹Jesusa' pta'sxku:

—Adxa' i'kwe'sx yakh nakwe txaçx ūsthu aça' çāçxh pa'jwa adxa's jiyumey wá'ga? Adxna uysa!, adx Tatanak uyu!. Aça' çma'wēga Tata's mkaavxya'j jīna pēyi'? ¹⁰Jiyu'çmēe wá'ga, adxa' Tata yakh bagaçxtewa nesthu yu!, aça' txā'wēy Tatawa adx yakh nesa!. Na'wē we'we'th na' peekx ūsuh yajkçxçxa txā'wē we'we'çmeeth. Tata adx yakh ūssa txāa we'wekaatheçxáath we'we!. ¹¹Jiyuçxa mneeyūuwe: Bagaçxtewa adxa' Tata yakh e'zsay ih nestha'w yu!. Txā'wē e'zīi ihne'ta fxi'ze' sūhmeçxawa, adx mjīinisaxçáatxwa uyçxa!, Tata yakh ūssaçxak txā'wē ewsatx mjī' sūhna mneeyūuwe. ¹²Isath we'we!, adxna ūuste jxpa'gasa' adx na'wēy mjīiya' ājatxna. Nawa txā'wēçxáamēe, adx mjīinite jxthaakwe wala mjīiya' ājatxna, txā'wē ājakahníçxáa adxa' u'jweçthu Tata tasxna. ¹³Sa' i'kwe'sxa' Tata's kīh pēywa'j ji'phçxawa, adxa's pēyine'kwe aça' adxa' i'kwe'sx pēyni's jxuka kxtey yu'nja, kxah Nçxi'kpa'gate Tata weçxani yuuna. ¹⁴Na'jī'th na': adxa's kīh pējxtewa jxuka kxtey yu'nja.

Jesusa' Dxus Espiritu's kaajxa' neeyūuni

¹⁵I'kwe'sxa' adxa's peeygājaççxa!, adx jxkaahnitxi' nwēese'jna kxtey myuuwe. ¹⁶Aça' adx Tata's i'kwe'sx pa'gate neewe'we'nja, i'kwe'sxtxi pu'çxwa'jsa teeçx adx na'wēysa's kaakhan. Txā' Dxus Espiritu isaxçxá's kaajiyu'jsa' txā' bagaçxtewa i'kwe'sx yakh nes yuuna. ¹⁷Naa kiwetewe'sxa' txāa Espiritu's uyya' ājameeçxa' jiyuya'wa ājameetxna, txāasa jxpa'gaya'wa ājameetxna. Nawa i'kwe'sxa' jii yā'jī'kwe, txāa Espiritu i'kwe'sx yakh ūstewa, sa' bagaçxtewa txutemēe nes yuuna. ¹⁸I'kwe'sxçxáatx nvxihtxa'wameeth. Ki' sxawedu'nja i'kwe'sx yakh ūsya!. ¹⁹Naajū' txaçxmeynaççxáa nasa' adxa's peena yu' uymeetxna. Nawa

adxa' uuwa'jsameeth, txāa pa'ga i'kwe'sxwa uuwa'jsameei'kwe, txāasa i'kwe'sx yu' adxa's uyuune'kwe. ²⁰Txajū txāa ente ew jiyune'kwe adxa' Tata yakh nes yuusatewa, naapkaçxha' i'kwe'sxa' adx yakhi'kwe nes yu' aça' adxa' i'kwe'sx yakhtu nes yu'. ²¹Adx jxkaahnitx nwēese'jna kxtey yuuna fxi'zesa' adxa's isa ūusuh jxuka yaakxsaxa txā'wē yuutxna. Aça' adx Tata' txā'wē yūusatxi' peeygājana, aça' adxwa txā'wē yūusatxi' peeygāhçxa āate vxyaana nes yu'nja.

²²Txā'jīte!, Judas Iskariotemée, vxite Judasa' na'wēk pējx:

—Jxpe'jsa, çkīh yuuçxa kwe'sxçxáatx āate vxyaaxa, vxite nasa naa kiwete'wē'sx yuutxi' vxyaamée yuuki'g? jīte!, ²³Jesus pasçxa!:

—Adxa's ūusuh jxuka yaakxsaxa' adx jxkaahnitx nwēese'jna kxteytxi yu'. Aça' txā'wē yūusatxi' adx Tata' peeygāja'k. Aça' txā'wē nwēese'jsa yakh yu' nes yu'nja'w Tata yakh. ²⁴Nawa adx jxkaahnitx nwēese'jsame!, adxa's yaakxsameeçxa txā'wē yuuna. Na'wē adx kaapiya'jnitx wēse'ji'kwe txā' adxçxāa kaapiya'jnimeeta!. Adx Tata kaapiya'jnita!.

²⁵I'kwe'sx yakh nee ūsī na'wē pta'sxiçthu. ²⁶Nawa Dxus Espiritu's Tata' kajana adx na'wēy i'kwe'sxtxi pu'çxna ūskahn txā' jxuka kaapiya'jana. Sa' na'wē kīhwa pta'sxthu txāatxi'sa' jxuka kaayaki'jina.

²⁷I'kwe'sx ūuste wēt yajkxna fxi'zewa'ja's peesuçthu. Naa kiwete wēt fxi'zewa'ja's nasa ūsu'tx txā'wēsaçxá's peesuçmeeth. Adx ma'wētka ūuste wētçxāa yajkxna fxi'ze' txā's i'kwe'sxtxi peesuçthu. Txāa pa'ga fxīkähna ūukhmée meswe. ²⁸U'jçxa ki' sxawedu'nja i'kwe'sx yakh ūsya' jīni's wēse'jyā'ji'kwe na', adxna isa wedxdxiçxa, weçxweçxa yaakine'kwe, txāa pa'gatey adxte jxthaakwesa adx Tata tasxna u'jweçthu naa pa'ga. ²⁹Dxiikhēy pta'sxiçthu, kxah adx pta'sxni kxtey yuuna pa'the', isa yuh pta'sxi'ga sūjune'kwe.

³⁰I'kwe'sx yakh jwee yu' we'wena ūsya' ājame'nja, txāa pa'gatey naa kiwete jxkaahna ūssa eçxthē'ja' adxa's kīhwa yūuya' ājane'jmeeçxawa, yuja'. ³¹Makwe ājane'jmeeçxawa kxtey yuuna, kxah naa kiwete nasa jxukaysa jiyutxna, adx Tata's nwēese'jçxa txajx jxkaahnis' kxtey yuusatewa.

Txā'jīna jxā'jçxa!, kiiteçxa ayjxu u'jwega jīk.

Maawa Jesus yakh txutemée fxi'zewa'j

15 ¹Adxī ū'tasx na'wēsath, aça' adx Tata' txāa tasxa's pheu'jsa na'wēsa!. ²Ku'ta yūnsameetxi' spē'the'k, nawa ku'ta yūnsatxi' sūupi'jna pheu'ju'k jxthaakwe yūnkahn. ³I'kwe'sxa' pheu'jniyā'j ūsi'kwe adx kaapiya'jni's nwēese'pha'ga. ⁴Adx yakh txutemée meswe, adxwa ma'wē i'kwe'sx yakh txutemée ūstka txā'wēy. I'kwe'sxa' peekx jii i'kwe: ku'ta çxpiteçxa ūssa' yūnu'çme!. Txā'wēy i'kwe'sxwa adx yakh txuteeçxa ūsçxa!, Dxus dxi'pte selpiiya' ājameene'kwe.

⁵Adxa' ū'tasx na'wēsath aça' i'kwe'sxa' ū'tasx ku'ta na'wēsa i'kwe. Adx yakh txutemée ūsçxa!, wala selpiine'kwe. Aça' adxwa i'kwe'sx yakh

txutemée fxi'ze'nja. Adx yakhmée yu', i'kwe'sxa' kīh yuhwa yūuya' ājameene'kwe. ⁶Aça' ũ'tasx ku'ta yūnsameetxi' ma'wēga spēethe'thçxa ya'kabu', txā'wēy ya'yuuna adx tasxu txutesatxi'.

⁷I'kwe'sxa' adx yakh txutemée fxi'zeçxa adx kaapiya'jni's peçxkanameeçxa', kīhwa pēyine'kwe, aça' ya'ūsuna. ⁸Adx kaapiya'jni's nwēese'jçxa' Dxus dxi'pte wala selpiia' ājane'kwe. Aça' txā'wē yūute', adx Tata's wala tuuthe'jni yuuna. ⁹Adx Tata' adxa's wala peeygāja'k, aça' adxa' txā'wēythu i'kwe'sxtxi peeygāja'. Aça' adx peeygānijū txutemée meswe. ¹⁰Adx jxkaahnitx nwēese'jçxa', adx peeygāaniteçxáa fxi'zene'kwe, adxwa ma'wētká Tata jxkaahnitx nwēese'jçxa' txajx peeygāaniteçxáa fxi'ze' txā'wēy.

¹¹Na'wēth pta'sx kxah adx ma'wētká weçxweçxa yajkxna fxi'ze', i'kwe'sxwa txā'wēy bagaçxwa weçxweçxa yajkxna fxi'zene'kwe. ¹²Adxa' na'wēth jxkaaja': adx ma'wētká i'kwe'sxtxi peeygāja', i'kwe'sxwa txā'wēy puutx ya'peeygāhna mfxi'zewe. ¹³Namiku's nwe'weya' sūhçxa peekx itxi fxi'zeni's ivxiitunisaçxáa peeygāni yaase'. ¹⁴I'kwe'sxa' isa adx namiku dxihçxa', adx jxkaahni's kxtey yuune'kwe. ¹⁵Aça' txā'wē yūusatxi' peena yu' selpisáa jīna kxsusme'nja. Selpisá' txajx patron kīh yuuya'watewa jīmēek fxi'ze'. Nawa i'kwe'sxa' adx Tata we'wenitxi' jxuka jii i'kwe, txāa pa'ga adxna selpisáa i'kwe jīna kxsusmée, adx namiku i'kwe jīnaçxáa kxsuusunja. ¹⁶I'kwe'sx khuē'y adxa's txhitxhmeei'kwe, wejxwa adxthu i'kwe'sxtxi txhitxh. Sa' i'kwe'sx mteewa u'jçxa Dxus dxi'pte selpiina fxi'zekahnthu neewe'we', aça' i'kwe'sx txā'wē Dxus dxi'pte selpiina u'juni' kxul yuumeena. Txā'wē yūusatxi' adx Tata' jxuka ũsuna kīh pējxtewa, adxa's pi'kççxa pējxte'. ¹⁷Na'wē yūuwa'ja'sthu i'kwe'sxtxi jxkaaja': Puutx ya'peeygāhna mfxi'zewe.

Jesus txhitxnisatxi' naa kiwetewe'sx açeni

¹⁸Naa kiwetewe'sxa' adxa's nyafxkhēytxi ahçe na' i'kwe'sxtxiwa txā'wēyçxáa açetxna, nawa nxusmée meswe. ¹⁹I'kwe'sxa' naa kiwetewe'sxwaça', nasa' wedxitxna, txāawe'sx pwe'sx ma'wēta wedxi' txā'wēy. Nawa adxa' i'kwe'sxtxi txhitxthu naa kiwejū, txāa pa'gatx naa kiwetewe'sxa' i'kwe'sxtxi açe', naa kiwetewe'sxmée yā'jil'kwe naa pa'ga. ²⁰Miiyajxwe adx na'jīna we'weni's: Maawa selpisá' txajx patronte jxthaakwesame' jīni's. Adxa' i'kwe'sxtxi jxpe'jsath na's yuhwa ikhya' pakwe'tx na' i'kwe'sxtxiwa txā'wēyçxáa ikhya' pakweetxna. Sa' adx kaapiya'jni's nwēese'jsa', i'kwe'sx kaapiya'jni'swa nwēese'jetxna. ²¹Adx pa'gaçxáa i'kwe'sxtxi pkxuutxna, adxna kaahsa's jiyumeeçxa.

²²Dxus jxkaahni's adx pta'sxya' kīhmeewaça', txāawe'sxa' yuuwemeesa yuutxna. Nawa açxha' adx pta'sxni's jiyutx na' yuuwemeetha'w jīya' ājameetxna. ²³Adxna açesa' adx Tatanawa açesata'. ²⁴Txāawe'sx kxsavxysu kim yuhwa vxit-ya' ājanimeesa's adx kaavxya'ja'jmeewaça',

yuuwemeesa yuutxna. Nawa makwe txã'wě adx ãjani's kaavxya'ja'the uyçxawa, adxna açe'tx. Aça' adxna açesayã'j yu' adx Tatanawa açesata'. ²⁵Nawa txãawe'sx leyte na'wě fxi'jni ũsa': adxna ahçetx kîhwa yuuwemeetewa jî'k txã' kxtey yuukahntxi txã'wě yũ'.

²⁶Nawa i'kwe'sxtxi pu'çxwa'jsa Dxus Espiritu isa ew kaajiyu'jwa'jsa's adx Tata tasxu kaja'nja txã' adx kimtewa ew kaajiyu'juna. ²⁷Aça' i'kwe'sxwa txã'wěy adx kimtewa pta'sxine'kwe, i'kwe'sxa' nyafxí i'kwe adx yakh ũssa yu' naa pa'ga.

16 ¹I'kwe'sxtxi pkuute', nxusna wala kuh yaakxkahmen na'wě pta'sxiçthu: ²ahççxa judiwe'sx pkhaakhenijũ kutxi'jçxa peena yu' jxpa'gameetxna i'kwe'sxtxi. Sa' txã'wěçxáa yũmée i'kwe'sx maaítixi' ikhetxna, nawa txãawe'sx yu' Dxusa's selpiina ũstha'w sũhna txã'wě yũutxna. ³Txãa açesawe'sxa' adx Tata's jiimeeta', sa' adxnawa jiimeeta', txãasa txã'wě pkuutxna. ⁴Aça' kxahth yaçkhëy txã'wě pta'sxi' na' txã'wě yũuwa'j en ähte', adx pta'sxni's yaakine'kwe.

Dxus Espiritu kaajiyu'jni

Txã'wě pkuuwa'ja's nyafxí yu' pta'sxmeeth, txãa pa'gatey kîhwa meek yu' adx i'kwe'sx yakh ũste'. ⁵Nawa açxha' adxna kaahsa tasxte u'jweçthu. Nawa i'kwe'sxa' maa yuhwa pëyi'çmeei'kwe çmtee u'jweçga? jina. ⁶Txã'wě pëjxmeeçxa i'neççxáa i'kwe wala nxusu', adx u'jweçthu jina pta'sxte'. ⁷Nawa isath pta'sxi': adx u'jmeete', i'kwe'sxtxi pu'çxwa'jsa' kîhmeena. Nawa adx u'jçxa', txã's kaja'nja. Txãa pa'ga pejka u'jwa'j yuh jî'pthu, i'kwe'sxtxi pu'çxwa'jsa's kaajxa'. ⁸Aça' txã' naa kiwete kîhçxa', nasatx Dxus dxi'pte yuuwe pkalsa yuhtha'w sũhwa'ja's kaaũsuthel'jena. Sa' Jesusa' kîhte yuhwa yuuwemée ewsa maatxwa jxuka nwe'wewa'jsa yuh yu'ga sũhwa'ja'swa ew kaajiyu'juna. Txã'wěy yuuwesatxi' Dxusa' ewmeete yuh nvxiituna sũhwa'ja'swa kaaũsuthel'jena. ⁹Maawa adxa's jxpa'gaya' wa'lpaga txã'wě pkaal yuuwesata'. ¹⁰Adxa' maatxwa jxuka nwe'wewa'jsaçxaí nwe'wewa'ja's vxitna uuçxa adx Tata tasxna u'the', peena yu' uymeene'kwe. ¹¹Sa' yuuwesa' ewmeete neeyũuwa'jsane'tka'w sũjkahní naa kiwete jxkaahna ũssa eçxthë'j yuja'swa ewmeete yã'kh nvxiitni yuu.

¹²I'kwe'sxtxi wala pta'sxwa'j jî'phíçxáath, nawa açxhí yu' ew jiyuya' ãjameene'kwe. ¹³Nawa Dxus Espiritu kîhçxa', txãa ente i'kwe'sxtxi' jxuka ew kaajiyu'juna, txã' isa we'wenisaçxá's kaajiyu'jsa'. Txã' peekxçxáa we'wemée, Dxus kwe'wel'jniçxá's pta'sxina, sa' kîh yuuya'watewa dxiikhëy kaajiyu'juna. ¹⁴Adx ma'wësatewa ew jiia' na' txãasa i'kwe'sxtxiwa kaajiyu'juna, adxa's tuuthel'jsa' naa pa'ga. ¹⁵Adx Tata ma'wësate', adxwa txã'wěysa íçxáath. Txãa pa'ga Espiritu' adx ma'wësatewa wejx ew kaajiyu'juna jînath pta'sxi'.

Nxuswa'j en skhëwte', weçxa en pa'jni

¹⁶Ãçxha' adx Tata tasxna u'jwa'j ãjáça', açá' adxa's uymeene'kwe. Nawa vxite enkhë' adxa's ki' uyuune'kwe.

¹⁷Txã'jíte!, txãa yakh u'jusawe'sxa' na'wẽtx puutx ya'paapëyi!:

—¿Ma'l'jĩçxaki'k txã'wẽ we'we'? Açxha' adx Tata tasxna u'jwa'l'j ajaça', aç'a' adxa's uymeene'kwe. Nawa vxite enkhê' ki' uyuune'kwe jĩ'k sa', ¹⁸¿kĩh we'weçxaki'k adx u'jwa'l'j ajaça' jina we'we'? nawa kwe'sxa' jiyu'çmeetha'w.

¹⁹Txã'wẽ jiyuwëena üsni's Jesusa' jiyuçxa' pta'sxku:

—Adx Tata tasxna u'jwa'l'j ajaça', aç'a' adxa's uymeene'kwe. Nawa vxite enkhê' ki' uyuune'kwe jĩnath we'we aç'a' ¿txã'sna wá'kwe i'kwe'sx pwe'sx jiyu wëena puutx paapëyi'? ²⁰Isath we'we': I'kwe'sxa' nxusna ü'nene'kwe, aç'a' naa kiwete nasa yu' wala weçxaatxna. Nawa i'kwe'sxa' makwe nxusna üsçxawa, nxusu en skhẽwte', weçxweçxa neeyüune'kwe. ²¹Na's mjiyuwe: U'ywa nasa upxya'wate aç'a'aççxa', wala pxthaa yu'k akate. Nawa luuçx upxte', weçxaweete txãa aka yuuni's peçxkana'k. ²²Txã'wëy i'kwe'sxwa açxhíi yu' nxusu'i'kwe. Nawa adxa's ki' uyçxa', weçxweçxa yajkxna neeyüune'kwe. Aç'a' i'kwe'sx weçxweçxa yaakxni's kim yuhwa kusa'jya' ajameena.

²³Txã'wë adxa's ki' uyniijü', txajüyã'ja' jxuka jiisa adxa's paapëywa'j ji'phumeene'kwe. Nawa adx Tata yu'sa' kĩhwa jxuka pëjxya' ajãne'kwe adxa's pi'kxçxa, aç'a' txã' jxuka üsuna. ²⁴Nawa i'kwe'sxa' açxh pa'jwa adx Tata's kĩh yuhwa pëynimée i'kwe adxa's pi'kxçxa. Mpëjxwe wakx, sa' jxpa'gaçxa' wala weçxaane'kwe.

Kristo' kĩhnawa jxuka knayni

²⁵Ejemplo yakhçxáath kaaja'da'jna pta'sx i'kwe'sx jiyukahn. Nawa äate pta'sxwa'l'j en ähte', peena yu' ejemplo yakh kaaja'da'jna pta'sxme'nja, wejxwa teehwed äateçxaçxáa pta'sxi'nja adx Tata ma'wësatewa. ²⁶Txã'wë äate pta'sxwa'l'j en ähte', i'kwe'sx yuu adx Tata's pëjxya' ajane'kwe, makwe adx yu' i'kwe'sx pa'gate we'we pu'çxmeetewa. ²⁷I'kwe'sxa' adxa's wedxçxa jxpa'gai'kwe, Dxus tasxu yuusana sũhna. Txãa pa'gak adx Tata' i'kwe'sxtxi peeygãja'. ²⁸Adxa' Tata tasxu kasehçxa, naa kiwete yuwe'th, sa' açxha' naa kiwe's nvxihtçxa ki' u'jweçthu adx Tata tasxna jíte', ²⁹txãa yakh u'jusawe'sxa' na'l'jĩtx:

—Açxh yuuçxa' ejemplo yakh kaaja'da'jmée, teehwed äate pta'sxna üsgu. ³⁰Açxha' jiyutha'w, idxa' kĩhnawa jxuka jiig. Txãa pa'gatha'w ew jiyu Dxus tasxu yuusatewa. Txãasa kim yuhwa idxa's paapëywa'l'j ji'phmeeta' jíte', ³¹Jesusa':

—¿Açxha' jiyu'kwe'? jĩnak we'we. ³²Açxha' ena' ajk, aç'a' açxhíi i'kwe'sxa' teeçxsa na'wëçxah fxiifxii txuteene'kwe, sa' adxçxána nvxiitune'kwe. Nawa adxçxáa yu' neeyüume'nja, Tata' adx yakh üsa' naa pa'ga. ³³Txã'wëth adx yakh fxi'zewa'ja's jxuka pta'sxi', kxah adxa's neewe'weçxa', üukhmée wëtwëth yaakine'kwe. Naa kiwete' thëyte nxuste fxi'zewa'ja's ji'phune'kwe. Nawa adxa's çxhãçxha miiyajkxwe, txãa pa'gatey naa kiwete ewmeesa's adxa' knayyã'th naa pa'ga jĩk.

Jesusa' txajx jxpe'jnisatx Dxus kusete neewe'weni

17 ¹Jesusa' txã'wě pta'sxna jxã'jçxa', cielute pagayçxa Dxus yakh puutx we'wek na'jina:

—Tata, ena' ajk. Iidx Nçxi'k kimtewa nasa jiyukahn äate mkaavxya'ja', kxah Nçxi'kwa idxa's äate kaajiyu'juna nasatx. ²Nasa jxukaysatx jxkaahwa'ja's adxna üsgu, iidx üsni yuutxi' jxukaysatx pçuwa'jmée itxi fxi'zewa'ja's üskahn. ³Aça' pçuwa'jmée itxi fxi'zewa'ja's ji'phu wěççxa', teeçx Dxusçxáa üsgu txã'sna jiyuwa'lj ji'phta', sa' txã'wěy iidx kaahnisa Jesukristo'swa jiyuwa'lj ji'phta'.

⁴Adxa' naa kiwetewe'sxtxi' ew kaajiyu'th idx ma'wēsatewa, sa' idx mjii kaahni's jxã'jyã'th. ⁵Tata, naa kiwe meetey ma'wētk'a'w cielute ih weçxana üsu', açxha' txã'sa' ki' mah kxtey ih weçxana üswa'ja's.

⁶Naa kiwejü maafitxi' txhitxgu, aça' txäawe'sxtxi' kaajiyu'th idx ma'wēsatewa. Txäawe'sxa' iidx jii'tx yu', nawa adx jxpe'khangü üs, aça' txäawe'sxa' nwēese'jtx iidx jxkaahni's. ⁷Sa' na'wē kījkihwa yūuya' aja'th txäa ajanisa' iidx jxkaahnitxna sühwa'ja's ji'phutx. ⁸Idx yuwe pta'sxkaahg txã'sa' pta'sxthü, aça' txäawe'sxa' jxpa'gaçxa üuste yu'akhtxi. Sa' adxa' Dxus kaahnisa iidx tasxuh yuusatewa jiita'.

⁹Adxa' txäawe'sxtxi' iidx kuseteth nvxihtna neewe'we'. Naa kiwete idxa's jiimeesa üsta' txäawe'sx pa'gate neewe'we'çmeeth. Adx jxpe'khan üsgu txäawe'sx pa'gateçxáath neewe'we', txäawe'sxa' iidx jiita' naa pa'ga. ¹⁰Jxuka adx ji' iidx jiiçxaçxáata'. Aça' jxuka iidx ji' adx jiiçxaçxáata'. Txäawe'sxpa'ga yuuçxáath txakwe wala weçxaawa'ja's ji'phu.

¹¹Adxa' naa kiwete txaçxmeeçxáa üswa'lj ji'phthü. Nawa txäawe'sxa' naa kiwete neeyüutxna, naapkaçxha' adxa' yuhth idx yakh üsya'. Tata, adxna üsgu txäawe'sxtxi meen jxpe'j jxpa'yakx, kxah teeçxsa na'wēçxah idx yakh txutemée fxi'zetxna adxwa ma'wētk'a'w idx yakh txutemée fxi'ze' txã'wěy. ¹²Adxa' naa kiwete txäawe'sx yakh üsçxa', idx pu'çxte' jxpa'yakxthü jxpe'jna fxi'ze adxa's jxpe'khan üsgu txäawe'sxtxi's. Aça' jxukaysa yu' vxitumeeta', naasáa teeçx vxituwa'ljsane' yu' txäa yuuçxáak vxitu, Dxus librute pta'sxna fxi'jni' kxtey yuukahn.

¹³Äçxha' yuhth idx üsgu kxteey. Nawa naa kiwete nee üsí txã'wēth idxa's neewe'we', kxah txäawe'sxa' üukhmée weçxana fxi'zetxna, adxwa na'wēth weçxana fxi'ze' txã'wěy. ¹⁴Iidx pta'sx kaahni's pta'sxthü adx jxpe'jnisatxi', nawa naa kiwetewe'sxa' txäawe'sxtxi açe'tx, adx jxpe'jnisawe'sxa' adx na'wěy naa kiwetewe'sxmeeta' naa pa'ga. ¹⁵Adx jxpe'jnisatxi' naa kiwejü mkuutxi'lj jii'çmeeth, naasáa eçxthē'lj kaypuba'khamen meen nwe'we jinaçxáath neewe'we'. ¹⁶Adxa' naa kiwetewe'sxmeeth, aça' txäawe'sxwa naa kiwetewe'sxmeeta'. ¹⁷Txäawe'sxa' iidx jiiçxáa yuukahn idxçxáa jxpe'jene'ga, isasa's kaapiya'jna. Iidx kaapiya'jni' kaypuba'ljwalsame'. ¹⁸Idxwa ma'wēga

adxa'sa' naa kiwete kaah, txã'wëy txãawe'sxtxiwa kajaçthu. ¹⁹Sa' txãawe'sx pa'gate adxwa iidx kusete neeyüuçthu, kxah txãawe'sxwa iidx jxpe'jwa'jyã'lj neeyüutxna.

²⁰Txãawe'sx pa'gateçxáa neewe'weçmeeth. Txãawe'sx iidx yuwe's pta'sxte!, maawa idxa's jiyuwa'jsa üstxna txãawe'sx pa'gate ja'dath neewe'we!. ²¹Txãawe'sx jxukaysa teeçxsa na'wëçxaçxáa yajkxna kwe'sx yakh txutemée fxi'zekahnthu neewe'we!, Tata, idxwa na'wë adx yakh fxi'zena üsgu açá' adxwa idx yakh fxi'zena üsthu txã'wëy yuukahn. Txã'wë yuuçxa teeçxsa na'wëçxaçxáa ih fxi'zetxna, kxah naa kiwetewe'sxa' jiyutxna adxa' iidx kaahnisatewa. ²²Idx yakh ih fxi'zewa'ja's adxa's üsgu açá' txãawe'sxtxiwa idx yakh ih fxi'zewa'ja's adxa' üsthu, adxwa idx yakh ma'wëtka'w teeçxçxáa na'wë fxi'ze' txã'wëy ih fxi'zekahn. ²³Adxa' txãawe'sx yakh fxi'zete!, idxwa adx yakh fxi'zene'ga, kxah txãawe'sxa' teeçxçxáa na'wësa yuutxna. Açá' txã'wë yüute!, naa kiwetewe'sxa' jiyutxna adxa' iidx kaahnisatewa. Sa' adxa's ma'wëga peeygäja', txã'wëygu peeygäja' naawe'sxtxiwa.

²⁴Tata, adxa's jxpe'khan üsgu açá' txãawe'sxtxi' adx üsnitey ihth üs jxthäasu!, naa kiwe meetey adxa's peeygähçxa weçxana jxpe'jna üsu'g txã'sa' uykahn. ²⁵Tata, idxa' wala yuh ewsatewa, naa kiwetewe'sxa' idxa's jiimeeta!. Nawa adx yu' jiith, açá' adx jxpe'jnisawa jiita' adxa' iidx kaahnisatewa. ²⁶Adx jxpe'jnisatxi' kaajiyu'th idx kimtewa, sa' kaajiyu'jna nes yu'nja, kxah idx adxa's peeygäani' txãawe'sx üuste nes yuute!, adxwa txãawe'sx üuste nes yu'nja.

Jesusa's preesu'jni

(Mt 26.47-56; Mr 14.43-50; Lk 22.47-53)

18 ¹Jesusa' txã'wë neewe'wena jxã'ljçxa', Cedron yu'kuten ktejkana u'kh, txãa yakh u'jusawe'sx yã'ljçxa teeçx walta üsa' kxtee u'kaya!.

²Txãa waltate! Jesus yakh u'jusawe'sxa' maz uswa txãa yakh pkhaakheya' u'kasatx yu!, naa pa'gak Jesusa's ikhkahn dukhwa'jsa Judasa' jii yu!.

³Txãasak Judasa' jiiyã'ljçxa', soldauwe'sxtxi pe'ljçxa kxtee pa'lj u'l dxiuus yat thegsawe'sx yã'ljçxa. Txãa dxiuus yat thegsawe'sx yu!, sacerdote npiichthë'j vxite' fjariseowe'sx jxkaahnitx yu!. Vxite' fxtü, vxite' kçxilx, vxite' lampara atçxatx pa'lj. ⁴Nawa Jesusa' txã'sna ma'wëwa pkxuuçxa ikhwa'lj ähte jiiyã'ljçxa', puutx uyya' kasejk. Sa' na'ljik:

—¿Kimnakwe pakwé'? jíte!, ⁵txãawe'sxa' na'wëttx pas:

—Jesus Nasarethuwe'sxa'stha'w pakwé' jíte!, Jesusa' na'ljik:

—Adxíi txãath.

Açá' Judaswa kxtee txãawe'sx yakh üsu'k, Jesusna kuuwe'jna. ⁶Txajü' adxíith jina Jesus we'weniteçxáa, Jesusa's tudwa'jsa' e'su ya'skaçxa kiwegatx wete. ⁷Açá' Jesusa' ki' pëjxku:

—¿Kimnakwe pakwé'? jíte!, txãawe'sxa':

—Jesus Nasarethuwe'sxa'stha'w pakwé' jīnatx pas.

⁸Aça' Jesus pasçxa':

—Adxíith jīna pta'sxyā'th. Aça' adxa's pakweeççxa', adx yakh u'jusawe'sx ayte ūsta' txāawe'sxtxi' kuçx yuunuwe u'khan jīk.

⁹Jesusa' nyafxíi we'weçxa': Tata adxna jxpe'khan ūsku txā' jxukaysa yu' vxitumeeta' txā'jīni' kxtey yuukahnku txā'jī.

¹⁰Naapkaçxha' Simon Pedro' kçxilx ya'kxnisa's jxkuutxi'jçxa teeçx piçthē'j thū'wē paçuwe'sxa'sku spē'th. (Txāa piçthē'ja' sacerdote npiičthē'ja's selpisāa Malko yaasek yu'.) ¹¹Aça' Jesusa' Pedro's na'jīnak jxkaah:

—Kçxilxa's wainutey myu'akh. Adx nxuste pxthaa yuuwa'ja'sku Tata' jxthāasu' aça' txā'sa' jxpa'gawa'jsameena sūju'wá'ga jīk.

Jesusa's Anas tasxna jxūna u'jni

(Mt 26.57-58; Mr 14.53-54; Lk 22.54)

¹²Txajū' soldau npiičthē'j txajx nasa yakh vxite' dxuus yat thegsawe'sx yā'jçxa Jesusa's tudçxa', ¹³Anas tasxna khu'e'y jxūna u'jtx. Txāa Anas duh Kaifxasa' sacerdote npiičthē'kh yu' txāa anxute. ¹⁴Txāa Kaifxasíik judiwe'sxtxi na'jīna we'wesa yu': Nasa jxukaysa pa'gate teeçx piçthē'jçxāa uuwaç wejx ewna jīsak yu'.

Pedro ĩsxiini

(Mt 26.69-70; Mr 14.66-68; Lk 22.55-57)

¹⁵Jesusa's tudçxa jxūna u'the', Simon Pedro' vxite piçthē'jyā'jçxa Jesus e'stey u'kh. Txāa vxite piçthē'j yu' sacerdote npiičthē'j yakh jīsak yu', txāa pa'ga txāa npiičthē'jsa yat patxute u'kak Jesus u'kanitey. ¹⁶Nawa Pedro' u'kamée vxitx pukate neeyūuk. Txāasak sacerdote npiičthē'j yakh jīisa' kxtee vxitxte thegsa yakh puutx we'weçxa Pedro's dxiite ka'ga'j. ¹⁷Aça' vxitxte thegsa' pējxku Pedro's:

—Idxa' ¿naa piçthē'j yakh u'jusameegá'? jīte', Pedro pasçxa':

—Txāa yakh u'jusameeth jīk.

¹⁸Txajū' kxtee selpisaawe'sx vxite' dxuus yat thegsawe'sx yā'jçxa kumaçxa ipx yuthçxatx bajçxna ūsu' patxute. Aça' Pedrowa kxtee txāawe'sx yakh ipx pukate bajçxna ūsu'k.

Anas Jesusa's paapēnyi

(Mt 26.59-66; Mr 14.55-64; Lk 22.66-71)

¹⁹Txajū' Anasa' paapējxya' takhku Jesusa's:

—Idx yakh u'jusawe'sxa' ¿kimtxna? aça' idxa' ¿kīhga kaapiya'ja'? jīte',

²⁰Jesusa' na'jīnak pas:

—Adxa' āateçxaçxāa iwe'weth nasa jxukaysa dxi'pte, judiwe'sx pkhaakhenisu vxite' dxuus yatte judiwe'sx jxukaysa ksxavxyte Dxus

yuwe's kaapiya'ljna. Adxa' paaçte yu' kîhwa iipta'sxmeeth. ²¹Aça' adxa's çkîjxa'ga paapēyi'? Adx pta'sxni's wēse'jsatx mpaapējx, aça' txāawe'sxa' pta'sxixna adx kîh we'weni'swa. Txāawe'sxa' adx pta'sxni's jiita' na'.

²²Txā'wē we'wete', dxuus yat thegsawe'sx teeçx kxtee ūssa' kuseju Jesus dxi'pga pehtxaçxa', na'wēk juuna' we'we:

—Anasa' sacerdote npiçthē'ja' aç yuja' çtxā'wē pasu'gá'? jîte', ²³Jesus pasçxa':

—Adx ewmée we'wete', mpeeta'sx kîhsu ewmée we'weçtewa. Nawa ewsaçxá's we'weçte', çma'wētega adxa's txā'wē pkxú'? jînak pas.

²⁴Txā'wē yūunijū' Anasa' Jesusa's tudni ūsîn, jxūna u'khaakh sacerdote npiçthē'j Kaifxas tasxna.

Pedro ki' îsxiini

(Mt 26.71-75; Mr 14.69-72; Lk 22.58-62)

²⁵Naapkaçxa' Pedro' ipx pukate bajçxna ūsiçxáak yu'. Aça' kxtee ūssawe'sxa' na'wētx pējx:

—Idxa' çnaa piçthē'j yakh u'jusa yuh meega wakx? jîte', Pedro':

—Adxa' txāameeth jînak pas.

²⁶Aça' sacerdote npiçthē'ja's selpisáa teeçxsa' na'jînak pējx:

—Idxa's çuymeewá'ntka waltate txāa yakh ūste? (Txā'jîna pēysa' Pedro teeçx piçthē'j thū'wē's spē'thku txāa piçthē'j nwe'sxku yu').

²⁷Txā'jîna ki' pējxte', Pedro' ki'kin îsxiijaçpkaçxa', atalxa' we'wek.

Jesusa's Pilato tasxna jxūna u'jni

(Mt 27.1-2, 11-14; Mr 15.1-5; Lk 23.1-5)

²⁸Txajū' Kaifxas yatu Jesusa's jxūna u'jtx ne'jwe'sx Pilato tasxte nuypa'jya'. Naapkaçxa' khikhiiçku yu'. Txajū' judiuwe'sxa' ne'jwe'sx u'pnite u'kameeta', pkal pēetheejena sūhçxa. Txā'wē pkal pēetheethe', Paskuatewe'sxa's ū'ya' ājame'nja'w sūhçxatx u'kamée. ²⁹Txāa pa'gak Pilato' eka kasehçxa' na'jîna paapējx:

—Naa piçthē'ja' çkîhga yuu aç txā'wē pāatxhî'khna yujkwe? jîte', ³⁰txāawe'sxa' na'wētx pas:

—Kîhwa yuuwemeewaça', iidx tasxte nuypa'jwa'jmeene'tka'w yu' jîte', ³¹Pilato' na'jînak jxkaah:

—Jxūna me'jwe, sa' i'kwe'sx ley ma'wē jxkaathe', kxtey yuune'kwe jîte', judiuwe'sxa' na'jînatx we'we:

—Kwe'sxa' judiuwe'sxtha'w na' çma'wē ikh kaajxa' ājakxtha'w?

³²Jesusa' ma'wē uuwa'jsaçxawa pta'sxku txāa pta'sxni' kxtey yuukahntxi txā'jîna we'we.

³³Txajū' Pilato' txajx u'pnite ki' kūhçxa', Jesusa's pa'yaçxa na'wēk paapējx:

—çIdxa' judiuwe'sxtxi jxkaahsawá'ga? jîte', ³⁴Jesusa' na'jîk:

—¿Iidx ūusuh yajkxçxaga txã'jî'á? meeçxa' çvxitesa txã'jîna adxa's kxsuusni's wêse'jçxawá'ga txã'jî'? jîte', ³⁵Pilato' na'wêk pas:

—Adxa' judiumeeth. Iidx nwe'sx vxite' sacerdote npiiçthê'jwe'sxtxi adx tasxte idxa's nuykûh, aça' idxa' çkîhga ewmée yûu? jîte', ³⁶Jesusa' pta'sxku:

—Adx jxkaahwa'ja' naa kiweteme!. Txã'wê naa kiwete jxkaahwa'jsawaça', adx ju'gusawe'sxa' puiiwa'jne'ta yu', judiuwe'sx kusete adxa's dukkahmen. Açá' naa kiwete jxkaahsameeth.

³⁷Txã'jîte', Pilato' ki' pějxku:

—Txã'wêçxa' çidxa' jxkaahsa dxihgá'? jîte', Jesusa' na'jik:

—Idx kxsusu'g txã'wêiith. Naa kiwete upxçxa isasaçxáana pta'sxya'th yuwé!. Maawa isasa's nwêese'jwa'jsa' adx we'weni's jxpa'yakxtxi wêse'je' jîte', ³⁸Pilato' na'wêk paapějx:

—Na'wê isasa' jîna we'we'g txã' çkîhna?

Jesusa' ikhwa'j yuuni

(Mt 27.15-31; Mr 15.6-20; Lk 23.13-25)

Txã'wê Jesusa's paapějçxça', Pilato' ki' eka kasejk judiuwe'sxtxi na'jîna pta'sxya':

—Naa piçthê'j ewmée yûuni's kîhte yuhwa uyu'çmeeth. ³⁹Nawa Paskua fxiesta iisa teeçx preesu kaatxhweete'je'i'kwe na' çaçxwa txã'wêy txhweete jxthâasu'kwe' naa judiuwe'sxtxi jxkaahsa's? jîte', ⁴⁰jxukaysa na'jîtx:

—Txã'sa' kaatxhweete'jnu. Barabasçxá's mkaatxhweete'j jînatx weyi'.

Txãa Barabasa' iiméh jxthaakwe pesweesak yu'.

19 ¹Txajû' Pilato' Jesusa's jxûna u'jçxa peçxuukwekaakh. ²Aça' soldauwe'sxa' çhũçhna tadx vxitçxa Jesus dxikthete kaafxikhe'jtx, sa' atxh behsa's kaapá'çxi'jçxatx na'jî':

³—jVxiwa, judiuwe'sxtxi jxkaahsa! Txã'jîçxatx dxi'pga petxaatxa.

⁴Txajû' Pilato' ki' eka kasehçxa' na'wêk we'we:

—Mthegwe, naa piçthê'ja' ayte ūsa', nawa txã'sa' makwe paapějçxçawa txajx ewmée yûuni's uymeeth.

⁵Txã'jî yã'the', Jesusa' kasejk dxikthete çhũçha's tadxçxa kaafxikhe'jni, sa' atxh behsa's kaapá'çxi'jni. Açá' Pilato' na'jînak we'we:

—Åçxha' ayte ūsa' txãa piçthê'ja's mthegwe.

⁶Txã'jîte', sacerdote npiiçthê'jwe'sx vxite' dxuus yat thegsawe'sx Jesusa's thegçxa' na'jînatx sus weyya' kiite:

—Kluuste mkaafxuçu'j, kluuste mkaafxuçu'j jîte', Pilato' na'jik:

—I'kwe'sx jxpa'gaçxa kluuste mfxuçwe. Adxa' kîh yuhwa ewmée yûuni's jiyuya' ajameeth jîte', ⁷judiuwe'sxa' na'jînatx we'we:

—Kwe'sxa' ley ji'ptha'w txãa leya' ikhkaja'k, Dxus Nçxi'kthu jîna u'ljupa'ga.

⁸ Txã'jîni's wêse'jçxa', Pilato' jwee'fiçxáak wala ũukhwa'j ji'phu. ⁹ Sa' txajx u'pnite u'kaçxa', na'jînak Jesusa's paapêjx:

—Idxa' ¿majũwe'sxga? jítewa, Jesusa' pasme'.

¹⁰ Aça' Pilato' na'jîk:

—¿Adxa's kîh yuuçxaga pasu'çmêe? ¿Jiimeewá'ga? adxa' kluuste fçuçkahn jxkaajxa'wa âjawa'jsath, sa' txã'wêy kaatxhweete'jya'wa âjawa'jsath jíte', ¹¹ Jesusa' pasku:

—Dxuspa'gameewaç'a', idxa' kîjxa'yuhwa âjawa'jsameeg adxa's. Nawa iidx kusete adxa's dukhsa' idxte jxthaakwe yuuwesa'.

¹² Txã'jîna we'wenijũ' Pilato' wala pa'pçxuk Jesusa's txhweetewêçxa. Nawa judiuwe'sxa' na'jînatx sus we'we:

—Naa piçthê'ja's txhweteçxa', jxkaahsa Cesar namikumêe yuune'ga. Maawa fxiy jxkaahsa' txã' Cesar ju'gusame'.

¹³ Txã'jîni's wêse'jçxa', Pilato' Jesusa's ekate pe'jna u'jçxa', jxkaahna u'pnite kaçxku. Txãa jxkaahna u'pni' Gabata yaasek yu' hebreo yuwete. Txã' Kwet Fxuçni jîni'. ¹⁴ Paskua fxiesta âjaçtek txã'wê yũuna ũsu'. Txajũ' Pilato' na'wêk we'we judiuwe'stxxi:

—I'kwe'stxxi jxkaahsa' ayte ũsa' jíte', ¹⁵ txãawe'sxa' na'wêtx sus we'we:

—¿Peekx uuna, kluuste mfxuç! jíte', Pilato' na'wêk we'we:

—I'kwe'stxxi jxkaahsa yuja's, ¿ma'wê kluuste fçuç kajaki'th? jíte', sacerdote npiçthê'jwe'sxa' na'wêtx we'we:

—Kwe'stxxi jxkaahsa' Cesar yuuçxá'. Vxite jxkaahsa yu' ji'phmeetha'w.

¹⁶ Txã'wê we'we yã'the', Pilato' Jesusa's txãawe'sx kusete kluuste fçuçkahn dukhte', jxũna u'jtx.

Jesusa's kluuskhê fçuççxa ikhni

(Mt 27.32-44; Mr 15.21-32; Lk 23.26-43)

¹⁷ Jesusa' txã'sna fçuçwa'j kluusa's yakhçxa çxhabu kasehna u'kh, teeçx ahte Gólgota yaase' kxtee pa'j. Txãa Gólgota yu', Uusáa Jxkwet Dxi'th jîni' hebreo yuwete'. ¹⁸ Kxtee pa'jçxa' Jesusa's kluuste fçuçtxi, vxite e'z piçthê'jtx txã'wêy, Jesusa's pxãhte txahçxa. ¹⁹ Txajũ' Pilato' kluus kajkwete na'wêk ki'p kaah: Jesus Nasarethuwe'sx, judiuwe'stxxi jxkaahsa jîna fxi'jîni's. ²⁰ Aça' kluuste fçuçni' çxhab utxatek yu', naa pa'ga maazkuêe judiuwa txãa fxi'jîni's thegu'tx. Txãa fxi'jîni', hebreo, griego, latin yuwejuk fxi'jîni yu'. ²¹ Aça' sacerdote npiçthê'jwe'sx vxite' judiu npiçthê'jwe'sxa' na'jînatx Pilato's paatxhî'kh:

—Judiuwe'stxxi Jxkaahsa jîna fxi'j na'wê, Adxa' Judiuwe'stxxi Jxkaahsath jî'k jîna fxi'jwaç'a', wejx ewna.

²² Nawa Pilato pasçxa' na'jîk:

—Adx txã'wê fxi'jîni's kim yuhwa yu'pthehmeena.

²³ Txajũ' soldauwe'sxa' Jesusa's kluuste fçuç yã'jçxa', Jesus athni's pahzsa txu'dedetx soldau iisa teeçxteeçx. Sa' atxha'swa txã'wêytxi yũu

wêe, nawa txã' teehwedsaçxáak yu' kaçnimeesa. ²⁴Aça' soldauwe'sxa' na'wêtx puutx we'we:

—Txã's sudeya'mée swerte kaja'nja'w kim jii neeyüutewa jiyuya'.

Soldauwe'sx txã'wê yüuni' Dxus librute na'wê fxi'jni kxtey yuuk: Adx athni's txáawe'sx pwe'sx txu'dedetx swerte kaahçxa jina fxi'jni'.

²⁵Txã'wê yüuçpkaçxha', Jesusa's fxuçni kluus pukate nji'jwa üsu'k vxite' Jesus nji'j yúkwe, vxite' Kleofxas nyu Maria, vxite' Maria Magdalena.

²⁶Aça' Jesus nji'j pukate Jesus wedxnisa ih üste Jesus uyçxa', nji'ja's na'jik:

—Naa piçthê'ja' i'kwe's jxpe'jena nçxi'k na'wê jičxa', ²⁷txãa piçthê'ja'swa na'jïnak neewe'we:

—Na'sa' iidx mama na'wê jxpe'jene'ga.

Txã'jite', txãa piçthê'ja' txãa oratey Jesus nji'ja's txajx yatna pe'jna u'kh.

Jesus uuní

(Mt 27.45-56; Mr 15.33-41; Lk 23.44-49)

²⁸Txãa skhêua', Jesusa' jiiik yu' jxuka kxtey yuuna u'jweçtewa. Sa' Dxus librute ma'wê fxi'jni kxtey yuukahnku na'jina we'we:

—Yü'wêeth jina.

²⁹Teeçx tasa vxino utak üsu'. Aça' txãa vxinote esponja's tuupha'jçxa fxtüte açççxa Jesus yuwete utxatx çxazxakahn. ³⁰Aça' Jesusa' esponja's çxazxaçxa', na'wêk we'we:

—Jxuka jxã'jnik neeyüu jina'wa, kiiçhuna' uuk.

Teeçx soldau Jesus tabxte yãjani

³¹Aça' Paskua fxiesta en ajaç yã'kh yu'. Txãa ena' wala ki'snisa yu'k. Aça' judiuwe'sxa' fxiesta ente uusaawe'sx kakwetx kluuskhê nvxiit wêemeççxa', Pilato's pëjxtxi kluuskhê ki'pnisa çxidatx çxkadedeya' kaakhan, dud uute' kakwetx txajü kiisya'. ³²Txajü' soldauwe'sx u'lççxa çxidatx çxkadedetx teeçxsa khuê'yna, sa' vxitenawa txã'wëytxi yüu Jesus pukakhê kluuskhê u'psa's. ³³Nawa Jesusnawa txã'wëy yüuya' utxaana kühçxa', uunii yã'j u'ptetx uy. Txãa pa'gatx Jesus çxidatx çxkadedemée. ³⁴Txã'wëtewa, teeçx soldau yu' Jesus tabxte we'thuk yãja'. Aça' txã'wê yãjate', ee yu' yakhku uwu. ³⁵Txã'wê yüunisa's pta'sxa' txajx yafxju yuuk uy, sa' isak we'we'. Sa' jiiia' isa we'weççxawa, kxah i'kwe'sxwa txã'wê yuh yüune' sühwa'ja's jii'phune'kwe. ³⁶Nawa Dxus librute' na'wê fxi'jni': Iidx dxi'thtxi' teeçxçxáa yuhwa çxkahdemeetxna jini kxtey yuukahntxi txã'wê yüu. ³⁷Dxus librutey vxite ajkhê na'wê fxi'jni üsa': We'thu yãjaçxa', thegutxna jii'k.

Jesusa's pedani

(Mt 27.57-61; Mr 15.42-47; Lk 23.50-56)

³⁸Txã'wê yüuniijü' Jose yaasesa Arimatea çxhabuwe'sxa' Pilato tasxte utxaak Jesus kakwe's pëjççxa jxüna u'jya'. Aça' Pilato' ewna jite', Josea'

Jesus kakwe's pedaaya' jxūna u'kh. Naa Jose yu' Jesus ju'gsak yu', nawa judiuwe'sxtxi ūkhçxa kimwa jiyunimeene' u'jusa yu'. ³⁹Txajū' Nikodemowa pa'kh, Jesus yakh kus puutx we'wesa. Txāa yu' treinta kilo ājk yu'çe tū'sçxa pa'j, miçxa aloe yakh ka'dnisa. ⁴⁰Txajū' Jose' Nikodemo yakh Jesus kakwe's jxūna u'jçxa', yaptxi txāa yu'çe ka'dnisa yakh, judiuwe'sx ma'wēne'ta uusāa kakwetx pedá' txā'wēytxi yūu.

⁴¹Jesusna kluuste fxuçni utxasu walta ūsu'k. Aça' txāa waltate' uusāa pedawa'j kafx u'sesa u'pu'k, kim yuhtxwa pedanimeesa. ⁴²Txkaatx Jesus kakwe's khikh, kafxa' utxatek u'pu' aça' ki'swa'j enwa ājaçku yu' naa pa'ga.

Jesus ki' itxi yuuni

(Mt 28.1-10; Mr 16.1-8; Lk 24.1-12)

20 ¹Ki'sen khikhiiçte wala kusí çxhi'dxtey Maria Magdalena' pedaní kafxte kühçxa', kxtee aphni kweta's kiisniyā'j ūstek uy. ²Txajū' wuwuuçxáak u'j Simon Pedro vxite' Jesus wedxnisa tasxte pa'j. Sa' na'jīnak pta'sx:

—Kwe'sxtxi jxpe'jsa kakwe's jxūna u'jne'ta pedaniijū, aça' jiyumeetha'w mkaane'ta khikh nanwa jīte', ³Pedrowe'sxa' teehwed pedani kafxte thegya' u'jtx. ⁴E'zīi wuwuuçxáatx u'j, nawa teeçxa' thaakwe dud wuwuuçxa Pedro's phyahççxa' txāa khuē'y yaçte kūjk pedani kafxte. ⁵Sa' kuyçxa' Jesus kakwe's yapnisaçxáa u'ptek uy. Nawa txā'wē uyçxawa, dxiite yu' u'kame'. ⁶Txajū' Pedrowa e'ste kühçxa pedani kafxte u'kak, sa' txāawa uyku Jesus kakwe's yapnisaçxáa ki'pni u'pte. ⁷Sa' Jesus dxikthé yapnisa yu' tpehgçxa fxiite ki'pni u'ptek uy. ⁸Aça' yaçte kūusawa kafx dxiite u'kaçxa', txā'wē tpehgçxa ki'pni u'pte uyçxa', Jesusa' itxi yuu yuhgakx sūhwa'ja's jī'phuk. ⁹Nawa Jesusa' uuçxa ki' itxi yuuna jīna Dxus librute fxi'jni's jiyumeytxi yu'. ¹⁰Txajū' Pedro Juanwe'sxa' txā'wē uyçxa', yatna ki' sxawedna u'jtx.

Maria Magdalena's Jesus vxyaani

(Mr 16.9-11)

¹¹Pedrowe'sx u'jweçpkaçxha', Maria Magdalena' pedaní kafx pukate ū'nena neeyūuk. Txā'wē ū'nena u'píi, kafx dxiiga kuyçxa' uyku ¹²e'z angeleswe'sx çxihmeçxáa iikāh jxaathsatx Jesus kakwe's khikhnite pdxi'p kaççxa u'pu', teeçxa' dxikthé ja'date vxite' çxida ja'date.

¹³Txajū' angeleswe'sxa' na'wētx pējx:

—I'kwe' çkīh yūuçxa ū'nena ūskwe? jīte', na'jīnak pas:

—Ū'kwe's jxpe'jsa's jxūna u'tha, aça' jiimeeth mkaane'ta khikh nanwa.

¹⁴Txā'wē we'wepu'na' yu'thegçxa', teeçx piçthē'j yuçuçxa ūstek uy. Nawa txā' Jesusna sūhme'. ¹⁵Aça' Jesusa' na'jīk:

—I'kwe' çkīh yuutekwe ū'né'? sa' çkimnakwe pakwé'? jīte', Maria' kxtee walta thegsa wá' txā'wē we'we' sūhçxa', na'wēk pas:

—Idx wá'ga ũ'kwe's jxpe'jsa kakwe's jxūna u'j na' mpeeta'sx mkaa khikhçxawa, ũ'kwe jxūna u'khan. ¹⁶ Txā'jīte' Jesusa':

—jMaria! jīnak kxsus.

Aça' Maria tuphiçxa na'wēk we'we hebreo yuweju:

—jRaboni! jīk, txā' Kaapiya'jsa jīni'. ¹⁷ Txajū' Jesusa' na'jīk:

—Adxa's jxa'dxnuwe, Tata tasxna u'jmeythu naa pa'ga. Wejxwa adx yakhtē'jwe'sxtxi pta'sxya' me'jwe na'jīna: Adx Tata' i'kwe'sx Tataíçxá', sa' adx Dxusa' i'kwe'sx Dxusíçxá' txajx tasxna u'jweçthu jīnak pta'sxkaah jīne'kwe.

¹⁸ Txā'wē pta'sxkaathe', Maria Magdalena' pta'sxya' u'kh: Jxpe'jsa's uythu, aça' txāak txā'jīna pta'sxkaah jīk.

Jesus txāa yakh u'jusawe'sxtxi vxyaani
(Mt 28.16-20; Mr 16.14-18; Lk 24.36-49)

¹⁹ Txāa ki'sen entey kusa' Jesus yakh u'jusawe'sxa' yatte u'kaçxa vxitxtxi jxuka aphçxatx ũsu', judiue'sxtxi ũukhçxa. Txā'wē ũspkaçxha', Jesusa' txāawe'sx pxāhte vxyaaçxa na'jīnak weçxa:

—Ūukhmée wēt wētçxáa yajkxna meswe.

²⁰ Txā'jīçxa', txajx kuse kpā'tx pta'sxku, tabxte we'thu yājani'swa txā'wēy. Aça' txāawe'sxa' Jesusa's uyçxa' wala weçxweçxa yajkxtxi.

²¹ Txajū' Jesusa' ki' we'weçxa na'jīk:

—Ūukhmée wēt wētçxáa yajkxna meswe. Adx Tatawa ma'wēga adxa's kaah txā'wēy adxwa i'kwe'sxtxi kajaçthu.

²² Txā'jīçxa', txāawe'sx kajkwesu puthku na'jīna:

—Miipa'gawe Dxus Espiritu's. ²³ I'kwe'sxa' maatxwa we'weçxa': I'kwe'sx pkaltxi' Dxusa' peltunaína jīte', peltunāyni yuutxna. Nawa peltunaímeena jīte', peltunāynimée neeyūutxna jīk.

Jesus itxi yuuni's Tomas uyni

²⁴ Jesus yakh u'jusaçxawa, Tomas melxisu jīnisa' meek yu' Jesus txā'wē vxyaani ente yu'. ²⁵ Aça' Tomas yu' uymeetewa, Jesus yakh u'jusa vxite yu' pta'sxtxi:

—Kwe'sxtxi jxpe'jsa's uytha'w jīna.

Txā'wē pta'sxtewa, Tomasa' na'jīk:

—Kusete klaus kpā'vxitni's uyçxa txajx tabxte we'thu yājani'swa uyçxa txkaa adx kuse's kaahmeeçxa yu', txā'wē itxi yuune' sūhme'nja jīk.

²⁶ Txajū' teeçx ki'su skhēwniite', Jesus yakh u'jusawe'sxa' ki' pkhaakheçxa ũsu'tx teeçx yatte. Aça' txāa ente' Tomaswa txāawe'sx yakh pkhaakhena ũsu'k. Aça' makwe vxitxtxi aphçxa ũstewa, Jesusa' txāawe'sx pxāhte vxyaaçxáak yuu, sa' na'jīk:

—Ūukhmée wēt wētçxáa yajkxna meswe jīk. ²⁷ Txā'wē we'weçxa', Tomasa'swa na'jīk:

—Adx kusete kpã'yuunitx thegçxa, txkaa iidx kuse's mkuupath, sa' adx tabxte we'thu yãjanigawa mkuupath. Txã'wẽ yũuçxa', kuh jwed jajkxmée, ïtxi yuu yuhga sũhwa'jçxá's ji'phune'ga jíte', ²⁸Tomasa' na'jìk:

—¡Adxna jxpe'jsa yuhg, sa' adx Dxus yuhg!

²⁹Txajü' Jesusa' na'jìk:

—Tomas, açxha' adxa's uyçxa', ïtxi yuu yuhga sũhwa'ja's ji'phug. Nawa adxa's uymeeçxawa txã'wẽ ïtxi yuu yuhne' sũhna yaakxsawa weçxweçxa fxi'zewa'jsata' jïnak we'we.

Jesukristo' Dxus Nçxi'k yuh yu'k jïna pta'sxsa' naa libru'

³⁰Naa kiwete kim yuhwa ajanimeesatx Jesusa' wala kuh kaavxya'ja'kh txãa yakh u'jusawe'sxtxi. Nawa jxuka yu' naa librute fxi'jnimeeta'.

³¹Nawa Jesukristo' Dxus kaahni txajx Nçxi'k yuh yu'ga sũhna jiyuçxa' txã'sna jxpa'gaçxa', pçumée ïtxi fxi'zewa'ja's ji'phukahñ pta'sxna fxi'jnisaxáata'.

Tiberias ïkh pukate Jesus vxyaani

21 ¹Jesusa' Tiberias ïkh wala pukate ki'kin na'wëk vxyaaxãa yakh u'jusawe'sxtxi. ²Kxtee pkhaakheçxatx ùs yu' Simon Pedro, vxite' Tomas melxisu jì'tx txãa, vxite' Natanael Galilea kiwesu Kaná çxhabetewe'sx, vxite' Zebedeo nçxi'kwe'sx, vxite' e'zsa. ³Kxtee pkhaakheçxa ùsçxa', Simon Pedro' na'jïnak we'we:

—Wedx uweya' u'jweçthu jíte':

—Kwe'sxwa idx yakh yuhtha'w jïnatx pas txãawe'sxwa.

Sa' teeçx barkote khêeçxa u'jtx. Nawa txãa kuste' teeçx wedx yuhwa uwemeeta'. ⁴Khikhyna sêjeçte', Jesusa' ïkh pukate vxyaak. Nawa txãawe'sxa' jiyumeeta' kimtewa. ⁵Txajü' Jesusa' na'jïnak pêjx:

—¿Teeçx wedxçxá' uwekwe'? jíte':

—Uwemeetha'w jïna paste', ⁶Jesusa' na'jïnak jxkaah:

—Wedx ukhe's paçu ju'gkhê makhwe, sa' uweene'kwe jíte', txã'wëy ukhe's akhçxa', yu'ju wezçxawa kutxi'jya' çxhãçxhameeta', wedx iiméh kuh khêepa'ga. ⁷Txã'wẽ yũuni's uyçxa', Jesus yakh u'jusa wedxnisa' Pedro's na'jïnak pta'sx:

—¡Naate ùsa' txã' kwe'sxtxi jxpe'jsa'!

Txã'jïna we'weçpkaçxha', Pedro' txã'wẽ wëse'jna' ropa's jathna'wa yu'khê khêek Jesus tasxna u'jya'. (Ropa's pahdeçxak ùs yu', txãasak txã'wẽ yũu.) ⁸Barkote neeyūsáa vxite yu' wedx ukhe's wezxna kũhtx, cien metroçxáak ùhdxte kũuwa'j peejx yu' naa pa'ga. ⁹Txajü' barkoju jxsa'jçxa', ipx yuthni çxhã'çxha kajkwega teeçx wedx petx pan khikhni ùstetx uy. ¹⁰Txajü' Jesus we'weçxa':

—Ãçxh uwenisa wedxtxi mneejxũhwe jíte', ¹¹Simon Pedro' barkote khêena'wa wedx ukhe's wedx walasaçxaçxáa ji'phsa's wezxna kũjk

ũhdخته pa'j. Ciento cinkwenta y tres wedxku ji'phu'. Kxaazkuēe wedx ji'phçxawa, ukhe' suteme'.

¹² Txajū' Jesus pa'yaçxa':

—Ū'ya' myuhwe jīk.

Txā'wē pa'yate!, txāa yakh u'jusawe'sxa' jxpe'jsatewa jiyuçxa', maa yuhwa: Idxa' çkimga? jīna pēyi'çmeeta'. ¹³ Aça' Jesusa' utxaana kūhçxa', pana's uwena'wa txāawe'sxtxi ūsu'sku, wedxnawa txā'wēy.

¹⁴ Jesus uuçxa ki' ĩtxi yuunijū naa yakha' tekh us vxyaak txāa yakh u'jusawe'sxtxi.

Jesus Pedro's neewe'weni

¹⁵ Txajū' ū'na jxā'jçxa', Jesusa' Simon Pedro's pējxku:

—Jonas nçxi'k Simon, çayte ūsta' txāawe'sxte jxthaakwega' adxa's wedxi'á'? jīte!, Pedro pasçxa':

—Idxa' peekx jiig adx idxa's wedxiçtewa jīte!, Jesusa' na'wēk neewe'we:

—Txā'wēçxa', adx piisakuētx wedxna miipe'l' jīk.

¹⁶ Txajū' Jesusa' Pedro's ki' pējxku:

—Jonas nçxi'k Simon çadxa's wedxi'gá'? jīte!, Pedro pasçxa':

—Idxa' jiig adx idxa's wedxiçtewa. Txā'jīte!, Jesusa' na'wēk neewe'we:

—Txā'wēçxa', adx piisxaatx sāl'jīna miipe'l' jīk.

¹⁷ Tekh uswa ki' pējxku Jesusa':

—Jonas nçxi'k Simon, çadxa's wedxi'gá'? Aça' Pedro' wala nxusku txā'wē tekh us çadxa's wedxi'gá'? jīna pējxte!. Sa' na'jīk:

—Idxa' jxuka jiig adx idxa's wedxiçtewa jīte!, Jesusa' na'jīnak neewe'we:

—Txā'wēçxa' adx piisxaatx jxpa'yakx miipe'l'. ¹⁸ Isath we'we', nyafxī piçtakxteya' ropa's peekī jathe'g, sa' mtee u'l' wēeçxawa u'l'jwe'g. Nawa ĩisx yā'the!, vxitesa' idxa's tudçxa jxūna u'l'jwetxna idx u'l' wēemeetewa.

¹⁹ Jesusa' txā'wē we'weçxa', Pedro ma'wē yūuni uuçxa Dxusa's āate kaavxya'ja'l'jwa'ja's pta'sxnak txā'jī.

Txajū' Jesus we'weçxa':

—Adx yakh myuhçxáa jīnak pi'kx.

Jesus yakh u'jusa wedxnisa

²⁰ Pedro' yu'thegçxa' uyku Jesus wedxnisa's. Txāa wedxnisaíi nmeh kus ū'weçte!, Jesus pukate kaççxa u'pçxa' na'jīnak pēysa yu': Jxpe'jsa çkim idxa's dukhwa'jsana? jīna. ²¹ Txā'sna Pedro uyçxa', na'jīnak Jesusa's pējx:

—Jxpe'jsa, naa piçthē'ja's çkīh yuukx? jīte!, ²² Jesusa' na'wēk pas:

—Adx jxthāaste' naa piçthē'ja' uumée u'juma'k adx sxawedna kīhpkaçx, nawa txā'sa' idxa' yaakxwa'l' ji'phmeeg. Idxa' adx yakh fxi'zewa'l'çxá's miijajkx.

²³ Jesus txã'wẽ we'wepa'ga, txãa piçthẽ'ja' uuwa'jsamée wáana sũhnatx ũsu' Jesus yakh u'jusawe'sx vxite yu'. Nawa uumeena jĩçxa Jesusa' txã'wẽ we'weme', naasáa adx jxthãaste', uumée u'ljuma'k adx sxawedna kĩhpkaçx, nawa idxa' txã'sa' yaakxwa'j ji'phmeeg jĩnaçxáak we'we.

²⁴ Jesus we'weçxa' txã'wẽ uumeena jĩna we'wenisa piçthẽ'jĩçxáak pta'sxna fxi'j, açá' isasa yuja's we'we'k sũju'tha'w.

²⁵ Txã'wẽ Jesus kĩjkĩhwa kaavxya'ja'jnĩtx jxuka pta'sxna fxi'jwaça', naa kiwete libru yuuwa khẽemeetxna sũju'th.